

FROM THE LAND OF THE SEVEN HUTS

S. LORESTERWELL MAJAW

KA

PATENG BA LAJAH

Volm II

1984

1984

1984

*All Rights Reserved by the Author*





Napdeng ki para arkmie, u Norin u kham  
ieit bad kham iadei jingnut bad ka Melinda ka  
khen jong ka kmie nah jongu ka Sara. Naduh  
ki por ba ki dang iarit, ka jingiaieit hapdeng ka  
Khuri, u Norin bad ka Melinda ka long kaba  
haduh katta katta. Kane ka leit long imat na ka  
daw ba ki kmie ki kpa jongki ki dang ia rung  
iamih man ka por bad ia sugewbha sngewtynnad  
bad ki dang iajan bad mar ia tbeh ka rta bad  
dang iabiang bor bun ialeh kai bad iampir jing-  
nut. Ki don ruh lehse sa kiwei kiwei de ki daw  
nalor jong kitei.

Ki ju ia lehkai lang ha ki por ba ki dang  
rit. Ki ju ialeit iawan lang lai lai ngut shi  
para haba ki la san bad samla, kam pher la ka  
long ha lyngkha, haba leit tong um haba leit iew  
leit hat ne hangno hangno, kham niir ba phin  
iohi ia ki marwei marwei, ne wat arngut. Ka  
Khuri bad ka Melinda ki ju sngew shngaiñ bad  
sngew heh mynsiem namar u Norin uba heh  
bad uba khelaiñ u don ban iada iaki. Lada jia  
ba don mano mano ba byrngem ne leh ei ei iaki,  
u Norin khlem pep un ai jingsneng.

Ka Melinda kum kum kham rit bad long  
para napdeng jongki, ka ioh ban leh kjeh ia ka  
Khuri bad ia u Norin ruh kum ruh. Kane ka  
jingleh kjeh jongka ia u Norin ka la neh wat  
hadien ba ka Khuri kam don shuh.

Ka jingleit bud jongka Khuri ia u Dring kan jin da la pynlong ia u Norin ban sngew kynjah bad sngew blaw shibun eh. Hynrei ka jingdon ka Melinda ka la lah ban kham pynsting ia kata ka jingsngew jongu. Ka Melinda ka shait pyntngen bad batai ia u ba ka pyrthei ka long hi kumta. Kin ym lah ban ia im lang lynter bad ki ba ha ing ba ha sem bad ka por kan poi ha kaba ki dei ban shongkha shangman bad im hala ka jong ka jong ka ing ka sem bad la ki khun ki kti. "Hynrei kata pat kam mut ba ka jingiadei shipara kan dkut noh." La kren riew tymmen ka Melinda.

Ka la long shisha kumta. Kumba san snem hadien ka jingjia ba sngewsih ia ka Khuri, ka Melinda ruh ka la shongkurim. Hadien kata, wat la ka jingsngewieit sngew jan hapteng jongki ka don, pynban u Norin u shem ba kam long shuh kum ha ki por kiba mynshuwa. Ka Melinda ka la bunkam ha kaba pynbiang ia la u jong u lok bad kam da kham don por shuh ban rakren ia khana. Ka Melinda ka ju sngewtynnat haba u wan kai bad u lok jongka u Dlan ruh u sngewtynnat shibun ia u Norin hynrei ki don ki por ba ki dei ban leit shane shatai bad hateng hateng u Norin u lap ba ka ing jongki ka khang tala bad teng pat u lap ba ki dang khreh dang khrum ban ialeit jingleit. U la sngewthuh ia ki jingdawa ha ka jingim jongki bad ka jing bymlah ban pyniabiang ka jingwan shongkai shongiaid ha ki por kiba lait. Kumta suki suk u la sdang ban pud ka jingleitkai sha ing jongki.



Khamtam haba ka nemsniew ka la wan, ka long kaba eh ba kin ia ioh por kum mynshuwa. Kumta u Norin um da sngew pher than ban ieh iala ka shnong bad kiba haing hasem ban leit bylla sha thain riwar. Ka jingleit bylla jongu kam dei eh ba ki kyrduh bam ha ing hasem, tynrei ban shu pynkhreh lypa ba ioh ka nemsniew kan neh slem. Na kata ka daw u la wanphaï sha shnong hadien san bnai, ynda u la ioh pynlang kamai shibun.

Ha ki hynñiew snem ba ka la shong kurim, ka Melinda ka la don sawngut ki khun. U Dlan u ba im tang da ka rep bad bylla, u la shem jingeh shibun ban pyndap pynbiang ia ki jingdonkam haing ha sem. U Norin haba u la iohi ia kata um banse ban iarap iaki hateng hateng ha ki por ba khim ba shipa. Hooid u Dlan u long u briew uba bha bad uba trei shitom. Hynrei ki la iabun bad la khmih lynti ba kin nang iaroi bad la poi ha u pud uba lada um lah ban kamai khambun na kaba u ju kamai, ka lawei jongki ka long kaba dum.

Ha kawei ka sngi ka Mina ka khun nyngkong jongki kaba la dap kumba hynriew snem ka rta ka la kem pang. Kata ka jingpang ka la bat iaka bapli khlem pyllait. U Dlan bad ka Melinda ki la don hapdeng ka jingeh kaba khraw namar ba ki la dei ban pynlut ha kaba sumar iaka nalar ba ki la don lypa ka jingkit kaba khia. U Norin u ju iarap ia ki hynrei ki don ka jingsngew rem ban shu ap khmih lynti barabor ia ka jingkyntsham jongu.

Ha kaba khatduh u Norin bad ki kmie ki kpa jongu ki la shimti ban ri ban sumar ia ka Mina khnang ban ia tynrong ia ka jingkit ki kmie ki kpa jongka, bad kawei ruh ba kin sngew shngaiñ ka ñng ka sem. Wat la ka pang bad ka khrew bad la donkam ban ia peit miet peit iong bad pynshitom ialade ha kaba sumar iaka pynban ka Mina ka long kum ka sharak rit kaba phyrnai ha ka ñng jongki. U kpa ka kmie bad u Norin ki ieit thep myasiem iaka. Ki la pyrshang bun ngut ki nongsumar hynrei teng teng ka la i peitmat bad teng teng pat ka khie shitom. Don ki khep kiba ka la don ha tmier jong ka jingiap bad ka jingshai jong ka jingim jongka kaba long ka jingshai jong ka ñng la i kumba kan lip. Ha kum kine ki por ki ju iapeit shiia ia shai ha kaba ialeh ban bat ia ka mynsiem jongka. Ha ka jingpyrkhat u Norin, ka jingim jongka ka long kham kordor bad kham myntoi ban ia ka jongu ia la ka ñng bad ka kur ka jait. Kumta khlem kheññ bad khlem khññium u la shah ia u slap ka lyer bad iaid ha ka mied ka iong haba leit beh leit thud nongsumar iaka. U shait bah kyndung iaka ha ñng ne ha shnong ha thaw ha ki por ba ka bneng ka bha. U pynthied ki jingialehkai ki jait pa ki jait ban pynsngewbha bad pynsngewtynnat iaka.

Kino kino ki jingtrei shitom, kim ju pep ban sei iala ki soh bad pynmih ia ka bainong kaba iadei biang. Ka Mina ka la nangkhelaiñ nangkhelaiñ bad hadien ba ka jingpang ka la bat iaka san snem, ka la pyllait noh war iaka ha kaba

khatduh. Hynrei wat la ka la dap khatwei snem tam, ka jingpang ka la pynlong iaka ban i kum ka khynnah hynriew ne hynñiew snem.

Hadien kata ka la nangsang nangplung stet bad ka la long ka khynnah kaba i lub bad i khiathew. Ka jingkohnguh, jingsmat jingsting bad ka jingtipsangi jongka haduh ki por ba ka la khie samla ka long kaba pynhun iala u kñi bad ki kmierad ki kparad kaba la ri la sumar iaka.

“Ban da dei ba ym shym buh kyrteng iaka ‘Mina’ ngan jin da la buh kyrteng iaka da ka Wanpli.” La ong u kpa u Norin ha ka Tngen.

“Phi mut aiu da kata ?” La kylli ka Tngen.

“Ngi la duh iala ka khun, ka Khuri, hynrei ngi la ioh ia ka Mina kaba ia syriem hi ia ka Khuri, kumta ngi lah ban ong ba ka Mina ka wanpli ha ka jaka ka Khuri.”

“Kata ruh kaba sngewdei shi rukom hynrei yn leh kumno haba la depjer dep thoh iaka. Shish ban da tip kumto te ha kato ka por ba ka dang pang ngin da iatap lubri noh badjer kyrteng Wanpli iaka ym la biang eh ?” La kren babe ka kmie.

Ka long kaba eh ban poi pyrkhat ia kata namar ha kato ka por mano ban leit pyrkhat ia ka kyrteng Wanpli ? La thap kum pyrkhat pynban da ka Leitlang.

“To phi, phi te i ba la nang ki ñia khutia feh ia kaba la dep ladep ngin ia kitbok kit rwiang ia ka lawei ba phyrnai jongka.

“Sa tang kata keiñ kmie. Lada ngi kwah ba ka lawei jongka kan phyrnai, ngi dei ban bsa faka ha ka liang ka met bad ka mynsiem da kiei kiei kiba kynsai bad kiba janai.” La ong u kpa.

“Ryngkat ka duwai ka phirat ba kan koit kan khiah krat.” La ong ka kmie.

## XI

Ka Mina ka la heh la samla. Ka met ka phad jongka ka la wandur itynnat, bad ka snieh doh jongka ka plung haba kala lait na ki jingshitom bad khie samla artat ha kajuh ka por. Ka long ka khynnah kaba tipsngi bad u Norin bad ki kmie ki kpa jongu ki ieit bad sngewtynnat shibun eh iaka. Ka ju leit iew leit hat barabor bad ka la nangbha ban siew ban tda. Kane ka la pynaram iaki namar ba ka Tngen kam da lah shuh ban leit iew khah khah.

Hadien katto katne por, ki khubor ki la rung ha ki shkor jongka ba ka Mina ka la ialang samla bad uwei u briew uba na kawei pat ka shnong.

Kim da sngew pher eh ia kata namar ka por jongka ka la dei bad baroh ki ialong lem kumta. Kaei kaba ki kwah ka long ba ka Mina kan iathuh da lade hi haki ia kine kiei kiei. Ki la ap katto katne por hadien kata, hynrei ka Mina kam man iathuh ei ei satia haki. Kumta ha kawei ka sugi ka Tngen ka la kren ha ka Mina.

“Mina, sha ki iathuh ba phi ju ialeit dihsha ha iew bad uwei u briew?” La kylli pyrshah syndon ka Tngen.

Ka Mina ka la saw kyrang la kum u sohmynken ih. “Em phi Meirad, mano ba iathuh iaphi?” Ka la kylli, ka da wiat artat kumba sammut.

"Iathuh hok keiñ khun, ngim khang ei ei ia kata hynrei ngi shu kwah ban tip keiñ khnang ba ngin sngewthuh."

"Ym pat biang ka por te Meirad, ngan iathuh kumuo ? Tang ki jingmut ruh ym pat ia sngewthuh sngewthaw, yn shu iathuh noh long hi." La kren thei iaw ka Mina.

Wei haba la iarung basa sha lang te la dei ban don katto katne ka jingiasngewthuh jingmut. Kam dei kumta ? To ieh sh.sha ym pat dei ka por ban shu ia pyrkhath kyrkieh bad nga sngew iahap jingmut bad phi ba ngim dei ban bam jakhluit ha kiei kiei baroh. Ngi dei ban ap ia ka por kumba phi ong. Hynrei jait ba la iapur ia khana ki briew ha shnong ha thaw, sngew bieit keiñ ba mangi pat ngim tip ei ei. Kumta lada phi shu iathuh ia ka kyrteng ruh ka la biang tang ba ngin shu tip.

Ka Mina ka la shu wiat samrkhie bad peit ia ka kmierad. Ka la kwah ban iathuh hynrei ka sngew eh namar ka sngew lehraiñ.

Hadien ba ka kmierad ka la khroh eh iaka, ka Mina kam banse ban iathuh.

"U Ra....i" Ka la ong ha ka sur kumba shu pasiaw.

"U Rai ?" La kylli ka Tngen ka da leh kyn-dit kat lah kat iai. Mar kumta ka la leit noh sha kamra thiah khlem ong ei ei shuh.

Ka Mina ka la lyngngoh ia kata ka jingleh jongka bad ka la suba ba don ei ei kaba pyn-sngewsih iaka. Ka la leit shata sha kamra thiah bad lap pynban ia ka kmierad ba ka iam suk shi suk.

“Balci Meirad ? Balei phi iam ?” La kylli ka Mina “Phi sngew kumno ?”

Ka Tngen ka la peit sha ka Mina ryngkat bad ki ummat bashlei. “A khun kynrad ksiar.” Ka la ong. “Peit da uno uno uwei pat u briew. Kam pher la u duk u raitoi, ngan hun ngan suk, hynrei ym ia u Rai.”

Ka Mina kam nang ong ei ei shuh. “Kumno ka kmierad kan tip ba u Rai u dei u briew u bymlong ? U Rai u long uba baroh ki iaroh ia ka jingbna jongu. Nalor kata u la don ka jing-nang jingstad bad la biang ka khih ka kamai.” Ka la pyrkhat ha lade. “Lehse i Meirad i bakla ia u bad uwei pat.”

“Balei Meirad, u leh aiu u Rai?”

“Ngam kynnoh iaphi khun, ngam kynnoh iaphi namar phim tip ia kaei kaba la jia. Ngim ju ialap ne iathuh khana ei ei haphi shaphang kata, kawei namar ba ngi kwah ban klet noh iaka lada lah bad kawei pat lada ngin iakren shi iakren ia kata kan wanrah ia ka jingkynmaw ba sngewsih bad ba kthang kaba lajia hapdeng ka ing jongki bad ka ing jongogi la slembah.” La ong ka Tngen.

Nangta kala iathuh ia ka jingjia baroh shaphang ka Khuri bad i khun jongka kumno ba ki la shu iap ei namar ka jinglehbein u kni u Rai." "Ki symbai sohjew la eh ban kylla sohthiang bad lada u kni jongu u la leh kumta ia i Meisan jong phi, kan eh ai u ia u ban leh kumjuh iaphi." La pynkut ka Tngen.

"Hynrei katba ki iathuh te ki ong ba u Rai u dei u briew uba niar ban shem ka jingbha kum ma u. Um ju dih ju bam bad u don ka akor ka burom." La pyrshang ban iasaid ka Mina.

"Kumta ruh u long u Dring u kni jongu ha ki por ba u dang ia iaaid ia ieng bad ka Khuri. Dei kata kaba la pynlong ianga ban ym sngew suk ka mynsiem shaphang jongu. Nga tieng ba haba nga la duh ia ka Khuri bad i khun jongka, mynta ngan duh sa iaphi ka ba la mih pli ha ka jaka jongki. Peit da uwei pat kam pher la u duk ne bylla tang ba u dei u briew uba bha kala biang." La pynkut ka Tngen.

"Wat iam seh Meirad, kein noh nga kloi ban iakhlad bad u haba phim sngewtynnat bad phim sngewbha ma phi." Ka la ong da ka mynsiem kaba dap bad ka sur kaba kyih.

Ka Tngen ka la khyllie iala ka khmat bad peit ia ka Mina lyngba ki ummat kiba shlei, ka la piam bad ka la doh la dait iaka. "Mina baieit, nga tip ba phi long ka khyannah kaba kohnguh bad tip ba phim ym pynlah ia ki jing-sneng bad jingpyni jongngi. Lada phin iaineh ha kane ka jinglong baroh ki jingdon jingem kiba ngin ieh shadien, ngin sa ai haphi ban ioh



pateng. Wat hadien ba nga la leitnoh na kane ka pyrthei ruh, ngan kyrkhu kyrdoh iaphi na dwar ki blei ba phin shem bha shem miat bad im suk im saiñ."

Ka Mina bad u Rai, la ki la iadon jingmut iwei ia iwei kim shym la iapoi sha kaba ia kular ei ei. Ka Mina ka la shu kiar na u Rai bad hadien katto katne por ka la pep ban leit iew leit bat, da ka jingmut ban kiar na ka jingia kynduh bad u.

Hynrei hateng hateng haba ka shong wei-briew, kam lah khlem da pyrkhath shaphang jongu. Ka tip bad sngewthuh ia ka jingpang mynsiem jongu namar jongka bad ka ju pyrkhath sngewsynei shaphang jongu. Teng teng ka ju phohsniew ba ka iaiaid bad u ha ka hima ka jingieit, ha kaba ka er synrai ka beh sngewtynnat hir hir.

Bun bun sien ka ju pynhiar mynsiem jlan haba ka kynmaw ia u hynrei ka pyrkhath bad ialeh ban bat ia ka jingsneng bad jingpyni ka Tngen da kaba tip ba ka leh kumta na ka bynta ka jingbha jongka hi.

Bun ki samla ki la pyrshang ban tied ia ka jingkhaw ka dohnud jongka da ka jingkyrmen ba kan plie, hynrei baroh ki long lehnohei. Naduh ba ka la kiar na u Rai ka la wan ka jingsngew blad ha ka bad kam don jingsngew snoh ha uno uno uwei pat.



## XII

Ka Tilda da dei ka khun khatduh jong ka Sara. Ka long kaba kham rit na baroh shi para. Ka kham lieh ia kiwei pat ki hymmen kynthei bad kham mih shyllang khyndiat. Ka jing phoi lian bad jing bym lah shah jongka ka long kaba la bna nam ha shnong ha thaw. Kam ju kham iadei jingmut badno badno ruh wat bad ki hymmen lajong. Ka jingioh leh mon bad leh kjeh lynter jongka iala ki kmie ki kpa bad iala ki hymmen ka la pynlong iaka ban wad iala ka ka jong ka mon khlem kheifia kiwei pat.

Wat la katta ruh, ha ki por ki por ki hymmen bad shynrang bad kynthei ki hap ban burom iaka. Ka phikir bha ioh don mano mano ba kren sniew ne pynbudnam ia ka ing ka sem bad ka jait ka khong jongki. Ka tang shu tip ne iohsngew ia kum kita kiei kiei, kam ju da ap iano iano. Ka la leit hi bak bak la ka long shiteng mied ne dangsaw ka tyngab. Kam ju tip burom iano iano ha kum kita ki por bad ki ktien jongka haba kala dom ki long kumba talaiia da ka waitlam.

Ki don katto katne ngut kiba kum kita ki kynthei hangta ha shnong, hynrei wat maki ruh ki hap ban husiar ha kaba iadei ktien dei thylliej bad ka namar ka palat liam iaki baroh. Ka long kaba i biria teng teng haba ka la kren stet maka kum u pyrthat bad ka lei lieh da ki ktien kiba sngew shykhei ha ki por ba ki iamai, kiba

na kawei ka liang wat la ki iabun ruh ki la hap  
shu sngap bad shu leit ne rung iamrem noh sha  
ing namar kam ju sngap iano iano wei ka la  
sdang ban kren bad kam ju ai kren shuh iano  
iano bad ka sur jougka ka sawa kham jam.

Ka Tilda ka ju i atnud kumno re ia ki jong  
u Norin namar kim da leh salia bad ñiew iaka  
kum ka khynnah rit bad ki ju kren bad leh  
riewblei, kumba ka ju ong. Kam sngew lah ban  
sngap ia ki jingiaroh ki briew ia ka ing ka Tngen  
katba ia ka jongki pat, wat la kim nud ban ong  
ei ei, ka shu pyrkhat sniew halade ba ki bishar  
bad peit tang ia ki jingduna. Ka i atnud  
shaphang ka Mina. Myuta ba ka Mina ka la lait  
la ki jingpang bad ka la heh la san ki briew ka  
ju iathuh khana haneng harum ba dei ki jong ka  
Tngen ki ba la pynim iaka. Ka sngewpoh iala ka  
jong ka kmie, sngew kumba na ka kpoh jengka  
baroh ym don balah ban leh kumta. Ka ktah ia  
ka burom jongka kum ka khun khatduh kaba  
long ka nongri nongdup ia kito kiba shem jynjar  
lanot. "Lada kam iadon kata tharai ngim lah?"  
Ka la ong halade. "Pha iakwah hi te mano ba  
pynbor. Pham ia sngewnguh balei ba ngi kiba  
bha toi kiba dang ai la ka khun ba phan  
iashngaiñ."

Haba ka peit sha ka spah ka hajar jongki,  
ka sngew ba ka dei ka hok jongka ba kan ioh  
pateng kum ka khun khatduh na ka kpoh. Ka  
sngew atnud kumno re ia ka Mina kaba shong  
ba sah ha ing jongki, Ka jing iajan jong ka ing

jong ka Melinda bad jong ka Tngen i kumba ka la kham pynjngai pynban iala ka kmie trai, bad ki hymmen ki para trai. Ka la pun ia kita kiei kiei hala ka dohnud bad ap ia ka por ba kan ioh ia ka kabu kaba biang.

Ha kawei ka sngi ka Tilda ka la leit sha ing ka Melinda. Hadien ba ki la iakren ia khana katto katne por ka Tilda ka la plie ia ka phang ka jingiakren kaba ka la buh hala ka jingmut. Ka Melinda ka bunkam bad kumta ka la trei artat la ki kam katba ka iakren bad ka Tilda.

“Phi te mo-” La ong ka Tilda “Ynda la heh la san makna ki khun ruh ym man ioh aram. Dei na kaba iohi ia ki nuksa jongphi kum kine kiba la pynblad ianga ban peit briew.”

“Ki la iarap hi katto katne hynrei kim pat da nangbha.” La jubab ka Melinda.

“Ban da don ka Mina te katta phi la suk la aram, balei phim khot iaka ba kan wan sah noh sha ing?”

“Shano kan leit treh kato kaba la ju shong ju sah shatei shaba pahuh pahai. Kan leit juh hi tan shong bad ngi ban iabam khip khap khap?” La ong ka Melinda kaba da sngew sarong iala ka khun ba ka ioh bam bha bad leh khun riewspah ha ing ka Tngen bad u Norin.

“Phi la ioh saw ngut ki khun ruh phi dang kren bieit kumta te ngan ong kumno shuh. Hynrei ka ing kmie te ka ing kmie keiñ la ka long kumno kumno ruh. Yn nai ia ong ia kata ka bam ka dih bad kine kitai. Ha nga hi ban ong ba kan iawan ñiewpoh kumta sa da ka khun te, ja pha la.....” La ong ka Tilda khlem da pynkut.

“Kam shym ong ei ei ka bapli shaphang kata, nga shu pyrkhat kumta keiñ. Kawei ruh ki la ia pynim, ri bad sumar iaka naduh dang rit, kumno ngan shim noh iaka ynda ka la heh la san bad la myntoi? Ka don ka jingsngew eh hangta ruh.”

“Phi la iakut ban ai jynduh iaka ha ki?”

“Ngim shym iakut ei ei, hynrei ka shu long kumta keiñ.”

“Phi i thei, ka Mina ka la samla. Nga tieng ba ioh shu klumar ei ka jingim jongka lada ym don ba sneng ba kraw iaka.”

“Katba nga tip, ki iasneng ia kraw hi barabor. Kumba ka long mynta te ka i tip briew ka bapli.”

“Ah thei, hooid ki lah ban sneng ban kraw iaka. Hynrei hato ki lah ban leh kumta naduh la ka mynsiem kumba leh ki kmie ki kpa? Nga ngeit da lei lei ruh em. Shi shutak


ruh kan ym iadei. Kin leit da ia sngewthuh aiu ia ki khun kiwei. Ki lah ban shu leh synler pyndep rukom kumba ong mano re."

"Wa i bah lei im ju aili ho I sympat ruh lada donkam."

"Nga te iala ka khun kaba da kha da pun shitom, ba kan iawan sympat da kawei ka ar ngam sngew dei wat lada dei makna uta u hymmen ne u kñi. Kiwei kin sngewthuh aiu te? Ki lah ban shu sympat beifi tang namar ba ki i shrai iaei iaei, bad tang na i daw i bym larkam." La kren pynshit ka Tilda.

"Tip seh, leit tip mano ia kata." La jubab ka Melinda.

"Wat shu hun phi. Kumba nga la ong, lashai lah ban shu klumar ei ka jingim ka khun lajong. Lada ki kmie ki kpa kim tip iala ka khun, mano pat ban tip? Kat ia ka Mina kaba la myntoi kam myntoi jam kha makha yn shu ai ei ha kiwei katba ialade ia trei shitom kum ban sei ka mynsiem, nga te sa tang ba la bieit. Lashai shu buh lada don uba ia don jingmut u ba phah kylli u ba iabit iabiang ruh phi tharai kin ia sngewtynnai? Kin ym bynnud ia ka jingmyntoi la jong? Kin ym shah ba kan iapoi-kha phin lah leh aiu maphi? Shu buh ka ioh u lok uba lah ba lai, myntoi mano? Maki em? Iaphi ym don ba salia ba fiewkor."



Ka Melinda ka la sdang ban sngew iahap jingmut bad ka Tilda.

“Ka lah ruh ban long kumta. Lada ngan khot phi tharai kan treh?”

“Kata te sngewthuh maphi keiñ. Kam shong ha ka jingtreh jing bym treh jongka. Kaba ngi iakren ka long ka jingkhót bad jingbym khot jongphi keiñ. Haba la khot ki kmie ki kpa don hi ki bym treh? Nga te ban iala ka khun hi lada kam treh te ngan pynleit syndon ruh nga nud.”

Kumne man ka por ka Tilda ka ju wan ban pynshoi iala ka hymmen. Ka Melinda wat la ka sngew dei teng teng ia ki jing pyni jongka, hynrei kam sngew nud ban leh kumba ka ai jingmut. Teng teng haba ka Mina ka wan kai sha ing, ka la mut ban kren ha ka shaphang kita kiei kiei hynrei ka shem ba ka long kaba ch ban leh kumta.

Ha kawei ka sngi ka Tilda ka la wan biang. Tang shu poi tiap ka leh kumba ma briew.

“Ym don mano mano em?” Ka la kylli ia ka Melinda.

“Yn don mano?” La jubab ka Melinda ka ba ipher ia kata jingleh jongka.



“Nga wan khnang shaphi na ka bynta kawei ka kam. Tip phi la tip ne kumo ?

“Kaei kata, ka kam aiu ?”

“Ka kam ka Mina keiñ.”

“Balei jia aiu ?”

“Ba phah kylli uwei u briew te ?”

“U ei uta ?”

“Sngew phylla shibun ba ka kmie kam tip ei ei ia ki kam ka khun la jong katba kiwei pat ki la dep iatuklar, bad wat ki riewbah shisngi ruh ki la iabna. Nga la ong em iaphi naduh mynshua ? Hynrei phim ngeit. Hangne mynta te ka la paw bad la urlong shisba em kumba nga la ong ? Da manga ka bymdei ka kmie nga la tip lut, phi pat phim tip ei ei ? Kaba eh ka kam. Leit seh hangtei, lada phim nud ruh yn ialeit bad nga. Ki donhok aiu ba kin rai ne tuklar maki halor ka shongkha shongman ka khun jongphi ? Ia phi ia ngin ialeit, ngan pynkren manga.” La pynshit ka Tilda.

“Phi te kaba shu bam jakhluit palat. Iathuh shuwa seh balei ? Lada dei ban ialeit yn sa ialeit.” La ong ka Melinda.

“Don ki jingjia bad ki por kiba dei ban bam jakhluit. Ban shu ia bam jajah than kum maphi pat ruh duh sa ki kam ki jam baroh bad shah



kheĩñ ksew kat haba don. Phi te imat ym dei tang ba phi bam jajah, phi bam ja tam ja kyntait ruh artat. Mynhyonin ka sngi u la wan uto u Rai na shiliang um. Ha ka jingshisha u mut ban wan sha phi, hynrei phim iadon briew ha ñng bad kumta u la wan rung noh ha ñng jongngi. Hadien ba la iakren ia khana shipor lang ban i mei, u la iathuh iangi ba u la ithuh ithaw bha bad ka Mina bad ki ju sngewtynnat haba ki iakynduh ha iew ha hat. Phi kymkaw em ia kato shisien ba la ia bna haw ?”

“Hooið” La juban ka Melinda.

“Ki la iadon jingmut iwei ia iwei bad ki mut hi ba kin da ri iala ka burom haduh ban da ia poi ja poi doh. Hynrei haba u la phah iakren bad i San Tngen shaphang kata lyngba uwei na ki kñi jongu, i la shu ong beit ba im suk. U bah heh lei ki ong u la beh noh ia u da ki ktien kiba khor.”

“Balei ki leit leh bieit kumta mo ? Khat ei te ki la dei ban da iakren keiñ. Sngewlyngngoh ym dei ?”

“Phi ong lei kumta ? Kin don hok aiu ba kin iakren ia tuklar maki shaphang kata ? Ki dei kiei ? Sngewdei hi ba maki kin wan ia tuklar ? Kin tip hi phi ki kmie ki kpa phin iasngew kumno ? U Rai te u la iathuh ba u la ia don ktien bad ka Mina shaphang kata. Katba sngewthuh na ki jingken bad jingiathuh jongu te la eh

ban pyniakhlad iaki bad lada leh kumta lah ban poi shaba lyngngoh pynban." La kren pynheh ka Tilda. "Kum u Rai uba la bna ka nam ba bha ha kane ka dong baroh kawei yn ioh naci ? U la biang nadong shadong. Sngew lyngngoh pynban keiñ ba u don jingmut ia ka Mina bapli." La ban ktien biang ka Tilda.

"U Rai um dei u pyrsa i kong Dring ?"

"Hoooid, hynrei kan pher aiu kata ?

"Em, shu sngew kumno keiñ ba ka la jia kumto."

"Wow, kan leit iadei bynta aiu bad u bapli u bymtip ia ka bneng ka khyndew. Ila kato ka por leiu dang khyllung. Wat manga ruh ngam pat sngewthuh ei ei. Phi tharai u la nang ban ia sylla sniew lang ? Ia ki kam sniew ki kñi lah ban kit ki pyrsa ? Yn ia bat noh sa ia kam kaba la palat arphew snem te katno snem ngin ia im ha kane ka pyrthei ? Kaba la leit, ai kan leit."

"Em Phi i na ka bynta kato ka jingjia sngew-wit hi keiñ ba ka la don ka jingbym ia sngew-tynnad shuh hapdeng jongki bad jongngi."

"Kato ka dei ka kam jongki bad kam don jingiadei ei ei bad ngi. Ka dei ka kam jong ka Tngen ym ka jong ka Sara, phim sngewthuh ? O tang na ka bynta ka jingjia kawei ar yn ia pynbit thit noh ia ka jait ka khong baroh kawei ? Namar ba kim iasuk maki, kamut mangi ruh ngim iabit poikha poiman shuh ? Mano ban tip lehse i kong Khuri i leit nohiap hi kumba don kiba suba"?

Mar kumta la wan rung noh ka Mina bad ki la ia sngap noh shaphang kata-

“Shano kumne ? De kane mynta ka la i samla bha ?” La ong ka Tilda ka da peit sha ka Mina bad sa phai noh sha ka Melinda, ka da khapprip khmat artat kum ban pyni haka ba kan peitkai kumno kan pynshad shriei ia ka Mina.

Ka Melinda ka la shu wiat samrkhie.

Ka Mina ka la ithuh ia ka rukom peit khmat ba iamir jingmut jongki bad ka la sngewpher. Hynrei ka la leh kum bym bna ei ei.

“Ka la i sngaid i plung jkur jkur bad la ilub bha mo kane ka Mina mynta. Kumno, ym shym don ba phah kylli mano mano ?” La leh myn kren biria ka Tilda.

Ka Mina ka la sdang ban saw kyrang bad ka Melinda ka la shu wiat.

“Kane te kaba tipsngi shisha phi mo ? Kat kane ruh ka dang shong samla kynthun. Peit kito kiba ia ryngkat rta bad ka, baroh ki la iadon khun don kti lut. Balei mo katta ruh ym don ba phah kylli ia kane ?” La ong ka Tilda ka da phai sha ka Melinda.

“Imat nga bit tipsngi iaphi te nahduh. Haba phi katne ka rta ruh phi dang shong samla, yn

iakren lei sa ianga kaba dang hynnin." La kynthoh ka Mina kaba sngew shrai ba ka shah kren kumta tang shu rung bad kawei ruh kam da sngewtynnai ia ka Tilda kaba stang thylliej bliap bliap bad im tang ka iapiet brierw.

Ka Tilda ka la jnang khak namar u khnam uba ka thew ban siat ia kiwei mynta u phai kylla sha lade. Namar ba ka kwah ban khroh ia ka Mina, kam kwah ban tim ban tla iaka ioh pulom noh. Ban da dei ha kiwei pat ki por te ym long iakren shuh.

"Ianga te ynnai ia ong pha. Nga la thait. Ki phah kylli tang kiba ngam i mon bad ki bym i ler suda katba tang uwei ruh uba nga imon ruh um iaphah kylli. Kum iangi kine te u iatieng pha u shynrang ioh kylla long ialade kum ka fiangthangdoh. U fasian ho, ioh pha mut u iabieit. Tang ba kane ka shyllang phylluit te pha wat uba matlah ruh tang shu tba u la ia her krad pha." La kren biria ka Tilda.

"Shi phi katne ka dur la kat ka Herimai ruh phi kren kumta. La iah kren pynroh arsap lem sa ka Mina.

"Um ju iapeit tang ia ka dur ho, ioh pha ia sngewthuh bakla, ym dei tang ka dur kaba iaid dor. Ka sur ruh kaba donkam. Ka dur jongnga ka lah ban biang hynrei uba iohsngew ia ka sur te u un iaklet yn da ia ibha uba la ibit ruh kwah uba kham bit. Imat dei ba nga thaw

shong kumne artat imat. Hynrei ha ka por ba nga dang kat pha uba ibha suda. Wow ba u iaswait la kum ki khlieng ki tyngab ia ka dohtir ba wah ha u sainar. Mynta rat shano u iajah ? Tang la sdang hi ban lip ka rong la eh. Pha ruh peit ioh pha long kum manga ho tun. Pha la san pha la samla pha dei ban phikir bha." La ong ka Tilda. Peit ioh ia pyllait ia u briew uba bit ba biang bad uba iadon jingmut. La pyrshang ban ktik ia ka jingmut jongka ? "Ym don ba phah kylli shisha seh kong ia kane ?" Ka la kylli biang ia ka Melinda.

"Tip seh, kylli hi na ka keiñ. Mynta u ju iawan kylli hi na ing ? U ia kylli hi ha lynti syngkieñ ynda la iadep ia kylli bad ia jubab bad iabnoh bha u sa iawan leh myn kylli na ing keiñ. Hynrei kam dei ba ki kylli shisha, ka shu long ba ki pyndep rukom. Lada ki kmie ki kpa ki mynjur ne kim mynjur ruh kan wan hajuh. Kiba sngewthuh ia kata te wei ba la phah kylli kim banse ben shu mynjur beit. Ban leit khang te keiñ noh ki la iapoi sha khlaw beit beit." La ong ka Melinda.

Nga te ngam lah ngeit shuh phi ban ym don ba itynn timer bad don jingmut kat ia kane jkui jkui. Peit na ka dur, ka ryngieng ryngiot, ka sniehdoh, ka meit ka phad ne naei yn ong ? Nga tharai la bhabriew eh kane ka Mina phi na ka kpoh i Meirad baroh. Wat ha shnong ruh nga tharai ka bha briew eh kane. Wat ka Ailin ka khuu ka Mir ruh kaba la ia nam bhabriew, kan leit kot shano kat kane ka Mina ?" La kren pynroh ka Tilda bad ka da long ruh kumta." Pha da leh

tip sngi ho tun. Lada don uba iaphah kylli ne uba pha la iaiaid iaieng sa da iathuh keiñ pha ha la ka kmie bad da wan ialam ha iag ha sem. Peit ho ioh pha iaiaid lyndet iaide sangem te ym long." Ka la sneng. "U briew uba bha bad don ka jingmut ba shisha um ju lehrain, u da kynjoh ia ki ba haing ba basem kat kum ba dei ka burom ka akor bad ka rukom ka dustur." La siat phalang ka Tilda sha u Rai. "Nga te ba kan da iathoh kane ngan da ai uwei u sniang ruh ngam bynnud." Ka la pynkut.

Ka Mina ka la shong pynskhem ialade ha kata ka rukom ban kham paw ka jingbhabriew jongka. Ka mynsiem jongka ka la sdang ban khih, hynrei kam sngewlait ban ong ei ei wat la ka la wan khnang sha la ka kmie ban iathuh ei ei ha ka.

Ka Tilda ka la spei a ka jingmut jongka na ka rukom leh lynga jongka hynrei ka kwah ba kan da phla hi. La ka la ap katto katne por, ka Mina kam man i lait kren satia. Ka tieng ba ioh shu lehnohei ki jingpyrshang jongka bad kumta khnang ban kham kloi ka la sdang hi noh da lade.

"Peit shane Mina," La ong ka Tilda da ka sur kaba kham jem bad kham jai jai Balei phim iathuh ha ka kmie ia kiei kiei baroh. Don mano nat ban kham kor lait na ka kmie kaba pun kaba kha. Bareh ki briew ki la bna lut ia kato ka kam jongphi lait sa tang ka kmie. A sangpap ka bapli ha la ka shida, ym long kumba phi la fiwbein ia ka bapli ka kmie ?

Ka Mina ka la saw kyrang lain. Ka la shu sngap jar bad leh myn peit bad khlóng ia ki jaboh ba sop ha ki tyrsim jongka. Ka la mut ban ia-thuh noh hynrei kam sngew lait ang ka shyntur. Baroh arngut ki la shu ia peit iaka kum ban sngap ia ka jingiathuh jongka.

Ka Tilda kam sngewlah ban ap bad ka sngew ba dei ban pynshlur shuh shuh iaka. "Phi iadon jingmut bad u Kai ymdei?" ka la kylli syndon plak.

Ka Mina ka la shu sngap kum kaba kyl-lut. Ha kaba khatduh kala wiat muiñ da ki rymmiang shyntur kiba i ieit bad ka kohnguh nguk ka khlieh khlem da peit ne phai sha ki namar ka tip ba baroh arngut ki peit sha ka.

"I meirad Tngen i tip ne im tip ia kata?"

"I tip."

"I ong kumno ? Yn ia pynbeit noh ?"

"Pynbeit shano phi, i khang." La iathuh ka Mina, ka da khleh ka jingsngew babe kumno re.

"Balei, na kaei ka daw ?"

"I ong ba u dei na ka ing ba iadon daw ba sngewsih."

"To ieh lada kata ka jingkháng ban lapoi kha ka lah ban pynim biang ia i thei Khuri bad i khun jong ka, kata te sngew shonghok. Hynrei haba kam lah ban long kumta, balei yn khang

ia kiwei ? Ngi ialong la ka jong ka jong ka kpoh. Kumno ka jingjia ha ka kpoh jongka kan wan iabit thit bad ngi? U Rai te u long uba la bna nam ha ka jingbha ha baroh kane ka thain, nga sngewbynnud te ba ngin ia kyntait haba kane ka Mina khamtam ka don jingmut. Hooid shisha lada kane kam don jingmut lane um don jingmut iaka, kata ka long da kumwei pat. Are haba la ias dang sa ban iaiaid ia ieng ki bapli ki ki samla ha ka burom ka akor yn wan khang. Ki dei kiei eh?" La ong ka Tilda.

Ka Mina ka shem ba u rnga ding ka jingfeit ia uba ka la ialeh ban pynlip u dang sah ding bad ka Tilda kaba ithuh ia kata ka la sdang ban buh rnga shuh shuh bad pyrsad pho shi pho da ki nia muktia jongka.

Kat ban da iakut ka jingiakren, ka Mina ka la khiih pisa da ka jingrhem mynsiem shaphang u Rai, kaba ym lah shuh ban pynlip. Ka jingpyrkhat shaphang jong u ia kaba ka la jan-klet mynta ka la wan biang sa shisien bad katba ka nang pyrkhat katta ka nang pynlong iaka ban pyrkhat kham jylliew. Ka jingsngew ieit bad jingsngew burom jongka ia ka kmierad jongka ka Tngen ka la kylla sha ka jingisih, haba ka Tilda ka la batai ba ka jingleh jong ka kmierad kam dei satia namar ba ka ieit hynrei namar ba ka isih iaka.

Kum kita ki jingsngew ki la rung haka mynta, kiba iapher bad long da khongpong na kiei kiei kiba ka ju sngew bad pyrkhat ia ka ing ka Tngen. Ka Tilda haba ka la ithuh ia kata ka



la sngew hun ha lade ba ki jingthmu jongka kim shym long lehnohei. Shuwa ba kan leit nob ka la ong iaka Mina ba kan pyrkhath duriap hi bad lada ka donkam iaka, kan wan ha kano kano ka por.

Ka Tngen ka la ipher ia ki rukom leh ka Mina naduh kata ka janmied. Ka i pyrkhath jyl-liew kumno re. Kam smat ban iakren ia khana ne leh trai leh rop rop kumba ka ju leh. Ka bam ka dih ruh i kumba ka leh ngiah. Ka la leh hi lajan kum ka bym ju shong ju sah hangta. La ka kylli iaka, kam i kwah jubab bad hateng hateng ka jubab tbuk tbuk kumba jubab mynthi.

Katto katne taiew hadien, ka la bun tang ka leit sha ing ka kmie bad sha ing ka Tilda bad shait jah slem slem. Ka Tngen ka la suba ba la don ba pynshoi pynshad ia ka, hynrei kam pynpaw ei ei ia kata. Ka leh bha ban kren bha kumjuh bad ka iarap trei ia ki kam ing haba ka i ba ka Mina ka la ieh, khnang ba kita kiei kiei kin ym paw ha u Norin bad ha u kpa, hynrei kat ba ka nang leh kumta, ka Mina ka pyrkhath ba ka Tngen ka leh khnang leh mynthi ban pyni ba lada kam don maka ruh ka lah ban trei bad pyndep ia ki kam ing kam sem bad ka lah ruh ban long ba ka la khmih lynti ba ynda ka la sngew rem ne sngew lehrain kan sa shu phet hi sha ing ka kmie. Kumta ka jingsngew ka Mina ka la nang jngai nang jngai na ka kmie rad,

Hadien katto katne por ka Tngen ka la ioh khubor ba ka Mina ka la ia iaia ia ieng biang bad u Rai.

“Don kiba iathuh ba phi la sdang ban ia laid ia ieng biang bad u Rai. Hato kata ka long kaba shisha ? La kylli ka Tngen ia ka Mina ha kawei ka sngi.

“Ngam la sngewthuh hi ia la ka kam ? La jubab kyrtoh ka Mina kaba hapoh ka mynsiem ka la pun mynta da ka jingisih ia la ka kmierad u kparad bad ia la u kni.

Ka Tngen shipor kam nang kren ei ei shuh. Kata ka jubab ka Mina ka la long kumba thlieh da u pyrthat ka leilieh ia ka mynsiem jong ka.

“Balei phi long kumne Mina ? Mano ba hikai ia phi ban kren kumta ?”

“Nga long hi kein, mano ban wan hikai ?”

“Peit shane Mina, nga kren ia kiei kiei namar ba nga pyrkhat ia ka jingbha jongphi hi ym na ka bynta ialade. Phi la ju shong ju sah hangne bad wat la ngam dei ka kmierad trai kumba phi ia sngew hynrei nga la sngew hi kumba phi dei kumta. Ngam lah ban peit ne sngap ba phi iaiaid ia ieng bad u Rai namar nga tip ba kan ialam sha kaba phin iashong iasah bad phin jynjar hadien habud. Balei nga kren sniew iaphi haba nga ong kumta ? Un sngew kumno u kni lada un tip ? Ngam ong iaphi ba phin shong sah kumto, peit da uwei kein. Balei ym don samla shuh ha kane ka thain ? Ap shipor balei phin kyrkieh. Ka Por jongphi kaba dang kyrhai.”

Haba ka Tngen ka la kren ia kiei ki kyntien da ka sur kaba jem jai jai bad kaba sngewkhia, ka Mina ka la sngew babe halade ba kala kum kren khor ia ka. Kam lah khlem da sngew ieia ia ka kmierad ha kata ka khyllipmat kumba ka la ju sngew iaka ha ki por mynshwa.

“Lada phim kohnguh ia nga ruh, ngam lah ban pynbor iaphi tang ba phi dei ban sngewthuh ba u ia u Rai te ngam suk shisha” La ong ka kmierad bad ka leit noh artat sha kper.

Ka Mina ka shem ialade hapdeng artylli ki bor kiba khlain. Hooid baroh ar ki dei ki bor jong ka jingieit hynrei balei kan leit ialong pyrshah kawei ia kawei pat? Lada kan shim ia kawei ka thikna ba kan duh noh ia kawei pat. Ka jingieit jongka ia u Rai ka dawa ia ka jingiehnoh jongka ia ka jingieit ka Tngen bad ka jingieit jongka iaka Tngen ka dawa iaka ban iehnoh ia ka jingieit jongka ia u Rai. Ka kwah ban pynhun baroh arliang hynrei ka shem ba ka long kaba eh bad ka bymlah long hi ruh ban leh kumta. Ka mynsiem jongka ka sngew kumba kan pait, ka jabieng jongka ka sngew kumba kan bthet haba ka dem iai pyrkhath ia kata synia sngi. Tang ha ki khyndiat taiew, ka la sdang ban spud. Ka khmat ba i um jongka ka la sdang ban tyrkhong bad ki khmat jongka ki la sdang ban jylliew ha ki thliew khmat jongka. Ka la pep ban leit sha ing ka kmie bad sha ing ka Tilda, Hadien kata ka la pang bad thiah khop.

U Rai u la pisa bad lynga haba um shym fohi ne iakynduh shuh ia ka Mina. Man ki sngi lew ula khmih lynti ba kan wan lew ban iakyn-

duh iaka, hynrei lai lew ki la leit, ka khlem wan satia.

Ha kawei ka sngi iew ka Tilda ka la leit iew. Tang shu iohi iaka u Rai u la thap ha ba kham i duna briew bad u la leit shajan jongka.

"Phi wan iew?" La kylli u Rai ia ka Tilda.

"Hoooid, kumno? Balei phim ju wankai shuh"?

U Rai u kham sngew shlur da kata ka jing-kren ka Tilda "Nga mut ban wan kein". U la ong.

"I Mina i pang te mynta la lai saw taiew" La iathuh ka Tilda.

U Rai u la klet shipor ban sngewlem iaka Mina namar ba naduh ba ka jah iew u la nang pyrkhat ba ki ba ha iing ki la pyнкиar ne kim suk ia u kumba u tip ba ka long mynshuwa, u la sngewhun ba kam dei kumta kumba u la ju pyrkhat tieng.

"Sa wan seh, lano phin wan?"

U Rai u la sngew eh ban jubab. Ka jing ong jongu ba u mut ban leit sha shnong jongki ka long kaba u shu kum lait ka ktien la um shym don jingmut eh haduh katta katta. mynta ba ka Tilda ka la kylli ia ka sngi ba un leit, u shem ba um banse ban leit. U dei ban bat iala ka ktien kum u rangbah khamtam kum ha kine ki thep bad kawei ruh u dei ban pyini ba u sngew

kit khia na ka bynta ka Mina. Kumta u la ia pynbeit ba un leit ha ka ka sngi kaba bud.

Wat la ka la don ka jing bym da ia sngew-tynnat bha bad ka jingbym iashaniah shuh, pynban ka Tngen, u Norin bad u kpa jongu ki la ialeh katba don la ka bor ban sumar ia ka Mina. Kim pynpaw ia kano kano ka jingsngew pyrshah iaka hynrei kumba ki la leh ha ki por kiba mynshuwa ha ki por kiba ka dang rit ki pynpaw ia kajuh ka mynsiem mynta ruh. Kane ka nuksa babha kaba ki la pyni ka la sdang ban pynphai ia ka jingmut jingpyrkhat ka Mina ban sngew ieit sngewjan biang iaki. Wat la kam shym ong ei ei pynban hala ka jingmut ka la pyrkhat ban ym pynsngewsih iaki bad ban kiar noh syndon na u Rai uba kim suk.

Kumba la iakut, u Rai u la leit sha shnong ka Mina. Tang shu poi ha shnong u la leit wad shuwa ia ka Tilda. Ka Tilda hadien ba ka la ai sha ai dud bad iakren bad u katto katne ka la ialam ia u sha iing ka kmie jongka.

Ki la iashongkai lang tang khyndiat por hang ta bad hadien kata ki la ong ia u Rai ba un nangshong hangta ha kamra pdeng katba ma ki ki laia leit sha iing shetja. Hadien ba u Rai u la ap slem jlang ka Tilda ka sa wan rah sha ia u ba un dih.

“La slem mo? dih noh da kane ka sha ngin ialeit noh artat hangtei” La ong ka Tilda.

U Rai u la sngewthuh ba kin ialam ia u ha ing ka Tngen ka bym suk ia u ba un ia iaid

ia leng bad ka Mina bynrei u la poi ha u pud  
 uba um lah ban ong da kumwei pat lait sa tang  
 ban shu mynjur katba ki ia pynbeit bad shu  
 kyrmen ia kaei kaei kaba bha.

“Ka lah ban long ba kita ki jong i Meirad  
 Tngen bad u Ma ma Norin jongka ki la iasuk”  
 U la pynshngain ia lade.

Hadien shipor, baroh lai ngut ki la iamih  
 ban ialeit sha iing ka Tngen.

## XIII

Ka tngen ka dang ai jingbam sniang ha kyrpong ha ka por ba ki wan

Ka Mina kaba don ha baranda kam shym nud ban phah rung iaki hapoh ing namar ba ka iohi ia u Rai uba ka tip ba ka Tngen kam da sngewbha eh. "Aiu kan jia" Ka la pyrkhath tieng halade. Shisien pyrkhath ka la sngew dom ia u Rai ba u wan tur iap kumta hynrei haba ka iohi ia ka khmat ba i shongkun jongu bad haba ka pyrkhath ba ha kawei ka liang ka dei ka jing-ieth jongu iaka kaba la pynlong ia u ban thom bad ban tur da jing lui lui, ka mynsiem jongka ka la shu um hin lyhin da ka jingsngew ieth ia u

Ka Tngen haba ka la iohsngew ba don ha iakren ha baranda ka la rung sha ing bad wan peit na jingkhambah.

"Wa kine ki iawan shane ? Ale rung" Ka la kren pariah haba ka la iohi ia ki. Haba ka la iohi ia u Rai ka la sngew lyngngoh uei une u riew thymmai ki wan ialam "Uba i don burom uba i bha sat Imat ki la wan ialam da une mo ban ia pynithuh ithaw bad ka Mina. U dang lah une shiphew shah ban ia u Rai" Ka la pyrkhath ha lade. Kam pat ju ithuh mynno mynno ia u Rai bad ha ka jingmutdur jong ka ka sngew ba u long markhongpong bad une u briew uba don hakmat jongka mynta. Kam shym poi pyrkhath ba kin nud ban wan ialam kumta sha ing jongka ia u Rai uba ki la tip ba kam sngewbha eh,

Ki la iarung bad shong ha kamra pdeng. Ka Mina ka la sngew lyngngoh ia ka jingleh pariah ka kmierad jongka bad kam nang pyrkhat shuh la ka dei kaba naduh ka mynsiem ne ka shu lape nador da ka jingarsap. Katba ka sngewthuh na ki rukom kren rukom khana jongka mynshuwa, ka Tngen ka ithuh bha ia u Rai bad ka tip bha ia ka jinglong jong u, ba u long u brieu u bym long. Kumta ka ruh ka la shu ia-leh pariah lang.

Ka Tngen kam sngewdei ban shu kylli hak dak shaphang jong uta u samla namar ka sngew ba lada leh kumta u lah ban sngew mong ne sngew kumno kumno. Ka la iakren shuwa bad ka Melinda bad ka Tilda bad iathuh ia ka jingshitom ka Mina bad ki jingsumar ba ka la ioh. Ka la iathuh khana pynkjeh pynroh de iaka na ka bynta ka jingsngew tynnat uta u samla.

Ka Melinda bad khamtam ka Tilda kaba la buh lypa ka mynsiem ha khmut tang shu pher ka ktien ka thyllicj ki la shem ba ka long pynban da khongpong. Kim shym poi pyrkhat ei ei ba ka Tngen kan kren bha kren pariah kumta iaki khamtam haba ki iawan bad u Rai.

Ka Tngen ka la iasong bad ai ter ter ka da mut ba hamar ba poi ha uta u samla bad u tang shu shim ia u kwai kan kylli noh shaphang jongu.

“O khublei shibun eh meirad ngam ju bam kwai” u la ong da ka sur kaba jai jai bad kaba don akor,



“Phim ju bam?” La ong ka Tngen ka da wiat bad peit sha u. “Tang maphi u bym ju bam kwai nga dang lap mynta” Ka la pynbud khnang ban ym pynsngew nongwei ia u.

“Ngam ju mlien ban bam kwai namar naduh ba nga dang khynnah ngi shait shah mai ha i mei i pa bad haduh mynta ngam ju bam kwai ne dih sikret.” La iathuh u Rai.

“Kum phi te niar bin shem briew” La kynthoh ka Tngen ha ka jingbymtip. “Kı briew mynta hangne ha shnong te yn nai iakren kibà dang shitroh shitroh ruh ym tang ba ki bam kwai dih sikret, ki dih sa bad ka kiad de. Ka jinglong ki khynnah mynta ka ba i shyrkhei, haduh ban iasneng ia kraw ruh ym i long ym i lah shuh.”

“Ka dei shisha kumba nga pyrkhat, shish ba ngan da tip naduh mynshuwa ba ki la iasuk! I Ma ma imat i bakla ka rukom iakren ia khana Ban ong ba ki beh ia i te ngam lah ngeit” U la pyrkhat halade. U la sdang ban ia sngew tynnat bad ia pariah lang.

Ka Tngen ka la sngew tynnat ia u bad ka kwah ban tip noh udei u ei. Kumta ka la phai sha ka Melinda.

“O shisha ngam kynmaw, ine i dei i ei kumto?”

“I Rai kein.” La jubab ka Melinda.

Kumba dung u nampliang, ka Tngen kam sngew nang ong ei ei shuh. Ki jingmut jingpyrkhat jongka ki kylla ha kata ka khyllipmat bad kam lah shuh wat tang ban peit iaki, khlem kren shuh wat tang shi kyntien ruh, ka la ieng bad mih jyndet noh nangta.

Ka Tilda bad ka Melinda ki la sngewthuh mynta ba ka Tngen kam ithuh ia u Rai bad ka la nang kren pariah.

U Rai u la shu dum buit haba u shem ba ka-ei kaba u la pyrkhat kam dei satia kaba shisha.

Ka Mina ka sngewthuh kumba sngewthuh ka kmie bad ka Tilda. Ka la poi ha ka khim kaba kam nang shuh kumno kan leh. Ka sha ka ba ka la tiew da ka jingphah ka Tngen ka la thnam phuk shi phuk bad suit shaw shi shaw ia ka ding. La pynbor iaki ban iadih sha bad ki la iabuh jingmut ban iadih sha namar ba la leit tiew bad ka la thnam. Ha kata ka jingkylla kynsan jong ka mynsiem jong ka jingiashongkai, bad haba ka kmierad ka la phet noh kumta, ka la sngew kulmar jingmut shikatdei eh. Pisa ba kan leit thied jingbam ruh kam don. Kumno kan theh sha iaki bad khamtam ia u Rai, khlem don jingbam ei ei?

Shipor ki la shu iapeit iwei ia iwei namar kim sngew nang shuh ban pyniabiang ia kata ka jingkylla ba kynsan jong ka jingia shongkai. Khatduh ia kata ka jingduna la lah ban pynbiang da kawei ka buit bad kata ka long da ka jingia-wiat samrkhie ba ia sngewthuh jingmut kumno

re iwei ia iwei.

Ka Mina ka la shu sngap noh kumta shaphang kata ka sha kaba ki la tyrwa. Ka shangkwa bad ki kwai kiba ka Tngen ka la thlich lypa ban iabam ynda la dep dihsha ka la shu sah hangta ha juh khlem don ba nud ban ktah.

Ka Tilda ka la skuin haduh katta ia kata ka jingleh bym khein briew ka Tngen iaki. Hynrei ka la shu kun hapoh lade ba ka sngewbieit ban ia ong ei ei namar ba u don u Rai.

Ki la iashongkai satang shipor bad hadien kata ka la ialeit noh.

“Ia Mina ngin ialeit hangthie ha ing ka kmie.” La kren jam ka Tilda khnang ba kan da iohsngew ka Tngen ruh”

“Ngan sa wan la shibit” La jubab ka Mina. Kam sngewdei ban shu mynjur hangta hangta namar ka pyrkhata ia ka jingsngew ka Tngen.

“Ia pha tang jing jang, sa wan noh keifi. Sa wan pyndep la ki kam ki jam.” La ong biang ka Tilda.

Kumta ka Mina ka la iabud lang noh laki da kaba pyrkhata ba kan wanphai noh kloia katba lah ban ym pynkhia than ia ka ka jingsngewsih ka kmierad jongka.

Ynda ka pol ha ing ka kmie, ka Mina ka la hap ban khreh sha katba ka Tilda bad ka Me-

*linda ki dang iakren ia shongkai bad u Rai Hadien ba ki la iadep dihsha ki sa ia shongkai lang.*

Ka Mina kam sngewthuh sngewthaw ia katta ka jingiashongkai namar ka jingmut jingpyrkhat jongka ki kham her sha ka Tngen namar ka tip ba ka don hpdeng ka jingsngewsih. Kam sngew nang shuh ban leh pariah ia u Rai wat la ka lah ban pyni ba ka sngewtynnat ia ka jingwan jongu.

Hadien ba u Rai u la leitnoh ki la ia shongkai satang baroh laingut.

“Balei i san Tngen i leh kumto? Shish la paw bieit khait khamtam hakhmat u briew. Katto te la shah thad ka longing longsem jongngi baroh. Ka jingleh bieit kaba nga la i skuin tang ba nga shu map” La ong ka Tilda.

“Hooi kein.” La mynjur ka Melinda “Ynda long kumno kumno ruh ym dei kein ban da pynpaw kumto.”

“U mat thad seh lada u thad.” La ong ka Mina kaba sngew dom ia u Rai namar kat kum ka jingkren jongki ka sngew kumba un thad shisha. “U briew u ban dang thad ia ka long ing long sem kiwei kum ka kynthei um dei u ba bha.” Ka la ong biang.

Ka Tilda ka la ialeh ban khun katba lah ia ka Mina ban iamir jingmut bad ki bad kata ka long ban isih ia ka Tngen. Hynrei ka shem ba kata ka long kaba eh shibun. Khatduh ka la kylli ia ka Mina.

"Phin leh kumno shibit haba i rad i la leh kumto?"

"Ngan leh kumno? Ngan shu sngap kein."

"Jia ba i beh, phan leh kumno?"

"Lada i beh te ngan hap phet kein."

"Khlem pep in beh iapha, sa peit ne tip phan da ioh iuh kjat tang ha phyllaw ne pham ioh. Pha sngewthuh em ba i shun iapha? Lada i ieit iapha te balei in pynlehrain iapha kumto?"

Ka Mina ka thap sngewdei ia kata ka jing-kren ka Tilda. "Ka lah ban long." Ka la ong ha lade.

"Lada i beh ne i kren bym mon kumno kumno, wan phet beit sha la ka kmie." La ong ka Tilda kumba ka tip ia ka jingpyrkhat ka Mina. "To lada in tip sa i bah in leh kumno iapha?"

Ka Mina kam shym poi.kynmaw ia u Norin. Kata ka jingong ka Tilda ka la pynkynmaw ia kata ha ka bad ka la sngewtieng ioh un dom shisha iaka.

Ka por ka la nangiaid bad kumta ka Tngen ka la wan it iaka ka da mut ban kren artat ia ka Melinda balei ba ka wan ialam kumta ia u Rai.

"Balei phi shong sah katta.? La kylli ka Tngen ia ka Mina. Ka Mina kam nang jubab si.ei., Ka la suh sngap bad mut h i ban leitnoh.

"Balei haba ka wan sha ñng ka kmie lajong ruh ym bit?" La kem ktien ka Tilda.

"Mano ba ong ymbit? Dei ban da tip ia ka por. "Phi pat Melin balei phi wan ialam kumto sha ñng jongngi ia uto u Rai?" La kylli ka Tngen kaba nang pyrkhat ba ka Melinda ka dang long kumjuh kum mynshuwa.

"Nga ka kmie phi tharai ngan ym sngewthuh ia kaei kaba nga leh?" La jubab ka Melinda.

Ka Tngen ka la kyndit katlah kat iai haba ka la iohsngew ia kata ka jubab kaba ka khlem khmih lynti ei ei ba kan mih na ka shyntur ka Melinda. Ka la sngewthuh shai ba ka Melinda kam sngewtynnatt shuh iaka.

"Haba u wan na ka bynta ka Mina bad ka Mina ka don bad phi shatei te ym wan ialam heit?" La ban ktien ka Tilda. "Phi kaba long shirukom. Haba wan ki briew da ka burom ka akor, phi leh pynpoh dor. Poh iano? Poh ialade. Thad iano? Thad ialade. Balei u Rai u long uba poh haduh katno eh?"

"Ngam ong ba u poh. Nga ong ba ngi la iadon daw ba sngewsih." La ong ka Tngen.

"Phi iadon daw bad u Rai? Ani wow! uleh aiu iaphi?

"Na ka daw ka Khuri kein."

“Ka daw ka Khuri kan iadei aiu bad ka Mina?”

“Ka Shu long kumta kein hynrei ka Mina te kan iadon daw aiu?”

Ka Tilda ka shem ba ka la ioh ia ka kabu ban khyrwait ia la ka kmei san ka bym nang ban pynphai ktien.

“Te phi ia sngewthuh aiu ban khang iaki ba kin iaiaid iaieng haba ki leh kumta da ka burom ka akor? Khlem da kynjoh ktien shu khlem da khein briew shuh ia kane ka kmie kaba kha kaba pun bad ia u kpa uba ai ia ka longrynieng, phi iatuklar maphi, kumno phi ia nud?”

Ka Melinda ka la babe halade ba ka la kum kren da ki ktien kiba khor ia ka Tngen. Ka Mina ka ba tip ia ka jinglong jai jai bad jinglong lui lui ka kmierad, ka la isynei iaka haba ka shah kren kumta ha ka Tilda. Ka sngew ba ka Tilda ka la kren palat ia ka bapli.

“Haba kane ka Mina ka shong bad ngi bad ba ki wan shangi te ym ia tuklar heit? Ban da dei ba kam shong bad ngi te ngin ia tuklar lei?”  
“La ong ka Tngen.

“O tang shu shong kai shipor arpor phin tuklar noh maphi ia ka jingim jongka shi lynter? Phi la thied mraw duh ia ka?”

**Ka Tngen ka sngew salia ban iamai bad kam** ju nang hi ruh ban ialeh kumta, ka la sñiem ialade ha ka kut lad. Ngam shym wan hangne ban iamai, nga wan ban wad ia ka Mina. Haba ka don hangne bad phi iaong kumta te ka la biang yn nai iabun ktien shuh." Ka la ong bad ka la phai ban leit noh.

"La biang kein. Haba la ioh pynlehrain te ym la biang? Ban da ioh pynpulom lei te la nang biang shuh shuh." La kynthoh ka Tilda.

Ka Tngen ka la leh kum ba khlem ioh sngew ia kata ka jingkynthoh jong ka Tilda. Ka la phai sha ka Mina. "Peit shane Mina, sa pyrkhat hi. Ngam kwah ban pynbor ia phi. Hynrei kumba nga la ju ong, ba phin iaiaid bad u Rai haba phi shong bad ngi te ngim sngewbha." La ong ka Tngen bad ka la leit noh artat.

**Ka Mina ka la pynbud la ki khmat sha** ka Tngen katba ka nang iaaid da ka jingsngewsih bad jingsngewlem. Ka la mut ban bud noh nadien jongka hynrei ka sngew kumno re kumba kam khein ia la ka kmie bad ia ka Tilda. Kumta ka la shong noh shuwa.

"Peit phi i, bad ka ong ym don daw ei ei bad ka khang ia kiwei, phi iapei hi haba kumta? Kine ki briew kiba la jia jingjia khylah ha la ing la sem ki la long da kawei pat ka jingmut jingpyrkhat. Ki long tharai sniew lynter ia kiwei nalor kata kim lah peit ba ki-



wei kin shem bha. Ban leit don kum kito tang shiphew ngut la klumar ka pyrthei baroh kawei." La ong ka Tilda.

Baroh arngut bad kmie bad khun ki la shu ia ang katba ka Tilda ka kren khlem sangeh haduh ban da poi ka por janmied.

U kpa ka Mina u leit bylla sha bar shnong bad u wan tang shisien shi taiew. Ki para jong ka ki dang byrngia ka ialehkai. Kumta ki la ioh ban ia kren katba mon khlem don ba pynthut.

Ka Melinda ka la shet ja lang ia ka Mina bad ia ka Tilda ba kin iabam jamied noh hangta.

"Ngan leit noh shuwa" La ong ka Mina tang mar shu iasep ka sngi.

"Wow kane kaba la kyndeh sat. Phan leit leh aiu? Pha tharai kan dang leh sboh shuh ia pha? Ioh ka la kmen ba pha la wan shane te hooid. Shi eh pha leit pynpoh. Lada ka sngew ieit kan sa wan iit biang kein pha. Na kata ka lah ban sngewthuh. Lada ka wan iit ruh dei ban leh kum bym kwah bym mon, hangta te ka lah ban khroh iapha bad phan sa ioh kat kaba pha kwah."

"Ngan shu leit kein, ngan shu kren ia i, lada i ong kumno kumno te ngan sa wan shane. Sngewbieit ban shu jah khlem da ioh ban kren." La ong ka Mina kaba sngewthuh ia ka jinglong jai jai bad jingsngewsih ka Tngen.

To ngin da ia bam shuwa pha sa leit la ong ka Melinda. Ka Mina ka la sngew eh ban ong ei ei ia ka kmie bad kumta ki la iabam shuwa.

Kat ban da dep bam, ka jingdum ka la tap.

Ka Tngen ka la ap ba ka Mina kan wan phai hynrei kam man wan satia.' Ki la pynshoi pyushad ia ka khynnah bapli." Ka la ong ha lade. U Norin bad u kpa ki la wan ynda la kham mied bad ka Tngen ka la iathuh ha ki ia kaba la jia baroh.

"Ngan leit" La ong u Norin.

"Kam myntoi, phi dei ban sngewthuh ba ngim donbor ei ei ruh em, ka la don la ka kmie, ka kmierad trai bad ki kmienah kmiesan trai, balei ngin leit ia mushlia ma ngi. Lada ma ki ki iabeit ki iasuk ngin leh aiu mangi." La khroh ka Tngen ia u Norin.

Kumta u Norin u la thiah noh bad ka Tngen bad u kpa ruh hadien katto katne por ki la ialeit thiah noh.

Naduh kata ka Mina ka khlem wan shuh bad kam ju leit iuh kjat shuh ha iing jongki. Ym slem hadien, kiba iadei na ka kpoh ka Sara bad ki shongkha ki la ia lum bad pynbeit ia kiei kiei kiba iadei bad ka jingiapoikha poi man ka Mina bad u Rai. Toi ki la dei ban khot lem ia ka Tngen, ia u Norin bad ia u kpa u Norin kiba la ju ri ju sumar

iaaka, hynrei ki tip ba kin shu long tang ki maw jynthut bad kumta kim shym iawer ne ong ei ei ia ki.

La pynbeit ia ka sngi ban kyntiew kurim bad la iawer briew. Ia ki jong ka Tngen ruh la shu iawer pyndep rukom kum ia kiwei pat.

Ka Tngen ka la don ha ki sngi ka jinglong tymmen jongka. Ka rta jongka ka la long kumba hynriew phew snem tam. Ki para ba ia ryngkat rta bad ka, ki dang iashait ia khlain bad dang lah ban leit ium leit wah. Hynrei maka pat la bun ba ka la shu shong ha ing bad shu trei kper trei phrah katba lah ei.

Ka daw jong ka jingring tymmen kloï bad jinghiar jingtroin ha ka met ka phad jongka ka long namar ka jingsngewsih bad jingklusai. Wat la palat arphew ki snem ki la iaïd hynrei ka jingpyrkhat jongka ia kata ka jingjia ba kthang ha ka ing ka sem jongka ka sah thym-mai. Ki ummat jongka ki dang kyrsoi bad tuid kumjuh wat haduh kita ki por jong ka jinglong tymmen jongka Baroh ki jingpyntngen bad ki kyntien pynshngain jong kiwei, kim lah suh thied ei ei ha ka, bad ka por kam shym la lah ban pynkhiah ne sopspain ia ka dohnud ba la pait jongka.

Haba ka Mina ka dang shong dang sah bad ki, ka la sngew myllen hateng hateng. Hynrei hadien ka jingphet noh jongka, bad ka jingshah kren sniew jongki hala ki ba haing hasem bad

ka jingleh bym khein briew jongki iaka, kam lah khlem da phai biang ban pyrkhat kham jylliew ia kito ki por bad ki sngi da ka jingpait dohnud.

“Baroh ki shu long lehnohei” Ka la ong halade.

La niew ia ka ñng jongka kum ka ñng iap tyrut bad ñng iap duh. Baroh ki la sdang ban leh jngai iaka bad ka tip ba ka por kan poi ha kaba kum ki pukni kin wan her ban bam duh ia ka spah ka hajar jongka ynda u kain iong u la put shawiang ban pynbna haki ba ka pateng jong ka Tngen kala kut la wai.

“Ka long kaba eh ban pyrkhat ba ki la iap haba ym shym iohi bad ioh thang ioh tep ia ki met iap jongki. hoodid ki sabut ki pyni shai ba ki la iap hynrei balei ka don ka jingsngewwit ha ka mynsiem jongnga ? “Ka la ong halade.

Ka jingduh jongka iala ka khun kynthei marwei bad iala ka ksiew ka long ka jingduh ka bym lah ban thew ne khein dor namar ka la duh ia ki nonghiarpateng bad nongmih bteng na ka kpoh jongka. Myntoi aiu ka spah ka hajar, myntoi aiu ka pyrthei baroh kawei haba ym don ki ban ioh pateng ia ki nala ka kpoh.

Haba ka phai sha ka Sara ka para jongka, kam lah khlem da jawdud ia ka kupar jongka ba na ka kpoh jongka la iaroi parum pareh. Ka ñng ka sem jongka ka i shngain i kmen lynter.

Teng teng ki jingshong kurim, teng teng ki khawai sngikha teng teng ki jing Pynbaptis bad man ka por ki shu shah khot sha kum kline ki jingkhawai khlem iohlad ban khot lem iaki wat tang shisien ruh lait tang haba ka dang don ka Mina. Wat la da dei makna na ing ka para bad ki khun ki pyrsa lajong ruh ka don hi kata ka jingbym da sngew trai. Hooiid kiba khot Me san kito, kiba khot kiaw kito, kiba khot Meirad. kiba khot Meikha ruh kito. Hynrei kam da sngew snoh than namar kim dei laki jong bad ka tip ruh ba ki sngew kumjuh shaphang jongka.

Haba ka phai shala ka kupar, ka spah ka hajar ka rupa kaba don. U Norin uba heh ka khih ka kamai u wanrah u wan ai buk buk ha ka um ju lehkai ne pynlut kai. Kim lah shuh ban pyndonkam bad kaba bun na kata ka kamai ki la hap ban shu pynlang. Myntoi aiu kein kine ki jingtrei shitom bad jingloh jongki baroh? Iano kin pynlang? Ki jongno kin long ynda ialade kim don shuh? Ka kynmaw ba shisien ka la pyni ia ka Mina ia kita baroh bad kular ban ai haka lada ka kohnguh iaki bad sumar iaki ha ki sngi ki jinglong tymmen jongki. Ha kata ka por kala kohngnh. Kam sngew lah mutdur ba ka kloj ban iehnoh ia kita kiei kiei baroh tang na ka bynta ba kim suk bad sngewtynnai ka ban iapoi kurim bad u briew uba na ka ing ba la iadon daw sngewsih teng.

Haba ka phai sha u Norin. kam lah khlem da sngew sarong ia lade kum ka kmie u sing. Ym pat ju don ka kmie hangta ha shnong ne ha ki shnong ba marjan katba ka tip ka bala sei uwei kum ma u. Ym don ba ia ryngkat bad u ha ka rynieng ryniat, ha ka met ka phad, ha ka jingkhlain, ki jingsmat jingsting bad jirgnang ha kakhih ka kamai. Dei ka jingdon jong u kaba la pynshngain ia ka ing ka sem bad ym don ba nud ban kren thala ne leh thala ia ka ing ka sem jong ki. Hynrei u long uba shida bad uba lui lui uba beit bad shisur ka jingmut jingpyrkhat, uba tip burom tip akor. U tip la ki ba haing ba hasem bad u beh u rap ha ki shitom shipa jongki. Pynban kim i khein ne bnrom satia ia u.

“Ah u khun bapli, kumno ka lawei jong u kan long? Ka ju ong ha lade haba ka pyrkhat ia kita kiei kiei.

Bun bun sien ka la kren khroh ia u ba un shong kurim noh katba ka por ka dang biang ba un ioh la ki khun ki kti ki ban ri ban sumar ia u. Da kata ka jingmut ki la pynjuh ia kawei ka samla kaba kyrteng ka Shaimon. Ka Shaimon ka ju wan ju leit bad teng teng ka ju wan iarap kam ia ki. Wat la katta ruh u Norin um i patiw, u shu leh paralok parajor ia kum ba long lem ia kiwei kiwei.

Ka Shaimon ka long ka Samla kaba ilub, kaba jai jai bad kaba tip burom tip akor. Ka dei ruh na ka ing kaba bha. Ka Tngen ka la iap mat pyrsa kurim eh iaka bad katno ka kwah ba u Norin un iapoi kha bad ka bad ba kin iaioh la ki khun ki kti. Ka sngewthuh ba ki khun u Norin lada u ioh, kim dei na ka jait jongka, hynrei pher aiu kata? Ka ieit ia u Norin bad ia ka Shaimon palat ban ia-la ki para ki khun arkmie bad kawei ruh, ki khun u Norin kin dei ki symbai ka syngkai jongka. Kan dang kham sngewtra i pynban ia ki namar kin dei na ka pateng jongka.

Kat haba ka ia shongkai bad ki paralok parajor, ka Tngen ka ju kren bynniaw iala ka jingshem bad haba ka pyrkhat ia ka jing-iap tyrut jongka Khuri bad i khun ia kiba ym shym la ioh shuh ia ki met iap jongki ka la ju pynkut da kaba ong "Ka pateng jong nga te ka dei ka pateng ba la jah.



U Battle Field u la jnang khak ka mynsiem haba u kpa u la ong ia u ba u dei ban leit pyn-tbit shuwa ia lade sha dkhar khnang ba un kham bit kham biang shuh shuh ka kyrdan. U la nangkyrmen ba kin phah trei noh da kata ka kam ba u la ioh bad ban iapynbeit noh ia ka jingiapoikha jongu bad ka Brillian, hynrei katba u peit i kumba ki kmie ki kpa jongu ki la thap leh klet ia kata ka bynta. Hynrei u tip ba um banse ban kohnguh iaki bad ban leh ia kaei kaba ki kwah.

Ka mynsiem jongu ka la her sha ka Brillian, haba u pyrkhat iaka jinglong ba marwei jongka. U kynmaw iaka dur bad ka rynieng ba i-ieit jongka ia kaba yn ym lah shuh ban iohi katto katne por. U kynmaw iaki kyn-tien jingieit kiba ki la iakhlei markylliang.

Ha kawei ka sngi u la iathuh ia kata ha ka Brillian. Ka Brillian wat la ka sngewbynnud ba un jah kumta katto katne por na ka jing-iohi jongka. Ka la pynshlur ia u ba un leit bad kohnguh iala ki kmie ki kpa namar ka dei na ka bynta ka jingbha jongu hi.

Shisngi shuwa ba u Battle Field un leit, kine ki shijur ki la iakynduh ha Nanpalok. Ki la lashong ha trai uwei u diengkseh uba ki tnat bad ki sla jongu ki kah tngen iaki na ka jingshit ka sngi. Ki syntiew bun jait ha la ki rukom bad ki rong bapher bapher ki phuh itynnat bad ka jingbeh jai jai jong ka lyer ka pyinkbih iaki



kumba ki shad, kaweh kti bad kohnguh khlieh. Teng teng ki sim ki wan dem bad pah na ki tnat jong uta u dieng kseh bad na ki dieng rit kiba hajan ki da peit sha ki kumba ki tip ia ki jngmut jongki. Ka um hangta hakhmat jongki ka i jai jai bad kynjah jar bad ka jingbeh ka lyer ka pynkhih khrip khrip iaka. Hateng hateng ki dohkha kiba wad jingbam na sla um ki pynkbihi phur phur iaka.

Ym lah ban thew ne batai katno ka jingkhia ka jingmut jingpyrkhat jongki. Ka jinglong ka mariang bad ka jingiaddon jongki marsyndah, ka pynlong ia ki ban sngew kumba ki don ha ka Eden ba arngut. Hynrei ka jingpyrkhat ia ka jingiakhlad bad ka jingia jngai jongki iwei na iwei ka ban sa wan shen, ka la pynlong ia ki ban sngew kumba ki don ha rngai. Ka jingsngewtynnat bad jingsngew pangnud kaba iakhleh lang bad ka jingieit ba nylla iwei ia iwei ka pynsngew tym pang ia ki jingim jongki.

“Sa shongsuk hol!” Lashai ka la dei ka sngi ba ngan mih nangne “Kynmaw ia kiei kiei kiba ngi la iakren bad ai ba lada ngi iajngai ha ki met hynrei ki mynsiem kin nang iai jan tad haduh ngan da wan phai. Ngan ym klet iaphi baieit, ngan ym klet iaphi wat la nga don haei namar shibynta na ka jingim jongnga ka don bad phi.” La ong u Battle Field u da shim bad doh ia ki kti jongka.

“Phi ruh sa leit suk.” La ong ka Brillian.

“Shen kan poi ka por ba ngan wanphai bad ha kata ka por nga kyrmen ba ngan lap iaphi ba phi dang ap ianga.” La ong u Battle Field.

“Ngan iai ap ia ka jingwanphai jongphi kam pher katno slem nga dei ba ngan leh kumta namar nga tip ban kan poi shisien ka sngi. Ka jingwanphai jongphi kan wanrah ia ka jingsuk ka mynsiem bad jingkmien jingsngewbha ba kham kyrpang ha ka jingim jongnga, lada phi bat iala ki kular. Hynrei lada phi kylla kan long da khongpong.”

“Phi dang artatien mo ? ngam kwah ba u lyoh jong ka jing artatien un kali iaphi. Ah baieit wat pyrkhat artatien ei ei ia ka jingieit jongnga iaphi. Kumba ki wah ki tuid lynter sha ka duriaw kumta ruh ka jingieit bad ka jingmut jingpyrkhat jongnga kin tuid sha phi ha baroh ki saw aiom. U ngap u mih nala ka ksing ban leit wad ia ki um bathing na ki khlaw ki btap bad ki raieh raidam, hynrei la u leit jngai da ki phew phew mer pynban un wanphai bad la ki um bad ki syntiew ba dap ha ki pla jongu. Kumta ruh kan long bad nga. Tang shu wan-phai ngan wan her shano shaba phi don.”

Nga ngeit bad shaniah iaphi kumba nga ju long baroh shi katta bad nga tip ba phin ym iehnoh bein ianga, hynrei haba nga pyrkhat ia kane ka jingiajngai ba shipor jongngi iwei na iwei ka mynsiem jongnga ka sngew pisa bad ka dohnud jongnga ka pang. Ki jingjia bad ki

jingkylla ba bun jait ki lah ban wan kiba lah ban pynsator ia ka nongrim ka jingieit jongngi haba ngin iajngai bad ngim ia ioh ban ia phylliew mynsiem."

"Balei phi ong kumta ? Ki jingkylla ki lah ban wan, hynrei kumba nga la ong haphi ka jingieit jongnga iaphi kan iaid lyngba kita kiei kiei baroh ne ki jingkylla jong ki por bad ki aiom. Kam pher ci ei, ngin kyrmen ia kiei kiei kiba bha bad ngin buhti ia kiei kiei ha u Trai Kynrad uba iohi ianga bad iaphi ha kajuh ka por wat la ngim lah ban ia iohi iwei ia iwei. "La ong u Battle Field.

"Sa tang shipor arpor i Mei i la koit bad ngin sa leitphai noh sha shnong. Kata kan nang pynjngai shuh shuh iangi. Phi ha la ki jingpule bad nga pat ha la ka trei ka ktah, phi sha sor bah nga ha nongkyndong." La ong ka Brillian, la kata ka shulong tang ka jing-kren kaba kam shym sngewdonkam eh haba ka la pyrkhat hadien ba ka la dep kren.

"Brillian baieit ki lum ki wah bad ki duraw ki lah ban pyniakhlad tang ia ka met hynrei kim lah ban pyniakhlad ia ka jingieit. Ka jingdum jong ka mied ne ka jingjngai da ki hajar mer kim lah ban kah ia ka jingiohi jongngi iwei ia iwei da ki khmat ba sngur jong jingieit. Kynmaw baieit la ngi don hangno hangno ruh ngi iohi ia kajuh ka jingshai ka sngi. Lada phi iohi ia ka sagi, ia u bnai bad ia ki khlur, to tip ba nga iohi iaki." La ong u Battle Field.

“Sa tang kata kein baieit, ngin pynhun iala-de da kaba ngin iapeit iwei ia iwei satang da ki khmat ba kynja blei ka jingieit.” La ong ka Brillian.

“Phi kular em baieit ba phin ym shet shukor ianga?” Shu buh ha ka por ba ngam don, uwei pat un pyrshang ban tuh ia ka jingieit jongphi. Nga tieng ba ioh ka long kumta.” La ong u Battle Field.

“Phim dei ban tieng ei ei ia kata. Nga la khang tala ia ka jingieit jongphi ha ka kamra ba kyrpang jong ka dohnud jongnga bad nga la ai haphi ia u shabi. Dei tang maphi uba lah ban rung hangta. Ym don mano mano ruh ba lah ban rung bad lada don kiba pyrshang ban leh kumta kin shem ba kin ym ioh da lei lei ka jaka ban Phrung khlem da pynpait bad pynjot ia ka dohnud jongnga haduh ba kan ym long shuh kaba larkam ei ei iaki.” La ong ka Brillian da ka sur kaba khia.

U Battle Field u la puson shipor ia kitei ki kyntien jongka, u la peit shaka da ka jingdap miar ka mynsiem da ka jingsngewieit kaba ym lah ban batai. Da kaba eh bad hadien ba u la jyrhoh jyrhem ban pynkhuid ia la u ryndang, u sa lait ban kren. “Kumta ruh ka long bad nga baieit. Ka jing ieid jong nga ka don ha ka dohnud jongphi, ym don ba lah ban tuh iaka bad ia ka jingieit jongphi nga la khang tala hala ka dohnud. Ymdon ba lah banshim ia ka jingieit jongphi na nga lynda ki pynjot pynduh ia kane ka met jongnga. Kata kalong ka kular jongnga iaphi.”

Ki la iakren bun kiei kiei bad ka por ka la nang iaid. Ka por janmied ka la wan bad ki nong iaidkai ki la sdang ban dap. Hynrei kine ki shijur, ki don hala ka jong ka pyrthei jlang jlang khlem iohi ne iohsngew iano iano ruh.

Ka sngi ka la sep. Hadien shipor ki tyng-ab shikynhun kiba dang ialeit shala ki jaka thiah ki la wan her ban dem jahthait ha ki tnat jong uta u dieng kseh. Ym tip la ki iakren para maki ne ki dang ia kyuku kynkaw paralok ba la dei ka por ban ialeit noh, ne ka dei tang ka jinglong kaw kaw jongki kaba la pynlong ia kita ki tyngab ha u ta u dieng ban iapah jam "Ab" shi "Ab" bad iakyntiap na kawei ka tnat sha kawei pat;

Kata ka jingkaw kaw jongki ka lah ban pynsngew kyllut ia kiwei pat, hynrei ka long pynban kum ka jingwan kyrsiew ia ka Brilliant bad u Battle Field na ki thwei jingpyrkhat kiba ki la ngam jylliew ban pynsngew bad pyntip ha ki ia ka jingshisha ba ka la jan dei ka por ia ki ba kin ialeit noh nangta.

Ki tip ba ka don sa tang khyndiat ka por ba kin iadon ryngkat bad marsyndah iwei ia iwei. Ki tip ba ka don satang khyadiat eh ka por ba kin ioh ban iakren markhmat bad iohsngew da la ki shkor ia ka sur ba sngew-ieit ka jong iwei ia iwei pat. Sa tang khyndiat ka por ban ia phylliew markylliang ia ka umphniang ka jingieit jongki ban pyndap ba ka ding ka jingieit kan meh bad kan ym lip lyngba ki por bad ki aiom.

Ki kwah ban fashong sah hangta ban iaring mynsiew bad bam ia ka lyer ba pyngngad hir hir jong ka jingieit markylliang. I shi khyllipmat i long iba kordor haduh katta katta haki. Hynrei ah kin leh kumno? Ka don ka por ia kiei kiei baroh bad hadien katto katne ka la dei ka por ia ki ban ialeit noh nangta.

Ki la iaiaid suki jai bad iakren artat artat lynti tad haduh ba kin da iarung ha kawei ka dukan sha namar mynta ki la sdang ban iohsngew ia ka jingthngan bad jingsliang. Hadien ba ki ladep dihsa ki la iamih noh ban faleit sha Hospital. Kane ka long ka bynta kaba khatduh ba kin iaiaid ryngkat marsyndah bad kan shim por da ki taiew ki bnai bad ki snem ba kin dang iohlad ban leh kumta. Wat la ki la ia iaiaid suki katno katno ruh ki shem ba ka lynti ka kut kloi than. Haba ki la poi ha phalor ki tip ba ki la poi ha ka jaka ba kin iakhlad noh.

“Sa leitsuk leit sain baieit.” La ong ka Brillian da ka sur kaba kyih katba ki ummat ki tyllun na ki khmat jongka.

“Sa nang shongsuk shongsain haduh ba ngan da wanphai.” La ong u Battle Field.

Ki la iaieing hangta ha syndah jong ka kynroh ki da iabat pynskhem ki kti jong ki iwei ia iwei khlem nang ban pyllait. Khatduh haba kim iohi iano iano sawdong jongki

bad ka jingdum ka la kah na ka jingiohi jngai, u Battle Field u la kdup bad doh ia ka. Shi-por kim nang shuh ban ia pyllait. Ka la long ka jingdoh kaba nyngkong eh, ka ban iaisah jingkyrmaw ha ki jingim jongki, bad ka jingdoh ba nylla ba shlei da ka jingieit ba shisha bad ba khlem don ka jingarsap.

“Phim leit kren shuh ia i Mei ?” La ong ka Brillian.

“Nga thara! ka la biang, nga la kren hynne kumto. Donbok in khlain in shait noh bad sa pynai khublei ia i. Nga tang shu poi sha ka jaka ba ngan leit sah, ngan sa thoh bad pyntip shaphi ia kiei kiei baroh.”

“U Battle Field u la peit iaka na phalor katba ka nangiaid ban rung noh shapoh Hospital. Ka Brillian ruh ka la phaidien bun kylla ban peit ia u bad man ka por ba ka leh kumta ki iarah bad kaweh kti iwei ia iwei. Khatduh ka la poi ha jingkheng bad ka la ieng hangta shipor ban kaweh kti ia u bad ka sa rung noh shapoh. U Battle Field ruh da ka mynsiem kaba khia u la phai dien ban leit noh.

U Battle Field kumba u la kular, tang shu poi tiap, ka kam kaba nyngkong kaba u la leh tang shu ioh por ka long ban thoh sha ka Brillian. U la pyntip sha ka ba u la poi suk poi sain, wat la ki la don katto katne ki jingwit ha lynti. U la iathuh ia ka jinglong ka jaka sha dkhar ha kaba u leit sah bad.

katto katne shaphang ki briew kiba u dang ia kynduh shen. U la iathuh iaka ba u pyrkhath tang shaphang jongka barabor bad u khmih lynti hir hir ia ka sngi ba un wanphai noh sha'a ka jong ka ri bad ba kin iakynduh biang ha kaba kin ym iakhlad shuh.

Ka Brilliant ruh ka la thoh sha u ba ka sngewkmen ban tip ba u la poi suk poi sain. Ka la iathuh ha u ia ka jingsgew blaw bad jingsngewkynjah. Ka iathuh ia ka jinglong ka jingkoit jingkhiah ka kmie jongka bad ba ki la jan ban ialeit noh sha shnong. Ka pynshlur ia u ba un nang iaid shaphrang ha kaba pyntbit ialade bad ba ka khmih lynti ba un nang kiew shaphrang. Ka iathuh ba maka ruh ka iai pyrkhath borobor shaphang jong u bad ka khmih lynti ia ki sngi basuk bakmen ynda u la wanphai bad kumta ter ter.

Kumta ki la ia pynher shithi man ka por ban iathuh ia la ki jingshem bad jingiakynduh bad kim ju klet ban pyoskhem iala ki jingkular ba kin ym shukor ne iehnoh iwei ia iwei.

Kumba kila ia kren shuwa ba kin iakhlad haba ki iohi ia ka sngi, u bnai bad ki khlur, ki ia kynmaw ieit iwei ia iwei. Khamtam haba pyllun bha u bnai katno ki ia kynmaw ieit tymfang markylliang. Ki tip ba ki ia peit lang ia u bnai bad ki jingmut jingpyrkhath jongki ki her markylliang. "Ko bnai," La ju kren marwei ka Brilliant "Phi lah mo ban rah khu-bor sha i baieit jongnga. Phim lah mo ban



wanrah ia ka dur jongi ba ngan peit ha phi kumba nga peit ha ka it khmih ba pyllun?" Slem slem wat hadien ba ka la don sha shnong ka ju peit ieit ia u katba u iaiaid hala ka lynti bad tyllun halor jong ki lyoh.

Ha kawei ka sngi, U Battle Field u la ioh shithi na la ing. U la plied ia kata ka shithi da ka jingphuh samrkhie kumba u ju leh. Hynrei haba u la pule iaka u sngew kumba ka bneng bad ka khyndew ka shu dum kynsan ngaiñ hakhmat jong u. U la pule lai sien saw sien iaka hynrei u shem ba ki jingthoh kiba don hangta ki sah hi kumjuh ban ia-thuh ha u ia ka khubor kaba sngewsih tam ha ka jingim jongu. Kata ka long ba u kpa jongu u la iathuh ba ka Brillian kam dei satia ka khun jong ka Sian kumba ki pyrkhat. Shuh shuh la iathuh ia u ba ym tipsatia ia ki kmie ki kpa bad ia ka tynrai jongka. Shuh shuh la batai ia u ba katkum ki rukom ki dustur ba nylla u khun Khasi khun khara u ia dei ban pyndkut noh ia u kynjri ka jingieit jong u bad namar ba ym tip ia ka jait ka khong bad ia ki kha ki man jongka, ioh jia ba ha ka jingbymtip ki ia kynduh ha bym iabit, ioh ngat ha ka sang ka ma ioh pom pyrthat ioh dait u khla.

Ah u Battle Field bapli, mano ban pyntngen ia u ha kat kata ka jinglong hangta ha ri nongwei? Shipor u la iaksaid bad la ka jingsngew kum uto u briew uba thait hapdeng ka pung bah jong ka jingsngewsih bad jing-

duh jingkyrmen. Kawei kaba la pynsngew lyngngoh ia u hapdeng jong kata baroh ka long, ka jingmaham jong u kpa jongu ban ym iathuh ne pynpaw ei ei ha ka Brillian ia kita kiei kiei ki ba iadei bad ka jingim jongka. "Balei ba kam dei ban tip ia ka jingshisha" La kylli u Battle Field ha lade. Baroh shi lyn-ter la ju sneng ju kraw ia u la ha ñng, ha skul, ha jingiaseng ne hangno hangno haba don kiba sneng ba kraw ba u dei ban kren ia ka jingshisha. U kpa jongu khamta u long uba pyrkhing bha iala ki khun bad sumar bha ba kin kren ia kaba shisha. U kynmaw ba shi-sien u la kum pynpait ia u phlas uba ki wah ha u prek. U kpa uba la tip thikna ba dei ma u u ba la pynpait ia uta u phlas. u la kylli ia u mano ba la pynpait ia uta u phlas. U kynmaw ba ha ka jingtieng u la pyrshang ban len bad pyrshah ban tei pop ha kiwei. U kpa u la shim ia u dieng sympat bad u la sympat ia u. U la sympat bad kawiat ia u haduh ban da at byl-liang lut ki khohwah bad ka met ka phad jongu bad um iehnoh satia tad haduh ba un da phla ba dei ma u uba pynpait ia uta u phlas. U kynmaw ba ha ka por ba u la iathuh kumta u kpa jongu u la i leh kmen bad u la kdup ia u bad u la doh la dait ia u. "U la kdiah noh bun lyngkhot ia u dieng sympat bad bret noh shabar ia u lyngba ka jingkhang it.

"Lada phi la iathuh hok naduh kaha sdang phin jin da la lait na ka ka jingshah shoh shah sympat. Ngam kwah ba ki khun jongnga kin long kiba thok kiba shukor. Nga kwah ba kin

long kiba beit kiba hok, kiba shlur bad ki bym riej ban kren ia ka jingshisha wat la ka long kumno kumno ruh, Kynmaw ba kaba kren ia ka ba shukor ka wan rah ia ka jingjyn-jar bad jingbabe hadien habud." La ong u kpa.

Kitei ki kyntien u kpa jongu ki sawa bad iai sawa ha ka jingmut jingpyrkhat jong u bad ka la iarap ban saindur ia ka burom ka akor bad ka jinglong jingim jongu. Baroh ki pyrto ia ka jinglong ba beit bad ba khuid mynsiem jongu bad baroh ki tip ba kaei kaba u kren ka long ka bashisha. Mynta ba u la heh la san bad la kot jingmut jingpyrkhat, um lah khlem da sngew burom ia la u kpa bad sngew sarong ba u la ialam bad pyni nuksa ha u wat dala ka jinglong bad jingim kaba man ka sngi jongu. U sngew sarong haba ki briew ki ju iakren harum haneng bad ong "Kum u kpa kum u khun".

Hynrei mynta u shaiong ngain ka jingmut jingpyrkhat jongu haba la ong ha u ba un ym iathuh ha ka Brillian ia ka jingshisha shaphang ka jingim jongka. Balei ba kan leit long kumta mar khongpong ia kaei kaei kaba u kpa khamtam da lade u la ju hikai.

Ki jingpyrkhat khulai jongu ki la pynlong ia u ba un sngewtlot bad tyrsain shi rynieng. U la dem noh ha jingthiah bad pyrkhat shi pyrkhat khlem sangeh da ka mynsiem kaba sngew kumba kan bthei ha ka shadem jougu.

Donbok ba ka leit hap ha ki sngi shuti. U la im khlem nang thiah nangdem lait sa tang hateng hateng ha ba u la iohthiah klet shipor arpor na ka bynta ka jingthait palat ka jingmut jingpyrkhat jongu. U bam u dih tang ban teh ia ka mynsiem. Kane ka la long lai sngi lynter namar dei ha kita ki laisngi ba u la pyrkhat shitom jingmut kumno bad aiu un thoh sha ka Brillian kaba ha kata ka por ka dang ap khmih lynti ia ki kyntien jingieit na u ban pynim ia ka jingkyrmen ba lui lui jongka.

Ka jingpyrkhat ban pyndkut ia u kynjri ksiar uba teh song ia ka jingieit ba nylla jongki iwei ia iwei ka la biang ban pynsgew thylli ia ka jingim jongu. Ka la biang ban pynsgew ha u ba u long tang ka rew kaba ka ngap bathiang kam don shuh bad ka ruh thylli kaba u moina u la her. Ka la pynsgew biang ia u sa shisien pat kum uto u nongiaid lynti ba la jah hapideng ka ri shyiap ne kum ka lieng rit ba la kit da ka eriong, hapideng ka duriaw bah. Um sngewthuh shuh haei u don, shano un leit bad kaei ka jingmut joug ka jingim jongu.

“Lehse ka don ka jingma lada ngan iathuh ha ka Brillian ia ka jingshisha, lym kumta kin ym jin da la maham ianga shaphang kata Hynrei ngan ym shongthait tad haduh ba ngan da tip shai bad thikna ia kiei kiei baroh” U la ong halade. “Sa hynriew bnai ka jingpule jongnga kan kut. Nga kwah ba kan kut kloï noh ba ngan ioh leitnoh sha la ka jong

ka ri ban pynthikna, pynshisha bad pynbeit ia kiei kiei baroh. Ah ko Brillian baieit, ka jingdum aiu kein kane kaba wan tap ia ka jingim jongngi. Ah ba ngan da lah ban phai dien bad ngam sha ka tynrai jongphi, kan jin da la pynlong ianga ban sngewhun wat lada ngi dei ban iakhlad lada ka dei ba ngin leh kumta. Kumno ngin shu iakhlad khlem don ka jingtip kaba janai ba ka don ka jingker ka jingkah hapteng jongngi, kat kum ki riti ki dustur u long shuwa man shuwa ?

Da ka jingsngew kthang ka mynsiem u la shu pynhun ha lade ba wat lada un len ia ka jingshisha hynrei un ym kren ia kaba shukor ne iaka ban pynsniew iaka' U la shim u khulom bad ka kot sada.

## New Delhi

### Brillian Baieit

Nga kyrmen ba kane ka shithi kan lap ia phi hapteng ka jingkoit jingkhiah bha da ka jingsumar sukher U Trai Kynrad, bad nga ruh shane kumjuh.

Ki jingdawa jong ki kam kiba nga dei ban pyndep ki pynlong ia nga ban bun kam katta katta bad ngam iohpor thikna wat tang ban bam bah dih bad ban thiah ban dem hok. Hynrei kata kam pher ei ei. Kane ka jingpule jongnga kan kut sa tang hynriew bnai ei ei bad hadien kata ngin sa ia iohlad ban iakren ia pynbeit thikna ia kiei kiei kiba donkam hapteng jongnga bad jong phi. Namar ba ngi dei ban ialeit na kawei ka jaka sha kawei pat, naduh kine ki shi-

sngi arsngi ki ban wan ngan ym don shuh ha ka jaka ba nga ju shong ju sah' Kumta wat leit phah shithi ei ei shuh tad haduh ba ngan da tho'h bad pyntip shaphi ia ka jingwanphai jongnga.

Tang kawei kaba nga don ban ong ka long ba ka lynti jong ka jingieit barabor ka ju dap tang da ki diengpyngkiang kiba shitom bad ba eh ban iaid lyngba ne ban ryngkang. Ka lynti jong ngi ruh kan ym lah satia ban lait na kum kita. Kumta lada ngi dei ban poi sha kaei kaei kaba ngi thmu ngi la dei ban ia kynduh bad iaid lyngba ia kita kiei kiei baroh.

Hynrei to ngiu ia buhti ha u Blei, u nongthaw u nongbuh, uba la thaw bynriew buh bynriew ia ngi ban duwai ha u ba kumba u la pynlong doh pynlong snam ia ngi bad u la buh ia ka mynsiem ka jingsngew ieit sngewjan iwei ia iwei hapoh jong ngi ba un ym iehnoh iangi ban sah ha ka lyngngoh ka dumbuit ka shaiong bad ba un plie ia ka lad ka lynti ba ha kaba khatduh haba kine kiei kiei ki la wai ngin poi ha ka bakut jong ki jingthmu ki jongngi bad ngin iohkheit ia u soh bathiang kumba ngi la kyrmen bad khmih lynti.

Nga don shibun ban ong bad iakren bad phi hynrei kan bha ba ngin sa iakren ia kita markhmat ynda nga la wanphai.

Tang kumta ngan shu pynkut noh. Khu-blei shibun shongsuk bad thiah suk tad haduh ba ngin da iakynduh bad iashem pat.

Yours  
BATTLE FIELD

U Battle Field u sngew eh ban thep hapoh ka enbelop ia katei ka shithi kaba u la thoh. U la pyrkhath bun bun sien ha shuwa ba un leh kumta. U tip ba kiei kiei kiba u la thoh ki long ki bym sngewtynnath satia bad kiba long markhongpong ia kaei kaba u don hala ka mynsiem. Ka la long ka sien kaba nyngkong ba u la leh kumta bad ka jingiatip lem jongu ka lai dait tdot shi tdot ia ka mynsiem bad ka jingmut jingpyrkhat jongu. Ka jingiathuh jongu shaphang kita ki jingleit jongu ka long namar ba u tieng ba ioh ka Brilliant kan thoh sha u bad kylli bniah ia ka daw bad ia ka jingshisha namar ba u thikna ba kan ym iohthiah iohdem khlem da tip ia ka jingshisha. Ka jingiathuh jongu shaphang ka jingbunkam kam dei kaba shisha. Hynrei u la shu pyohun ia lade ba u la leh ia kaei kaei kaba bha tam bad ba um shym pyn-dkut ia u kynjri jingieit kumba la bthah ia u da u kpa, namar kata kan pynpait ia ka doh-nud jongka khlem lah shuh ban sopsain.

Ha kaba khatduh haba um sngew donlad da kumwei pat, u la doh tluk ia kata ka shithi bad u sa thep noh iaka hapoh ka enbelop bad pyndait iaka. Shuwa ba un thep hapoh ka synduk thep shithi u la doh biang sa shisien iaka bad u thep pynkloi namar u sngew kumba ka jingdon jongka ka pynpisa ia ka mynsiem jongu. U la pyrkhath ba hadien ba u leh kumta kata ka jingpisa kan jem noh. Hynrei u shem pynban ba hadien kata ka wanka jingsngew babe kaba kat ban da lah un khlong biang iaka nangta. Hynrei um lah leh ei ei shuh.

**Ka** Brillian tang shu iohpdiang ia kata ka shithi na u dak ka la kmen ym tip briew shuh. **Ka** mynsiem jongka ka la kyndeh stet da ka jingkwah ban pule noh iaka namar ba ka tip ba hangta ki don ki kyntien bathiang ka jingieit nala u baieit uba kam shym iohi shuh ia ka khmat jongu la kumba shisnem shiteng, laitnoh satang ha ki jingpyrkhat bad jingphohsniew jongka. **Ka** jingieit jongka ia u ka la san bad subthied bha ha ka dohnud jongka. **Ki** kyntien jingieit lyngba ki shithi ba u thoh ki long kum ka dawai ban pyniap ia ki khniang ki ksiah jong ka jingartatien bad jingtharai sniew ba shu mutdur kiba shait don ha ka dohnud jong shibun ki thei samla.

**Ka** la plied la kata ka shithi da kaba leh husiar ban ym pynjot pynduh wat ia ka enbelop ba u thep iaka namar ka sngew ba ka long kaei kaei kaba kordor hakhmat jongka. **Ki** rymmiang shyntur jongka ki phuh samrkhie rymmuin katba ka dang leh kumta.

**Hynrei** haba ka la dep pule, ka shem ba ka long markhongpong na kaei kaba ka la khmih lynti. **Ka** la ju long ka rukom jongka ba shuwa ban pule ka ju doh ia ki shithi jongu shisien arsien bad hadien ba ka la dep pule kan doh ia ki bun bun sien shuwa ban thep ne buhnoh khop iaki. **Ha** kane ka sien ka la leh kumjuh shuwa ba kan pule. **Hynrei** hadien ba la dep pule, kam lah shuh ban rah iaka ha ki rymmiang shyntur. **Ki** kti jongka ki la tlot bad ki rymmiang shyntur jongka ki la kyih.



"Balei ka long kumne ? Ka la kylli ha lade. "Shano ki jah kito ki kyntien "Baieit" bad "Bathiang" kiba ju don da kl phew phew sien ha man la ki shithi ba u ju thoh sha ka mynshuwa ? Kiei kita ki dieng pyngkiang ? Kaei kata ka jinglynggob ? Kiei kita ki shibun kiei kiei kiba u kwah ban kren bad ban ong ha nga ? Ka la shong pyrkhat bad puson slem slem hynrei kam lah satia ban shem ia ki jubab kiba biang halor kita ki jingkylli. Kam lah shuh ban thoh sha u mynta ban wad jingshai halor kita ki jingkylli namar ba u la iathuh ba un ym don ha ka jaka ba u ju shong ju sah.

"Ko Battle Field, ngam sngewthuh aiu phi mut. Hato phi mut ban shu pynbieit kai bad pynpait ia ka dohnud jongnga ? Phim sngew iadei kyrdan shuh mo bad nga kane ka kup shiliang ka sem shiliang, phi la ia kynduh bad kaba iadei bad iab'ang kyrdan ? Dei kane mo kaba phi ong ba ha ka jingieit ym don ka jingiapher kyrdan ? Balei phim thoh da kaba shai kaba nga lah ban sngewthuh kdar ia ka jingmut jongphi ? Balei phi da kren kyllain haba phim mon ne phim don shuh ka jingieit ia nga ? Ah nga kaba bieit, kaba la shu ngeit bieit ha ka jingluilui ia ki kyntien ba padiah u thylliej ba pnah jongphi. Ngam tip haduh katne phin shet shukor ia nga. Nga la shem bad iakynduh bun ki jingjynjar ha ka jingim jongnga sa maphi phin nang pynlang shuh shuh halor jongnga ia ki jingjynjar ?"

Kumta ka la kren pasiauw weibriew bad ki ummat kiba kyrsoi bad tuid kum ki umpoh-liew na ki khmat jongka. Man ka por ba ka pyrkhat la kita kiei kiei kam lah khlem da iam bad jaw ummat lala ka jong ka jingshem pap.

Ka Sian kaba la iohi ia ka jingleh sngew-sih jongka naduh ba ka ioh ia kata ka shithi ka la sngewthuh ba u bah Dro u la pyndep ia la ka bynta kumba la iakut. Ka la isynei ia ka Brillian bad hateng hateng maka ruh ka ju pynjaw jar jar la ki ummat sngewlem na ka bynta jongka. Ka sngewthuh katno ka jingsngewsih bad jingsngew khuslai ka ban ia ka, bad ba ka donkam eh ia ka jingpyntngen. Kumta katba don la ka bor ka buit baroh ka la ialeh ban pyntngen bad khroh iaka bad ka ju pynkmen iaka da kaba pyni ia ka jingshisha ba hadien ka jingdum barabor ka bud ka jingshai, hadien ki jingsngewsih ka wan ka jing-kmen, hadien ka jingjynjar ka wan ka jingsuk bad kumta ter ter.

Haquh katno ka Brillian ka ioh jingtngen bad ka bor ban laishah ia ki jingjynjar da kitei ki jingpyntngen ka kmie, ym don ba lah ban ong.

## XVI

Hadien hynrlaw bnai, haba u Battle Field u la pyndep ia la ka jingpule, u la wanphat sha la ing. Ha kata ka por ba u wanphai wat ka kmie jongu ki kaba la wan sha'ing hadien ba u la poi ka la jan ban ym ithuh shuh iala u khun uba ka la kha. U la ju long uba dap doh, uba ismat isting, ikhuid i suba bad uba ka khmat jongu ka i um iphyrnai. Hynrei mynta u la raikhoh i kumba u la sah satang ka shyieng bad ka snep. U i tlot i swai bad u phong da ki jain kiba imat ki bym shym la sait la kum ba artaiew ei ei. Ka khmat jongu ka la tap da u tmain u tmoh ubym ju khi shuh la kumba hynrlaw bnai. Ka khmat jongu ka thang, iong bad ki khmat jongu ki jylliew kumba u dap tang da ki jingpyrkhat. Lada un ioh sa ka riam pukir lehse wat ka Brillian kaba shait pyrkhat synia sngi shaphang jongu kan ym lah ban ithuh ia u.

Tang shu poi tiap u la buh iala ki tum ki tam bad u la sum la sleh katba ka Shila ka nang pynkhreh sha. Ynda u la dep sum dep sleh u la leit sha ing shet ja ban dih sha. Ka Shila ruh ka la ia dihsha lang. Ym don mano mano ha ing lait tang ka Shila. Kat kum ka jingla-thuh jongka, ka kmie ka leit sha ba iathoh ka khun ka paralok jongka ha Mawkhar, bad u kpa pat u leit jingleit bad ita i Maheh iba pyn-peit ia ki jingtrei jingtah jongki.

**"Kumno bah sngewtynn timer sha ri dkhar?"  
ka la kylli ia la u hymmen.**

"Shisien ba la mih nala ka ri la hap hi ban shu pynsgew tynnat la ka long kumno kumno ruh. Hynrei shano yn leit iadei bad ka ri lajong. Nga la poi katto katne ki jaka dkhar, hooid ki biang lada shu leit kai leit shang pyrthei katto katne sngi. Hynrei ban ong ban shong ban sah shirta te shano phi. Hangno yn shem kum kane ka ri Khasi jongngi? Hangno yn ioh ia ka er batesi ka er batemon kaba beh kum ha ki lum Khasi? Haei yn ioh ia ki umpohliaw ba shngiam bad ki wah ba sngur kum ki jong ka ri Khasi? Hangno ngin ioh ia ki saw aiom kiba sngew tynnat khamtam ia kapyrem bad ka synrai jong ka ri Khasi? Haei yn iohi ia ka jingitynnat jongki lum ki them kum ki jong ka ri Khasi? Hangno yn iohi ia ki kshaid ba ithiang kum ki jong ka ri Khasi? Kine ki long kiba nga shu jer tang katto katne. Ngam tip don ne em kawei pat ka jaka ha kane ka sla pyrthei ka ban iaryngkat bad kane ka ri Khasi jongngi., ha ka jingitynnat bad ka jing pynggad.

Ka Shila kam shym da mut eh ban kylli ia katei ka jingkylli namar ba ka jingmut jong ka ka don ha kawei pat kaba ka niew kum kaba kham kongsan. Hynrei haba ka la iohsngew ia katei ka jubab jong u Battle Field, ka jingmut jingpyrkhat jongka shipor ki her sha ka jingitynnat jong ka rilum Khasi. Hadien shipor ka la kylli biang ia u.

"Kumno bah, phi la fakhlad bad ka Brillian?"

U Battle Field u la sggewjuang ban jubab ia kata ka jingkylli ka para jong u. Hynrei ha kum kata ka por. u donkam ia ka jingpyntngen, jing. aibuit aibor bad ai mynsiem jong ka Shila, kaba long khamtam ka paralok ba ieit jong ka Brillian bad kaba la iadon kti ha kaba pynia ithuh ithaw ia u bad ka. "I pa i la ong ianga ba ngan ia khlad noh bad ka hynrei ha kajuha ka por i la maham ianga ba ngam dei ban iathuh ha ka ia ka jingshisha. Kumno ngan iakhlad khlem da iathuh ha ka ia ka daw kaba biang hadien ba ngi la iaiaid iaieng katta? Ngam lah ban pynpait ia ka dohnud jongka lynda ka long da ka jingbym banse eh. Ngan hap da it shuwa ia ka jingshisha bad ia ka tynrai katba ka dang ieit bad shaniah ha nga wat lada ka dei ianga ban pynlut ia ki sngi kiba sah jong ka jingim jongnga ha kaba leh kumta."

"Balei phi kren kumta? Ka pyrtnei mariang ka don hakmat jong phi phi lah ban jied iwei hapteng ki phew hajar i ban shim bujli ia ka jaka jong ka Brillian ha ka jingim jong phi. Phi la biang ka kyrdan bad ka lawei jongphi ka phyrnai. Mano ban ym kwah ban iaioh bynta lem bad ka jingim jongphi? Kum ban shu ong noh, kano ka samla ka ban ym treh iaphi lada phi phah kylli?"

"Kein noh Shila, Kein noh phi phim sngewthuh ei ei ia ka jingmut jingpyrkhat jong nga bad phim tip haduh katno ka mynsiem jongnga ka khib pisa na ka bynta ka Brillian. Ym don mano mano ba lah ban shim ia ka jaka jongka haka

dohnud jongnga, me wat ka khun syiem Bilat ruh kam ym lah ban leh kumta." La ong u Battie Field.

Ngam pat ju tip ba ka mynsiem rangbah kan long kumta. Katba nga iohi bad nga tip te ka pher bad kiwei pat. Kim ju salia, ki pdiang ia ki jingkylla kumba ki war. Ki shim tang ia kiei kiei kiba pynsngewbha ia ki bad kyndad sharud ia kiei kiei kiba pynsngewsih. Ki laid ki ieng khlem pyrwa bad kim ju don jingsngewsih ha ka dohnud ka jong ki khamtam na ka bynta ki kynthei kiba la iaroi syrtap kum ki dohjei La ong ka Shila.

Kein noh Shila, kein noh, phim pat sngewthuh ei ei ruh em ban iakren ia kita ki bynta. Phi lah ban ong kumta ia kiwei hynrei ngam tip kumno phin sngew lada kita kiei kiei kin jia ha ka jingim jongphi. Hynrei mano ban sngewthuh ia ka jingpang jong ka jingthar shiah lada kam dei hala ka kjat la jong? Kumno ngin sngew lada u briew uba phi la iaieit iathoin bad ba la ia khmih lynti ba phin iashong iasah ryngkat, un shukor bad iehnoh iaphi? Hato phin ym pait ka dohnud hato ngi lah ban peit ia ki jingsngewsih bad ia ki ummat ki jongphi?

Ka Shila ka la sangeh shipor ban pyrkhath ia kita ki kyntien u hynmen jong ka kiba sngewkumba ki thew beit beit ia ka. U Battie Field u la sngewthuh ba ka la sdang ban sngewthuh bad kita ki kyntien jong u ki la ngam ha ka jingpyrkhat jong ka.

"Hoid ngi lah ban leh kumta ia kiwei khlem da sngewpher eh lada ngim pyrkhath jngai. Hynrei lada ngin pyrkhath kham jngai ka don ka jingma. Phi dei ka para jongnga lada ngan pynpait dohnud ia kiwei khlem pep kan kyrtoh bad phai kylla shala ka ing ka sem. Hato kata ka long kaba sngewbha?" La ban ktien u Battle Field.

"Tip seh haba nga iohi ba kiwei klwei baroh ki ia long kumta te nga mut ba baroh ki rangbah ki ialong kumjuh." La ong ka Shila.

"Haba ki rangbah kim kwah ban bat ia la ka jinglong rangbah te kumno yn ia ong? Bun ki pyrkhath bakla ba ngi ki rangbah ngim don jingkit khlieh ei ei. Kata ka le t long ba bun na ki rangbah mynta kim salia ban pyrkhath bad shim ia la ki jingkit khlieh. Lada phi iohi ia uno uno u rangbah uba ia kynroi briew ha surok na i daw bym larkam phi dei ban tip ba um dei satia u rangbah uba shisha. Lada phi iohi ne iohsngew ia u rangbah uba ia id buaid ha surok bad ka tim ka tla kum uba nud uba iaw, phi dei ban tip ba u dei u rangbah kai u bym don ka jingsynshar halor lade ne ka jingkit khlieh ia la ka ing ka sem ki khun ki kti ne ka kur ka jait. Don kiba ong ba lada phi shem sngewsih dih da ka kiad, kan pyntngen ia phi. Hynrei kata ka long tang ka jingleh ki khawpud kiba tieng ban ieng ha la ka nongrim ne phai pyrshah ia ka jingim. Kum kita ki briew ha kaba kut kin shem ialade ba ki ngam kham jylliew sha ka jingjah burom kaba kim shym ladei satia ban ngam lynda ka kiad kam shym teh mraw ia ka jingim jong ki."

U Battle Field u shem ba u la kum kren pynban shaphang ka kiad kaba long shabar jong ka jingiakren jong ki. Kane ka leit long ba um sngew don nuksa kaba kham bha ban pyni ia ka jinglong bym kitkhlieh jong ki rangbah ha la ka jinglong rangbah, ka ban da paw tyngkrein kum ha ka jingim ki buaid.

“Ngi iakren shaphang ka jingkit khlieh u Rangbah ym ia u buaid tanglang”. La pynkynmaw ka Shila.

“Kata kein, lada u rangbah un iehi a ka kynthei ne ia ka samla kaba u la iaiaid iaieng ha ka jingpait dohnud bad phet riehtngen ialade ha ki jingsngewbha, phi tharai u la shim ia ka jingkit khlieh kum u rangbah? Ka kamram u rangbah ha ing ha sem ka dei ba un kamai un pyndap pynbiang. Ka kamram jong uwei pa uwei u rangbah ha shnong ha thaw ka long ban peitngor ba kao don ka jingshong shngain bad ban rat dyngkhong ia ka jlngsniew. Ka kamram jong u rangbah ha ka it ka hima ne ha ka kur ka jait ka long ban peitngor ioh don uba shun uba pen u bar u lait uba wan pynsniew wan lehkput ne wan lehbein leh khoh bad peitngor ia ka synshar ka khadar. Ka dei ka kamram jong u ban iada ia ki kynthei ki khynnah ia kiba shem jynjar lanot. Ka dei ka kamram jong u ban kieng ia ka wait ka stieh u khnam ka ryntieh ban ieng ban iapom na ka bynta ka kur ka jait ka it ka hima. Ka duwan jong ka jingieit ri kam ju duh jingknia ha ki por ba donkam bad ia u pud u sam ka ri Khasi baieit eh jongngi la pynskhem



halor ka snam jong ki khla wait bad ki rangbah iapom. Kine ki long tang katto katne na ki jingkit khlieh jong u." La ong u Battle Field.

Ka Shila kam sngewlah pyrkhath ba u rangbah un don haduh katta ki jingkitkhlieh. Ka la ju pyrkhath ba ka kamram jong u rangbah ka long tang ban kamai ia ka bam ka diha ing ha sem lait nangta u lah ban leh sngewbha katba u mon.

"Haba kumta lah hi ban pynbiang kat ia kita ki jingkit khlieh? La kylli ka Shila namar wat lada ka sngew-thuh ba ki la iapoi biang sha ka phang kaba la kham jngai na kaba'ki ia kren pynban ka la sdang ban sngew tynnat.

Baroh kitei kim ju wan ha kajuh ka por. Wat lada ki wan ruh sngewthuh hi kano kaba dei ban pyndep nyngkong bad kumta ter ter.

Kumno sha bah phi la leh ia kato kaba nga kylli hynne?"

"Ngan leh kumno? ka shu sah kumto kein hapteng. Kam pat dei ka por ba ngin ia khlad ne ka por ba ngin ia kynduh. ngin da-wad shuwa ia ka tynrai bad lehse ki don ki lad ba ngin lah ban leh kumta. Katba nga sngewthuh, ka long ka kam kaba eh hynrei la kumno kumno ngi dei ban da pyrshang" La ong u Battle Field.

"Ha ka jingshisha kim shym iathuh ei ei ha nga ia ka kam jongphi hynrei ryngkhat ba haba ipa i la phah thep ha ka synduk thep shithi ha ing dak nga la iohi ba ka jingtah jong ka enbe-

lop kam bat bha bad ka la lait. Nga kwah ban tip aiu i pa i thoh namar ba i da leh sumar bha bad tap noh lada ngi kum leit hajan ha ka por ba i thoh ia kato ka sbithi bad i da beh ruh ia- ngi. Wat i mei hi ruh im tip aiu i pa i thoh. Kumta nga la sei bad pule ia ka bad hadien kata nga sa tah bha da ka lei na ingdak bad nga thep artat."

"O kumta ? nga nang mut ba baroh phi la iatip". La ong u Battle Field.

"I Maheb i la wan poi mynhynnin ka sngi da ka jingphah khot i pa. Ryngkat bad i la wan ruh uwei u briew. Nga la i phylla ia ka jingiakren jar jar jongki bad kumta nga la pynshahshkor na kyndong jingkhong bad ioh- sngew kyndiang ia ka ka jingiakren jongki.

"Iei ine ? La kylii kylii i Pa Pa ia i Maheb.

"Ine i dei iba dang wan trei bad ngi dang mynta saw taiew ei ei"

"O phi ong kumta. Phi sah shano ?" La kylii i Pa Pa ia uta u briew,

"Nga sah hi sha thie sha bhoi" La jubab uta u briew,

"Phi trei phi ktah aiu mynshuwa ? La kylii biang i Pa Pa..

"Nga trei kam rit kam ria shathie sha dkhar bad nga dang shongthait bad wanphai sha la ka ri dang mynta shibnai tam ei ei.

"I trei hangthie ha Mental Hospital ha Tezpur te." La iathuh i Maheh ia i Pa Pa.

"Kumno don Khasi ki ba phah sumar hangto ?

"Ki iadon hi katto katne ngut, ym ju duh man u snem. Kiba la nang lait kito, kiba dang wan thymmai kito, kiba wan biang ar sien laisien ruh kito".

"Katno sha ka ju shimpur ban pynkoit ia kum kito ki jait jingpang ?" La kylii i Maheh.

"La la ki jait bad rukom jingshitom. Kiba shi thiew, kiba shi bnai kiba shisnem arsnem laisnem sawsnem sansnem ruh kito. Don tang kawei ka Khasi kaba ym lah satia ban pynkoit bad ka la don hangthie la palat arphew snem".

"Palat arphew snem ? Ka shitom kumno eh ? La kylii i pa.

"Ki Doktor ki ong ba ha ka jingshisha ka jingpang jongka ka la koit. Hynrei haba ki mut ban phah noh ia ka, kam don jaka shano shano ban leit namar ba kam kynmaw ei ei ia ki por ha shuwa ba kan wan poi hangthie. Ym ju don ba haing ba ha sem ne ki baralok parajor ki ban wan peit iaka. Kam tip ne kynmaw ei ei hi ruh shaphang jongki bad kaba phylla ka long ba wat iala ka kyrteng la jong ruh kam kynmaw Haduh ka por ba nga mih nangthie, kam pat kynmaw wat la ki la pyrshang ki lad katba don ban pynlong iaka ba kan kynmaw kumta. Ki Doktor, ha kaba nying-

kong, ki tharai ba ka shu leh mynleh. Hynrei ynda ki la eksamin bad khmih thuh bha ki sa shem ba ka long shisha kumta.

“Ki ieh kumno haba kumta ? Ki set lang iaka bad kiba bieit ? La kylli i Maheh.

“Em phi, kam shym bieit shuh kumno yn shu set lang hangta ? Ki aikam shet jingshet ia ka hangta ban myntoi ei, bad na ka bynta kata ki ai iaka ka bam ka dih katba mon bad ki siew ia ka katto katne ba kan ioh thied jaiñ thied nep bad kiwei kiwei de ki jingdonkam.

“Kumno phi tip ba ka dei ka Khasi haba kam tip iala ka shnong bad iala ka kyrteng? La kylli i Maheh.

“Leit jia ba ngam don ha ka por ba ki wan buh iaka. Ki ong ba la wan buh ia ka da ki katto katne ngut ki briew. Ka riam Khasi bad ka kren Khasi tang ba ka sur kren jongka ka lam ring thain sephgi kumno re.”. La ia-thuh uta u brlew.

“Balei kim kylli na kita ki briew kiba wan buh.” La kylli i Pa.

“Ha ka jingshisha ki ong ba la thoh ia ka kyrteng jongki. Hynrei ynda la kylli na ki, ki iathuh ba kim tip ei ei shaphang jongka bad ki la shu wan buh iaka tang namar ka jingsngew para briew haba ki ithuh ba ka doh jingshitom”

“Hadien kata nga la sngew buid jyrhoh kumno re bad nga la phet noh sor nangta sha ing shetja ban leit jyrhoh bad mar kumta i Pa i la pyrta bad ong ianga ban pynkhreh sha. La ong ka Shila.

“Kata ka mut phi iohsngew tang katta ? La kylli u Battle Field uba la pynshah shkor bha ia kata ka jingiathuh jongka bad ba u kwah ban tip shuh shuh.

“Nga la pynkloi katba lah ka theh sha bad tang shipor hi namar ka la don lypa ka umthnam ha ding, nga la leit rah sha iaki ba kin iadih. Nga ithuh ba ki da pynleit jingmut bha baroh lai ngut ha kata ka jlngiakren jong ki bad i Maheh khamtam i i kumba i don ha rngai.” La iathuh ka Shila.

“Ka don ne em ki thapbasim barit khyn-diat bad uwei pat ha tnoh ? La kylli u Maheh ia uta u briew.”

“Hooïd, balei ? Phi ithuh ia ka ? La kylli uta u briew u da leh lyngngoh bad leh kmen ha kajuha ka por.”

I Pa i la khaprip khmat iaki kum ban ong ba kin ia sangeh shuwa namar ba nga dang don manga hangta. Nga ruh nga la leh kum bym bna ei ei nga la mih noh bad leit sha ing shetja. Nga tong um da ka maloi na u phiang stem nga da pyntyngkhuh khnang ia ka ha ka ryndang phiang ba kin iohsngew ba nga

don ha ing shetja bad nga la wan biang sor ha lyndet jingkhang." La iathuh ka Shila ia u Battle Field uba la sngew sammut ia kata ka jingbuit tuh jongka.

Kata te thik la dei ka Khuri ka lok jongnga. Ka don ne em bad i khun rit ? La kylli i Maheh.

"Em, balei ?"

"Kumno kumta ? Ani la jia aiu ia i khun? Lada ka dei ka Khuri .... um nang ban pynkut.

"Hangta te sngewmat ka la iawan." La ong i pa pa katba i Maheh i leh kyndit bad ap dngang ia kaei kaba i pa in dang iathuh." Lada ka long kumta thik kato kawei ka khynnah kan dei ka khun jongphi pynban."

"Ka khynnah aiu ?" La kylli u Maheh.

"I pa i la iathuh ia ka jingiathuh khana shaphang ka Brillian kumba i la tip na i kong Sian. Ni pleng ngam ju tip, ngam ju tip, ba ka Brillian kam dei ka khun i kong Sian."

"He, kumno kumta ? Ka dei ka khun jongno ? La kylli u Battle Field.

Ka la iathuh lut ia kiei kiei baroh shaphang jongka kat kum ba ka ka iohsngew hala u hynmen uba sngew kumba ka Shila ka la iathuh suki bad shim por slem ban ang bad pynmih iala ki kyntien. U la sngewkwah ban tip lut kloï katba lah. U sngew skuiñ ba ka Shila kam iathuh stet bak bak.

Haba ka Shila ka la dep iathuh, u klongsnam u Battle Field u la kyndeh stet haba u sngewthuh halade ba ka don ka syrwet da kaba u lah ban bud dien sha ka jihgshisha kaba iadei bad ka tynrai ka Brillian.

Myn hynne dang step ngir ki la iamih da ka jeep ban leit sha Tyrna bad nga la iohsngew ba ki ia ong ba kin ialeit shata sha shnong ka kmierad ka Brillian bad shata sha Tezpur de.

U Battle Eield u la sngew kum ba un leit beh nadien jongki. Hynrei u kyrmen ba un sa tip ia ka khubor jong ka jingwan jongki ynda ki la wan phai.

Hadien katto katne por u la mih na ing ban leit iaidei kai pyngngad.

Thiaw ki kjat jongu ki lam sha Nan polok bad tang shu poi hangta ki la lam ia u beit beit sha kata kajuh ka jaka kaba u ia shongkai khadduh bad ka Brillian.

Hynrei ynda u la poi hangta, u la lap ba ki don pynban shijur ki samla ki ba iashongkai ki da i khia jingmut jingpyrkhat haduh katta katta. Um kwah ban pyntbut iaki bad kumta u la iaidei noh bad shongkai ha ka jaka ba long lum kyntong kaba mar pyrshah.

Haba u peit sha ki ka jingmut jingpyrkhat jongu ka her sha kato ka sngi ha kaba ma u bad ka Brillian ki ia phylliew mynsiem hangta

U kynmaw ia ki jingkular kiba u la kular ha ka bad maka ha u. U kynmaw ia ka jingia-doh ba sngur ha shuwa ba kin iakhlad noh bad ban ym ia iohi snuh iwei ia iwei pat la palat arsnem..

U la mih noh nangta malu malu ha kajuh ka por kaba u la iamih bad ka Brillian ba u la leit rung dihsha ha kajuh ka dukan sha. Ynda u la mih nangta, ki kjat jongu ki la lam biang ia u na kajuh ka lynti sha phalor Hospital. U la ieng hangta slem slem bad wanrah hala ka jingkybmaw ia kata ka jingiakhlad ba khatduh jongki. Lyngba ka phalor u la peit sha ka jingkhang bad u iohi iaka sa shisien pat da ki khmat ka jingkybmaw jongu ba ka peit sha u nangta, ka kaweh kti bad ka rung uoh artat shapoh.

Nangta u la leit noh da ka jingsngew pang-nud ka bym lah ban batai. Ka jingsngew blaw ka jingim ka la pynlong ia u ban sngew kumba u im ha rngai jong kawei pat ka pyrthei-Katba u dang iaid suki jai ha la ka lynti u sngew kumba u iaid ha ka surok ksiar ha ri ki puriskam bad bun bun sien u kren pasiaw halade "Brillian, Brillian, Brillian baieit bathiang jongna."

\*\*\*

\*\*\*

\*\*\*



## XVII

Ka Sian ka dang ai bam sniang sha kyrpong ing haba ka la lohsngew ba don ba pyrta iaka na khmat ing. Ka la iehnoh ia ki sniang ba kin nang iabam bad ka la rung sha ing bad wan peit na jingkhong bah.

“Wa i bah Dro! Shano kumne phin ia-leit? Rung rung seh.”

“Ngi iawan khnang shane sha phi kein.”  
La jubab u bah Dro katba u Maheh u shu sngap. Ki la iarung artat ha kamra pdeng.

Nangta, balei? Jia aiu? La kylli ka Sian kaba pyrkhath tieng ioh la jia ei ei ia u Battle Field.

“Ngi iawan na ka bynta jong ka Brilliant.”  
La ong u bah Dro. Shano ka don?

“Ka dang leit shim dawai ialade na Lait-kynsew, ka la jan wan hi katta.” La iathuh ka Sian. Ka la mut ban ong shuh hynrei ka jingdon jong ute uwei pat ka la pynlong ia ka ban sngap shuwa.” Ine pat i dei iei? Ka la kylli ia u bah Dro.

“Ine i dei i Maheh iba iatrei kam iatrei jam bad nga la slem bah. Ngi la ialong hi la kum shi para bad i. Lada ka dei kumba ngi pyrkhath te lehse phin sa ia ithuh ithaw khambha bad i.

Phi i bah Dro, ym lah ban leh ei ei ia kato ka kam ka Brillian bad u khunjongphi. Nga i synei eh iaka hynrei kumno bad aiu nga lah ban leh na ka bynta jongka? Kaba nga kham pyrkhat shitom jingmut eh shaphang jongka ka long, kumno kan leh bad shano kan leit ynda ngam don shuh. Nga ju duwai bad buhti iaka barabor ha u Kynrad ba un isynei bad ai haka ia ka jingsuk jingkmen ym ka ban da palat hynrei ka ban shu ialong lem kum kiwei kiwei rûh ka la biang iaka. Hynrei haduh mynta nga dang sah ha ka lyngngoh namar u Kynrad um shym jubab ei ei ia ki jingpan bad jingduwai jongnga. Hynrei nga ka briew, ka jingthaw jongu hi nga donhok aiu ban iasaid bad u? Nalor kata ka Brillian hapli kynrad ruh ka dei hi ka jingthaw jongu, hato un ym tip ia ki jingdonkam jongngi? Ngi la ia iaaid lait na shibun ki jingdum jingmut bad ki jingeh bad haman la ki por, ha ki por ba dum tam bad ba sngewsih tam hapdeng ki jingduh jingkyrmen, u Kynrad um ju pep ban kner iala ka kti ka jingisnei bad pyni ha ngi ia ka lad ka lynti ba ngin lait na kita kiei kiei. Nga tip ba un sa jubab bad pyni ia ka lad ka lynti ia ka jingim jongka ha ka por bad ka ia kaba biang".

"Nga ruh nga ngeit ba kan long kumta namar kumba ong u nongrwai shem mynsiem- Ki jingkyrpad ummat bashlei da ka dohnud ba pait kin poi sbisha sha u Blei uba dap da ka jingisynei. U Blei um ju iehnoh lane pynrain bukhoh ia kita kiba shaniah ha u bad

kiba wad ia ka jingisynei jongu hala ka sngi. Ha ka jingim jongnga hi ruh nga la iakyn-duh bun ki jingjia kiba kum kita." La pynbud u bah Dro.

"Shisha te bah Dro, nga ju duwai man la ka sngi dala ka dohnud baroh na ka bynta jongka." La ban biang ka Sian kaba sngew shogain ha kata ka jingai mynsiem u bah Dro.

U bah Dro um sngew lah kun shuh halade ia kaei kaba u sngewthuh bad u tip, hynrei u sngewtieng ba ioh ka kan long palat ia ka jingsngew riew kynthai lada yn pynpaw kyndit ha ka ia kaei kaba ki don ban ong. Kumta u la pyrshang ban twad shuwa ia ka jingmut jongka.

Lehse u Kynrad u lah ban pyntud ia ka jubab jongu ba ioh haba un jubab phin ym lah ban pdiang iaka bad kan long palat bad kan ktah ia ka jingmut jingpyrkhat jongphi namar kam pat poi ka ia kaba biang." La ong u bah Dro.

"Phi tharai kata ka lah ban long? Hato ngin ym lah ban pdiang ia kiei kiei kiba ngi hi ngi la pan?"

"Shu buh kong Sian, u Kynrad un jubab ia ki jingduwai jongphi mynta bad da ka jingleh phylla jongu un phah ia u kpa jongka Brillian hangne bad un ong ba ka Brillian ka dei ka khun jongu. Kumno phin leh?"

“Ngan kmen bad ngan shad kmen kein lada kan long kumta. Lada don tang uwei uba tip ia ka tynrai jongka ruh ka la biang. Kata hi kan phngoid kum ka jingsbai ia ka jingim jongka ka ban ialam sha ka jingsuk jingkmn bad jingkyrmn ia ka lawei jongka. Shu buh don u ban wan iathuh ba ka Brilian ka dei ka khun jongu, kumno ngan tip ba um shym kren lamler? Kumno ngan ithuh ia u ba u del u kpa jongka haba ngam pat ju iohi ia u mynno mynno ruh. Hood ia ka kmie nga lah ban dang ithuh lada ngan iohi bad nga dang kynmaw ia ka dur khmat jongka”.

“Shu buh u lah ban pynshisha ia kata.?”  
La ong biang u bah Dro.

“Lada lah ban leh kumta ka bha, hynrei kum kita ki jingpynshisha ki dei ban long kiba shai kum ka sngi bad khlem jingsogew artatien ei ei ruh em.” Ka la ong, ka da sngew lyngngoh balei u bah Dro u kren kumta.

U bah Dro u la peit sha u Maheh kum ban ong ia u ba ka la biang ba un sdang noh sa ma u haba u la krad lynti katta.

“Kong Sian” La ong u Maheh. Ha shu-wa ba ngan iathuh iaphi ia ki jingjia kiba la jia, nga kwah ban tip katto katne ki jingshisha. Nga ngeit ba phin ym sngew ei ei lada nga thlia ne pynsalia iaphi.”

"Yn lei ka, ia kaei kaei kaba nga tip ngan tyngkai lei." Ka la jubab bad peit sha u bad kwah ba un iathuh noh ia kita ki jingjia.

"Ka kmie jong ka Brillian ka dei ne em ka briew kaba lieh bhabriew bad kaba mih khmut mih khmat? La kylli u Maheh.

"Hooïd," La jubab ka Sian ka da leh lyngngoh." Kumno phi tip?

"Ap un da kylli shuwa u Maheh bad sa jubab maphi kumba ka long." La ong u bah Dro.

"Phi kynmaw ne em ba ka tikmie ka diang jongka ka pait pnat bad long artylli."

"Hooïd." La jubab ka Sian ka da kham leh lyngngoh shuh shuh.

"Phi kynmaw ne em ia ki thapbasim ki ba rit, uwei narum ka khmat khyndiat bad uwei napdeng ka tmoh?"

"Hooïd"

"Ka deng artylli ki sabti, kawei ka saht kyllain bad kawei pat baba don u mawlynnai saw" La ong u Maheh u da peit sha ka Siani.

"Hooïd nga kynmaw"

"Haba ka poi shane ka ong ba kan leh aiu?"

"Ka wan it bylla kit soh bad la ngi i shan khmat kumno re iaka ngim shym la kylli ei ei naka shaphang ka jingim jongka namar ka i thait bad i lwait palat. Ynda la dap kumba ar sngi lai sngi nga la sdang ban kylli. Hynrei kam shym iathuh ei ei ruh em bad ka kular ban sa iathuh lut ia kiei kiei baroh kham hadien namar ha kata ka por ka ong ba kam pat sngewkwah ban pyrkhath bad kynmaw ia ki jingjia ba sngewsih. Tang laisngi hadien kata ka la phet noh bad iehnoh ia la i khun bad ngi."

"Wat la ka wan it bylla, ngam tharai ba kan wan rah khoh rah star kumba leh lem kiwei kiwei."

"O em, ka khlem wanrah ei ei ruh em."

"Phi kynmaw don jingmong ei ei haneng shyllangmat i khyllung hamar lynti khlieh ha kata ka por?"

Ka Sian ka la sngap shipor. Kam sngew lah ban pyrkhath kumno une u briew u tip lut ia kiei shaphang jong ki.

"Ka don kein, ka la thap lhieh bad ka la shim por kham slem ba kan jem. Haduh mynta ka dien sohkhliang ka dang don nga tharai."

"Ka kieng ka pla iong kaba dang thymmai ba lasuh da ka jain sarot bad la ngam da tip thikna kiei ki tiar kiba ka thep hangta, hynrei la kumno kumno ka sohshkor shiliang ka lah ban don hangta."

“Ngam tip aiu ka mut, haba ka phet ka ieh-noh ia ka pla ka da teh ia ka ha ka syngkai ka Brillian. Ngi la peit don ioh don ei ei ka sabut shaphang jong ka hynrei ngim lap ei ei lait tang katto katne ki tiar, ki pisa arphew tyngka bad kata ka sohshkor tang shiliang.” La iathuh ka Sian. “Nga sngewkmen shibun eh ba phi tip shaphang jongki bad mynta ka tynrai jong ka bapli ka Brillian kan ym sah shuh ha ka jingdum. Nga la sngewsuk jai ka mynsiem bad lehse dei lyngba jongphi ba u Kynrad u la jubab ia ki jingduwai jongnga. phi ithuh ia ka Brillian ?”

“Ngam pat ju ia kynduh ne iohi shuh ia ka naduh ba ki iaphet na ing. Ha kata ka por ka dang kumba shisnem ei ei bad ngim pat buh kyrteng ia ka.”

“Phim shym buh kyrteng ? Phi iadei kumno bad ka ?

“Lada phi ong ba baroh kitei ki jingbatai shaphang jong ki ki iadei, ngam don jingartatien ei ei shuh mynta ba nga dei u kpa jongka.”

“Kumno kumta, phi leh aiu ba ki kylla wan phet wir shane, bad balei phim shym wad iaki ?” La kylli ka Sian kaba la sngewthuh mynta ba u dei shisha u kpa jong ka.

Hangta u la iathuh lut ia kata ka jingjia ka ba la palat arphew snem. Kumno ba u la ngop ha u bitor iong bad sngewtynnai ban pyntieng bad pyndik ia ka kmie ka Brillian. U la iathuh

ia ka jingjia ha kata ka mied, kumno da kaba mut ban shu pyntieng ia ka u la kawang da ka ba thew sharud, sniewbok ba ka kynriah bad ha kata ka jingkyriah ka shyieng doh ka la dei pynban ia i khun na ka khlieh. U la iathuh kumno ba ka la khie ka eriong erngit ha kata ka mied katba u um iohsngew ei ei ruh em. Kumno ki shem ba ki la jah bad ki la ioh ia ka jingsong bad ba ki la tharai iap iaki. Kumno u la shah behshnong hadien kata kumno u la poi sha bhoi bad iakynduh bad u bah Dro.

Ka Sian kam sngew nang ong ei ei shuh. Une u dei u kpa jong ka Brillian bad ka jingim jong ka kan sa suk sa sain. Hynrei haba ka pyrkhat na kawei pat ka liang, u lah ban ialam noh ia ka bad u ne sha la ki ba haing hasem, ka pang ka mynsiem namar kam sngewlah ban duh iaka bad ban pynlut ia ki sngi ba dangsah jong ka jingim jongka ha ka jinglong riew kynthei marwei khlem don mano mano ban pynshngaiñ ia ka jingim jong ka.

“Ap khyndiat mo! “Ka la ong bad ka la feng ban leit sha ing shetja ban tiew da ka sha. Tang shipor hi ka la wanphai.

“Lada slem eh ruh sa tang shipor ka khun jong phi ka la wan. Tip phin ithuh ne kumno iaka. La ong ka Sian ia u Maheh.

“Nga tharai lada kan don hapsedng shiphew hajar ruh, mynta ba nga la tip kumne, ngan ym bakla iaka. Naduh dang rit la ithuh shai ba ka bit iala ka kmie.”



U bah Dro u la shu sngap khlem kren ei ei shuh. Haba u la sngewthuh ba ka Brillian ka dei shisha ka khun u Mahch, um lah pyrkhath shuh ia kiei kiei kiba la jia baroh shi katta haduh kata ka khyllipmat ki dei ki jingpyniaid u Kynrad uba iohsngew ia ki jingduwai jong ka Sian ne ki la shu jia ryngkhat hi. U pyrkhath shaphang u Battle Field uba la dei ban wanphai bad lehse ha kata ka por u la poi pynban sha ing, bad bun kiwei pat ki jingpyrkhat kiba iadei bad u Battle Field bad ka Brillian.

Hadien katto katne por ka Brillan ka la wan. Tang shu iohsngew ia ka jingwan jong ka naduh na bar, baroh laingut ki la ia sngap noh. Ka Sian ka kyndeh ka mynsiem haba pyrkhath ba kan iohi ia ka Brillian kaba kan sa duh noh sa tang shipor. U bah Dro u la kwah ban iohi ia ka bad u tip ba kan sa lyngngoh haba kan iohi ia u hangta. U Mahch u la kyndeh ka mynsiem haba kane kan dei ka sien kaba nyngkong kaba un iohi biang ia la ka khun hadien ba u la duh iaka na pyrshah ki khmat jong u la palat arphew snem bad ia kaba u la tharai iap bad khlem kymen ei ei shuh ban dang iohi ia ka. Wat la na ki jingiakren u sngewthuh ba ka dei ka khun jong u, pynban ka don ka jingsngewtieng ba ioh kumno re kumno kam dei. U pyrkhath shitom jingmut kumno un leh bad kumno un kren iaka.

Ka Brillian ka bym shym poi pyrkhath ban don riew phylla ha ing namar ym ju don riew phylla hi ruh kiba iarung ia mih, ka la rung ha poh ing khlem da leh salia, kumba ka ju leh.

Ynda kala poi hangta, ka la kyndit kat lah kat ia haba ka la iohi ia u bah Dro bad ia uta u riew phylla.

Kam nang shuh ban pyrkhath la kan kren ne kan iaid beith Ka jing iohi jong ka ia u Bah Dro kham-tam ka la pynkyndeh ia ka da ka jingkyndeh ia u Battle Field.

“Wa i leh kum bym ithuh ! Balei phim kren ? La ong ka Sian ia ka Brillian haba ka la iohi ba ka i lehleh rain kumno re.

“Phi wan shane ?” La kylli ka Brillian ia u bah Dro.

“Hooidei kein.” La jubab u bah Dro.  
“Phi wan shano ?”

“Nga wan shim dawai na sha Laitkyndeh.” La jubab ka Brillian. U Maheh u la shu peit seh iaka. Um tip shuh kumno un ong. Ka khleng tylli shisha jlut ia ka dur ka kmie bad mynta um don jingartatien shuh ba ka dei ka khun jongu. Kam ithuh ia u bad ka i leh lehrein ia u. Um sngewdei ba un iathuh ma u ia kiei-kiei bad u la khmih lynti ba ka Sian kan sa iathuh ha ka ia kata.

Ka Sian ka la mut ban iathuh bad shisien arsien ka la sdang ban ang ia la ka shyntur hynrei ki kyntien kim mih satia namar ka pyrkhath kumno kata ka khubor kan ktah iaka.” Ia u briew u ba kam ithuh bad long nongwei haka, kumno kein kan sngew lada yn ia thuh ha ka ba u dei u kpa jongka.” Ka la pyrkhath ha lade.

U bah Dro u la jan ban ym ithuh shuh iaka. Ka la pher bak na kaba u la ju iohi iaka ha ki por ba ka dang don ha Shillong. Ka khmat ba iphuh samrkhie, ka jingdap doh bad jingsaw ki ngap jongka kim don shuh. Kum u briew uba la iaaid lyngba ia shibun kiei kiei ha ki por ka jinglong samla, u sngew-thuh ia ka daw jong kita baroh.

“Nang iashong mo.” La ong ka Brillian bad ka la leitnoh sha kawei pat ka kamra.

“Haba kumta kaci ka kyrteng jongphi?” La kylli ka Sian ia u Maheh.

“Ka kyrteng jong nga ka dei u Dring.” La jubab u Maheh.

Hadien ba ka la kylli bad ba u Dring u la iathuh ia ka shnong ka thaw ka jongu bad jong ka Brillian, ka Sian ka la kylli riang ia u shaphang ki ba ha iing ba hasem jongka. Ka la ong artad ia ka Brillian ba kan theh bad wanrah sha.

Ka Brillian ka leit theh sha ia ki bad ka la wanrah shata sha kamra pdeng.

U Dring ha kata ka por u dang poi ha ka ba u iathuh ia ki ba haiing ba hasem iongka bad ka Brillian ka la iohsngew tang ia ka bynta ka ba kut “..... ngam tip la i kiaw Tngen bad i kthaw Jmuin ki dang iadon ne kumno hynrei i kynum Norin te nga dang iohi ha utai bnai ha Motphran.”

“I kynum Norin aiu ita ?” La kylli ka ka Sian ka da leh lyngngoh.

Phim rat da ithuh. Hynrei lada phin iohi fa i tang shisien, ka la biang ba phin kynmaw ia i junom. I long u brieu uba kat u rainhah, phin ong ka met ka phad, ka rynieng ryniot ne kaei yn ia ong. I palat liam ia kiwei baroh kat kiba nga la iohi bad ia kyn-duh.” La batai u Maheh.

“Kata dei pynban i Mama ne ? “La ong ka Brillian ka bym shym tip aiu ki iakren. Ka jing iohsngew ia ka kyrterg ‘Norin’ bad ka jingbatai uta u brieu ia ka dur ka dar ka la wanrah biang ha ka ia ka jingkynmaw ia kito ki sngi bakmen jong ka jinglong khynnah jongka ha kiba u kpa jongka ruh u dang don. Uta u jingdeng ryndang uba u la ai iaka u dang don ha ka ryndang jong ka.” “I la ai ia nga une u jingdeng.” Ka la ong bad ka da ktah ia u bad pyni ha ki.

U Dring u la lyngngoh haba u sngewthuh ba ka Brillian ka la ia ithuh ithaw bha bad u. Norin bad khamtam na kata ka jing-khot Mama jongka ia u u la pyrkhath beit ba ka tip ba u dei u kni jongka. U la sdang ban suba ba ki jingiathuh ka Sian shaphang jongki ki lah ban long kibym shisha.

U Bah Dro ruh u la sngew lyngngoh lang.

Ka Sian ha ka ba nyngkong ka la sngew wit kumno re shaphang u Dring ba u dei u u kpa ka Brillian. Ka shu sngewjem khyndiat ka mynsiem namar ba u iawan lang bad u ia ithuh ithaw bha bad u bah Dro. Haba ka la iohsngew ba u iathuh ba u Norin uba ka ju sngew ia u kum la u ba ha iing ba hasem u dei u kñi jongka, ka la sngew-lun bad kham sngewtynnaf.

“Hangno phi ia ithuh? kumno phi tip ba i dei i kñi jongphi” La kylli u Dring ia ka Brilian.

“I la wan sah shane katto katne por.” La iathuh ka Brillian.

U Dring u la kham sngew lyngngoh shuh shuh balei u Norin un wan poi sah kumta sha ing ka Sian.” Ki i-dei aiu? Kumno ka lah ban long? U la kylli halade.

“Imat u poikha shane ne kumno?” Um sngewlah pyrkhat ia kita kiei kiei baroh. Um sngewnud ruh ban kylli ei ei namar u pyrkhat ba lada u Norin u la wan sah kumta bad ki la ithuh ithaw, balei um ialam noh iaka sha shnong? Balei kim leit iapeit ia ka Khuri Balei ba ka Sian ka ong ba kam tip ia ka tynrai jongka? Khlem pep kin iathuh khana ha ka ia ka jinglong basniew jongnga u kpa jongka.” U la pyrkhat halade.

U la don ka jingmut ban pynithuh noh ialade haba ka Sian kam man pynithuh satia ia u ha ka haduh kata ka khyllipmat. Hyn-

rei u sheptieng ba ioh haba la buh haka da kitei ki jingsngew ki ban pynlong iaka ban pyrkhat ba u kpa jongka u long u ba sniew, ka lah ban ym pdiang ia kata ka khubor kum ka khubor babba Kumta u la sangeh shuwa haduh ba un da ioh ne thaw lad ia ka por kaba biang bad kaba iadei ban leh kumta.

“Phi la ju leit sha shnong? U la kylli ia ka Brillian.

“Ka shnong aiu?” La kylli kylla ka Brillian.

“Wa, sha shnong kein.” La ong biang u Maheh uba da sngewlyngngoh balei ba kam tip iala ka shnong.

Ka Brillian ruh ka la leh lyngngoh bad peit sha u namar kam pei phang ei ei ia kata ka jingkylli jonou.

Ka Sian ka la sngew ba ka por ka la dei ba ka Brillian kan tip noh ia ka jingshisha. Hynrei ioh kumno kumno kan sngew noh Mynsiem, ka la pyrkhat ban sa pynbiang ia kata da ka ba iathuh syndon ia kiei kiei kiba iadei hapdeng jongka bad u Battle Field bad ka khubor babba ba kam don ei ei shuh kata wit ba khang ba kin iapoi kha. Kumta ka la phai sha u bah Dro ban wad shuwa ia ka jingmynjur jonou.

“Bah Dro.” La ong ka Sian. “Phi kynmaw ia kato ka jingiakren jongngi shaphang kito ki shijur ki paro kiba mynta ki ia ud khur shi khur namar ba ki iajngai iwei na iwei?”

U bah Dro u la sngewthuh hynrei u Ma-heh bad ka Brillian ki la shu ia ang lyngngoh namar kim pei phang ei ei ia kata.

“Hooïd” La jubab u bah Dro.

“Mynta ba la lap ia ka daw ia ka tynrai, la long em ban ia set noh syndon iaki ha kajuh ka sem?”

“Ym long balei? Dei kata kein kaba la pynsngew ba kane mynta ruh ka dei shi bynta na ka kam kaba nga ruh nga iadon bynta. “La phai ktien u bah Dro”.

“To kata nga tharai ka la biang ban pynshai noh syndon kdar ia kiei kiei baroh. Peit shane Brillian, ha shuwa ba ngin iapoi sha kiei kiei kiba kham donkam ngan iathuh iaphi ia ka jingiathuh khana shaphang ka jingim jongphi ia kaba nga la buhrieh baroh shi katta. Phin buh lypa ruh hala ka jingmut, ba ine i bah Dro bad ine i kpa jongphi ki la iawan khnang naduh Shillong na ka bynta kane.

Ka Brillian ka la iohsngew ba ka Sian ka pynkam kpa ia uta u briew. Hangta ka la kynmaw khliak ba ha kawei ka sngi katba ka dang laid lynti hangta ha shnong ka la iohsngew ia kawei ka tymmen kaba kylli ia ka paralok shaphang jongka “Katai ka khynnah, kam dei kato kaba wan poi wir kaba ki ri ki jong ka Sian?”

“Hooïd” Ka la iohsngew ba ka jubab kata kawei pat.

Kata ka la bat la ka jingmut jingpyrkhat ka Brillian bad ka la mut halade ba kan sa kylli ia kata na ka Sian.

“I pa i la iap, u kpa aiu pat une?” Ka la pyrkhat. Ka la ju ieit bad burom ia u Miat kum u kpa bad ka mynsiem jongka ka la sdang khiih bitar namar kam sngew lah shah lada ong ba ka dei kpa ia uwei pat lait na u Miat uba ka tip kum u kpa jongka uba da ieit shisha iaka kat haduh wat la u la iap lyndet naka, u da wan ban doh ban dait iaka ha ka jingphohsniew. Ka kham sngewtynn timer ba ka dei kpa ia u Miat uba la iap ban ia uwei pat uba dang im. “Ngan sngap shuwa aiu in iathuh, lehse i shu kum bakla kren.” Ka la ong halade.

Ka Sian ka la sangeh shipor ban pyrkhat ha kano ka rukom kan iathuh ia kiei kiei.

Ka la lap ia kawei ka buit. U bah Dro bad u Dring ki la shu sngap kumno ka Sian kan iathuh.

“Shisien ha kawei ka por.” La sdang ka Sian. “La don u kpa, ka kmie bad i khun kynthei iba dang rit. La don ka jingjia hangta ha ing jongki kaba la pynlong iaki ban iapoi la ka jong ka jong. U kpa u mut ba ka kmie bad ka khun ki la iap, ka kmie ka pyrkhat ba u kpa u la iap bad ka khun kam pat tip ia ka bneng ka khyndew. Naduh ba ka dang rit la ri la sumar bad pynsan pynheh iaka da kiwei pat kiba ka la sngew iaki kum



la ki jong ki kmie ki kpa bad maki ruh ki la sngew iaka kum la ka khun. Ha ka shnong trai jongka kiba haing ba hasem ki don bun. Ka kmierad, u kparad u kñi bad kiwei kiwei de ki dang iadon hangta. U kñi u la iakyn-duh bad ithuh bha iala ka pyrsa ha ki por ba ka dangrit bad u ju ieit iaka shikatdei eh. Hynrei kim iatip satia ia kata ka jingiadei kñi iadei pyrsa jongki.

Ka Brillian ka la sngap bha dngong bad sngewtynnat ia kata ka jingiathuh. Ka la sngew lyngngoh balei ka kmie jongka ka iathuh khana kumta." Nangta pat? La kylli ka Brillian haba ka Sian ka la sangeh khyn-diat ban pyrkhat sa kumno kan ong.

"Kiei kiei baroh sngew kumba ki iaidei beiti iaidei ryntih wat la ki dei ban iakynduh ia shibun ki jingeh. Hynrei ynda ka la sdang ban iaieiti samla bad uwei u briew, ka la wan ka jingeh ban pyniabuh iaki namar katkum ka rukom khasi ka long kaba ma ban leh kumta lada ym tip ia ka jait ka khong. Nga la klet ban iathuh ba kita kiba ri iaka kim tip ia ka jait ka khong jongka mo?" La pyn mynjur ka Sian ia u bah Dro bad ia u Dring.

"Hooi"

"Hooi"

Ka Brillian ka nang sngewlyngngoh shuh shuh ba maki ruh i kumba ki tip ia kata. "Kaei ka jingmut ba ka iathuh ha nga ia kata ka jingiathuh khana?" Ka la kylli halade. Ka la sdang ban suba ba ka don ka jingthmu aiu re aiu ha lyndet jongka.

"U la pyrshang bun ki lad bad la ialeh kat-balah ban wad ia ka tynrai jongka hynrei baroh ki shu long lehnohei. Kumta ka bapli ka la dei ban sah marwei khlem lok khlem khun wat ha la ka jinglong briew ka don ia ka jinglong kynthei ba biang pura, met bad mynsiem, bad ka jingieit samla kumba long lem kiwei kiwei. Kumta ngi lah ban ong ba ka la long hi kum kaba iap hapteng kiba im haba ia kren shaphang jongka ha ka liang ka poi kha poi man para khasi khara.

"Kumno uta u kñi um ithuh iaka ka pyrsa?"  
La kylll ka Brillian.

"Ha kata ka jingjia, ka kmie bad i khun ki la poi ha kawei pat ka shnong kaba jngai bah. Ka khun ha kata ka por ka dang kumba shisnem. Haden arsngei laisngi ka kmie ka la jah ym tip shuh shano bad kumta ia kata ka khun la ri bad pynheh pynsan da kita kiba ai ing basa iaki. U kñi u la poi sah ha kata ka shnong bad ha kata hi ka ing hadien kumba shiphew ne khatar snem. Dei na kata ka daw ba um ithuh shuh lala ka pyrsa." La batai u bah Dro.

"Ni sngew synei mo ka bapli!" La ong ka Brillian, kaba mynta kata ka jingiathuh ka la pynlong iaka ban klet ia ka jingsngewiapher hapdeng jongki.

"Hynrei da ka jingpyniaid ba nalar, la lap ia ka sabut ba u kpa bad ka khun kin ia ithuh ithaw. Hynrei ia ka kmie te ym tip shuh." La ong ka Sian.

"Ka kmie ruh la sngewthuh ba ka don ha kawei pat ka jaka kaba kham jngai." La iathuh u Dring.

"Kumno uta u kpa bad kata ka khun ki ia tip bad ia ithuh ithaw hadien?" La kylli ka Brillian kaba la sngew lynga ia kata ka jingiathuh ba sngew kyllaiñ jongki. Ka kwah ban tip noh ia ka ba kut bad kyrmen halade ba kin ia ithuh bad ia kynduh.

"Brillian, wat leit sngewphylla ne sngewkyndit ei ei." La ong ka Sian. "Kata ka long ka jingjia ha ka ing ka sem jongphi hi. Brillian, phim dei ka khun jongngi kumba phi la ju pyrkhat baroh shi katta. Phi dei ka khun jong kata ka briew kaba wan pol shane kaba da bah lang iaphi bad kaba la shu jah noh shaei ym tip shuh. I ma ma Norin i dei shisha i kñi trai jongphi iba shi para bad ita i mei jongphi. Ine pat i dei i kpa jongphi." La ong ka Sian ka da pyni dak ha ka ba u dei uta u briew uba don hangta hakmat jongka.

Ka Brillian kam sngew lah pyrkhatei ei shuh haba ka la iohsngew ia kita kiei kiei kiba kam pat ju iohsngew bad poi pyrkhatei ban iohsngew. Ka mynsiem jongka ka la noh ian haba ka la tip ba u Miat bad ka Sian kiba ka la ieit lung mynsiem, kim dei ki kmie ki kpa jongka. Ka long kaba eh ban pyrkhatei kumno kan sngew haba ka tip ba u Norin u dei shisha u kni jongka? Kumno kan sngew haba ka tip ba ka shnong Tyrna kaba ka la ju sngew trai, kam dei ka shnong jongka? Kumno kan sngew haba ka tip ba une u brieve uba don hakmat jongka uba long u nongwei uba kam ju tip ne ithuh mynno mynno u dei pynban u kpa jongka?

Kine ki la long palat than iaka. Ki ummat ki la shlei ha ki khmat jongka ki ummat ba la pynlong da ka jingiakhleh jong bun jait ki jingsngew. Kam sngew nang ban kren ne ong ei ei ia uta u kpa jongka bad kam sngew lah wat tang ban khyllie iala ki khmat.

"Ita i kmie kane ka Brillian pat i don shano haba kumta? La kylli ka Sian ia u Dring.

Katba ngi sngewthub, i don sha dkhar. La katta ruh ngin hap ban da ialeit ban pynthikna ia kata." La ong u Dring.

Ki la iakren slem ia kiei kiei kiba donkam. Ki sngew ba dei ban ialeh noh bak bak ha kaba pynia ithuh ithaw ia la ki ba-

haing ba hasem. Khatduh, la khang tala ia ka ing ka Sian ha Tyrna bad ki la ia wan sha Shillong.

U Dring u la thied jaka bad shna ing kaba heh bad kaba itynnat ha Laitumkhrach. U la leh ia kane da kaba pyrkhat ba haba ki sngi ka jinglong tymmen jongu kin poi bad ba un ym lah shuh ban khiih ban kamai, un pynleit iala ki sngi hangta. Ka ing jongu ka long armala. Ia ka mala kaba shapoh u la aiwai bad ki la iashong hangta bun kynrad. Ia kaba shalor ruh u la aiwai lait noh sa tang lai tylli ki kamra ba u shait wansah ialade haba u wan sha sor. U dang pyrkhat ban thied jaka sa kawei hangta hi hajan ban ioh shna ing aiwai kbnang ba un ioh bam pahuh bad ai jingiarap ia kiba duk ba shitom.

Ka nam u Maheh ka la phriang kum u brierw uba sbun bad uba jynjur mynsiem. Ha ki kam shnong kam thaw bad ki kam ki samla shnong kum ki kam bam khana bad kiwei kiwei, u ju ai noh kylluid. Um ju pynleit thylli ia kito kiba wan pan jingiarap na u bad u pynnoh la u synniang u bynhei lajan haman la ki jingthmu babha baroh. La ju ong shaphang jongu ba lada u kwah, kan ym don jingeh ia u ba un kiew ha ki kyrdan ba heh ba hain ha ki kam sain hima sima wat lada um shym biang ka jingnang jingstad. Ki la don shibun kiba ai jingmut kumfa ia u pynban u sngewthuh iala ka bor bad ka jingbym lah jongu ban leh kam babha ei ei ia kiwei lyngba

kum kita ki jingkit khlieh ha kiba um don  
ka sap ne ka jingdem ka mon.

Hapdeng kita baroh, ki don katto katne  
kiba shu leh ieit leh sngewbha ia u namar ki  
jingmyntoi ba ki ioh ne khmih lynti na u. Ki  
don ruh ki kynja riewsniew kiba haba ki i  
ia ka jinglong marwei jongu bad ia ka spah  
kaba u don ki thmu ban shim kabu khlem  
kheifn ia ka sang ban ioh bam ioh dih na ka  
umsyep ki jingtrei shitom jongu.

Ka la don kawei ka khun jong kawei na  
kiba shongwai ha ka mala kaba hapoh jongka  
ing jongu. Kane ka la iohi ia kitei kiei kiei.  
Ym tip la ki don ki nongpynshlur ne ka la  
palat than ka jingkwah spah jongka, ka la ju  
wan barabor sha u haba u wan sah kumta.

Ha kaba nyngkong, u Dring u sngewtyn-  
nat ia ka kum iala ka khun ka pyrsa bad u  
kren bha kren miat iaka bad phah tiew sha  
ne phah shet ja teng teng. Ka leh rit bad  
leh burom ruh ia u haduh katta katta. Hyn-  
rei katba ki sngi ki nang iaide, u shem ba  
ki rukom leh jongka ki la nang pher nang  
pher na kiba ka ju long. Ha kaba mynshuwa  
ka ju khot ma ma ia u. Hynrei kata ka  
jingkhot ma ma jongka ka la nangjah nang-  
jah haduh ba ka la poi ha u pud ba ha ka  
jaka ban ong—"Phin bam noh ma ma?" ka  
ka ong "Ei phin bam noh?"

Ka Sian bad ka Brillian kila shu ang lyng-  
ngoh haba u Dring 'u la pyni kham na jngai  
ia kawei ka ing bangla bad iathuh iaki ba  
kata ka dei ka ing jongu. Ynda ki la rung  
lei hapoh ing bad iohi ia ki jingbuh jingsad  
bad ki tiar ki tar kiba don hangta, ki sngew  
kumba ki la don ha kawei pat ka pyrthei.

Ka Sian ka la kwah ban ia leit lang bad  
ki sha shnong u Nörin ha kata ka sngi kaba  
bud. Hynrei jia namar ba ka leit pher ka  
rukom bam ha kata ka sngi, ka la ioh shitom  
kpoh noh.

U bah Dro u la donkam ban leit jingleit  
kyrkieh ha kata ka sngi kaba bud bad kumta  
um shym ioh ban ialeit lang bad ki. U Bat-  
tle Field un jin da leit lada u la tip. Hyn-  
rei ym shym iathuh ei ei ia u shaphang ka-  
ta bad um shym nud hi ruh ban kylli ei ei.

Kumta ki la hap ban ialeit hi tang arngut  
shikpa shi khun sha shnong kiba haing ba  
hasem ka Brillian.



U Norin u sngew kumba u im marwei ha ka pyrthei kaba um lah ban sngewthuh. Kum u kñi rangbah ba dang shong ing kur u la ju pyrkhath barabor tang shaphang ka bha ka miat jong ki para ki pyrsa bad khlem da salia iala ka met u ju beh u ju rap ha ki jynjar ki shitom jongki. U peit khmih lynti ba kin leh tipsngi bad kohnguh sneng bad pyrkhath ba ki para arkmie ruh kin iamir jingmut lang bad u.

Hynrei hadien ka jingjia ba sngewsih na ka bynta ka Mina, u sngewthuh ba u long uba khlem iktiar ei ei hapoh la ka kur ka jait. U shem ba ka jingdon jongu ka long pynban ka jingpynwit bad ka jingpynthut iaki. Um poi pyrkhath ei ei ba da ka Mina kaba u ieit thep mynsiem eh bad kaba la ju kohnguh ia u kan tam sneng bad kam salia ei ei ia u. Kane ka la pyn sngewblad bad pyn sngewblaw ia ka jingim jong u. Lehnohei ki jinglehshitom jongu baroh, ki jingpynstad pynnang jongu ia ka. Ka bainong kaba u ioh ka long ka jing shah ibelñ bad shah niewbeñ.

Naduh kata um ju leit iuhkhat shuh ha ing ki pyrsa: U la leit shong leit sah sha ka jaka rep. U la pynlut ia ki sngi ki por jongu hapdeng ki jingthung bad ki jingri ban pyn hun bad pynklet ia ka jing-sngewsih jongu. "Nga sngewthuh ba ngan iap ngan im marwei" U la ong halade, bad kumta u la sdang ban dih bhor mutlop sa da ka kiad, ha ka por



mied. U thnum u thnam marwei marwei hapoh khlaw bad u ud u bynniaw iala ka jing shem.

Katba nangan ka sngi pynhiar synjat jong ka Mina bad u Rai, katta ka jingsngew-sih jongu ka nang jur. Ha ka sngi pynhiar synjat lei, namar ba um sngew lah shuh ban pyrkhath, u la dih sat naduh dang 'step' ngir khnang ba un klet. Pynban um shym klet. U shem ba u kum pyrkhath shi pyrkhath shaphang la ki para ki pyrka. Hateng hateng u sngew kumba un leit la ka leit mih sha ka jing shongkurim. Hynrei haba u la pynshongnia ba lade, um sngewlah ban leit namar ym shym don mano-mano ba wan khroh ia u kaba pyni ba kim kwah ne khein briew ia u.

Sa shisien pat ka jingmut jingpyrkhath jongu ki her sha kito ki sngi kiba la leitnoh. U kynmaw ia ka Brillian ka khynnah kaba u ju pyrkhath bad kynmaw barabor. U kynmaw ia ka jingkohnguh bad jingieit jongka ia u. Kumno katta ka la long? Shano ka la don? ka dang kynmaw ne em ia u? Kin dang ia ithuh ne em iwei ia iwei lada jia ba kin ia kynduh hangno hangno ha sla jong kane ka pyrthei? U Miat bad ka Sian kumno ki ialong?

"Ngan sa shang pyrthei biang noh". U la ong ha lade. Ngan leitkai biang sa shisien sha Tyrna, nga tharai ki dang ia kynmaw langa. Nga kwah ban tip kumno ki ialong.

Katba u dang pyrkhath kumne la wan mih uwei na ki pyrtha shynrang uba la samla. U Norin u la iohi ia ka jingwan jongu bad u la sngewlyngngoh balei u i kyrkieh kumta.

"Ma ma, i phah khot i Meirad iaphi, i ong wan noh bak bak."

"Balei jia aiu"

"I ong ba la wan i kong."

"Ngam ithuh iano iano." La phai ktien u Norin da ka jingbitar namar ba u pyrkhath ba ka Mina ka leit sha ing jongu.

"I wan i kong na sha sor te." La iathuh biang uta u pyrtha.

"He, wat kren danda holih. Da ma me ruh me la nud ban wan kren ianga kum ia uto u bieit. I kong sor aiu ita? Me kwah iap ne kwah im khun ka khynnah jakrak pha nud ban wan thok wan kren kai kat ia u kfi kum ia u khyllung. Haba nga la sah khnang shane ba nga salia ioh nga sa kum dom briew, pha iawan pyndom pynban. Mano ba phah iame ban wan ong kumta? Iathuh kloi ba ngan leit pjar snam lada mem iathuh, ngan pjar iame mynta" La byrthen u Norin u da bat ia u na ka kti.

"Map ma ma, map ma ma, pyllait kloi la kheiñ ka kti, peit une hapoh pla, ki ong ban pyni haphi,"

“U ei uta, ? pyni kloï?”

Uta u pyrsa u la sei ia u ei re u ei napoh pla bad u la ai ha u” Norin. U Norin u la shim bad peit luk liak.

“U ei une ? Ka mut aiu ban wan pyni hanga da une kum ia u khyllung ?”

“Ngam tip ei ei, ki ong ba une un pynkynmaw iaphi ia ita i kong sor.”

U Norin u la pyrkhat shipor bad uta u pyrsa jongu u ithuh ba u kñi jongu u kylla dur.

“I kong aiu ki ia ong, me iohsngew?”

“Ki ia ong i kong Brillian ne i ei kumto ? La jubab uta u pyrsa.

“I kong Brillian ?” La leh kyndit u Norin. I kong Brillian i wan shane ? I long kumno ? I don haei ? I wan bad no ? Kumno i tip ba nga don shane ? Balei i wan it ianga ? Jia aiu ? .....  
U la kylli jingkylli khlem sangeh bad khlem da ap jubab. “Hooïd une u dei u kynjri uba nga ai ia ka shiphew khatar snem mynshuwa. Ia me ngin ia leit, ia bak bak.”

Kumta ki la iawan kyrkieh dar dar sha shnong hynrei haba ki la poi ha ing, la ia-thuh iaki ba ki la ialeit sha ing khawai.

“Ngam sngewthuh sngewthaw balei ka Brillian ka leit sha ing khawai, kumno kan ia ithuh ? Kumno ki ruh kin shu ialam iaka

sha ing khawai, haba ka wan it ianga ? Lada ka wan it iang ka dei ban don ki jingeh lym kumta kan leit wan lei shaduh kane ka pyrthei ? Balei kein i mei i leit ialam pynban iaka sha ing khawai."

Ki jingpyrkhat jongu ki thnam. Ka jingkwah jongu ban iohi ia ka Brillian ka la pynlong ia u ban klet ia kiei kiei baroh bad hadien shipor u la poi hangta ha ing ka Melinda.

"Ka la wan ka Brillian" La iathuh ia u ha phyllaw, ki dang iathuh ei ei nalar kata hynrei um pynsngap iaki.

"Hangno ka don?" U la kylli bad u la rung artad sha ing. Ka bneng bad ka khyndew u sngew kumba ka la iakynduh lang haba da la ki jong ki khmat u la iohi shisha ia ka Brillian kaba wan mih napoh kamra ban iakynduh ia u.

"Ma ma!" Ka la pyrta da ka sur kaba jam ka da iam artat bhuk da ka jingkmien ka da piam bad da doh da dait ia u, "Ma-ma ko ma ma ngam poi pyrkhat ba phi dei shisha i ma ma jongnga" Ka la ong.

U la shu ieng hangta kum u bieit khlem sngewthuh ne shemphang aiu ka mut da kita ki kyntien.

"kumno i Mei i pa ki ialong? Phi ia-wan badno shane?" La kylli-u Norin.

Shuwa ba kan ialt ban jubab ka kmie jong u ka la jubab.

“Kane ka dei ka khun ka Khuri.”

Kumno kumta? La kylli u Norin bad u la peit shipor ia ka Brillian. Dei hangta ba uta u lyoh bajngut uba la ju tap ia ka jingmut jingpyrkhat jongu haba u pyrkhat shaphang jongka u pra kynsan war.

“Hooïd ka khlóng shisha jlut ia ka dur i kong, bad nga la iohi iaka ha ka por ba ka dang rit. Dei kata kaba la pyn pyrkhat ianga ba nga la ju ichi bad iakynduh iaka shuwa ba ngan poi sha Tyrna.”

“Dei shisha kumta Brillian” U la kwah ban pynthikna na ka.

“Hooïd ma ma, hynrei ngan sa iathuh ia kiei kiei baroh la shibit ynda la dep ka-ne ka kam. Shong ma ma, dih noh da ka sha.”

U la jia long kum u khyllung u bym tip ia ka bneng ka khyndew. Kumta u la shong ha kamra pdeng da ka jing bym sngew lah ngeit ba kiei kiei baroh ki long kiba shisha.

“Lada ka Brillian ka dei ka khun i kong. ka mut ba i kong i lah ban dang imbad poi shaduh Tyrna. Hynrei jia aiu pat hadien kata? Shish ba ngan da kylli ha kato ka por ba nga dang don ha Tyrna la biang.

Hadien shipor ka kmie jongu ka la mih na kawei ka kamra bad iaid lyngba ka kamra pdeng bad mih sha phyllaw. U Norin um sngew lah shah u la bud ia la ka kmie kum u khyllung.

“Mei,? Mei, ap hangto khyndiat.”

Ka kmie ka la ap ia u bad u la leit sha ka.

“I Kong pat shano ?” U la kylli.

“Ka don sngewmat ha kawei ka jaka. Ngin sa ia kren bha la shibit ynda la ia dep kam dep jam.” La kren jyndat ka kmie namar ba kyrkieh kam.

“U Kpa ka Brillian ruh un sa wan on ia u Rai la shibit.” La iathuh ka Shaimon katba ka dang wanrah sha biang ia u.

“He,” la leh kyndit u Norin. Mar kumta ka la kiew ka jingbitar jongu kaba um pat ju don kat kata.

“ Ngan pjar snam.” U la byrthen haduh ba ka Shaimon bad kita iadon hangta baroh ki la tieng bad lyngngoh.

“ Shi shi shi . . Da sngap shuwa seh.” La ong ka Shaimon.

“Ngan sa ioh mynta ka snigi, Katne pha wan leh ia ka iing ka sem jongnga ? Sa peit.” La byrngem biang u Norin.

Ki la ia khroh ia u da kumpe bad da kumtai, hynrei long lehnohei Lada kim lah ban tem ia u ka mut kan don ka jingklumar bad ka

jingiap briew, hapdeng jong kata ka kam khawai. Baroh ki la ia klumar jingmut bad don kiba la mut sa ban leit maham noh sha ing u shynrang ba kim dei ban wan. Mano ban lah ban bat ia u Norin lada u la bitar? Mano ban tip aiu un leh? Yn don ba lah ban iathuh lypa. Ka jingtieng bad jingdum jingmut ka la synshar haba u ramhah u la khie bitar bad wad ban pynhiar kput.

Ka Brillian kaba dang bunkam shapoh kamra ha kaba pynkhreh pynkhrum ia ka Mina, ka la iohsngew ia ka jingiakren hum hum ham ham kumba don jingklumar.

“Kaei kata” La kylli ka Brillian ia ka Mina.

“Wei la don ka mendih haei haei te sa tang ka kaw kaw bad klumar suda.” La phai ktien ka Mina.

“U Mindih aiu?” Ka la kylli biang.

“I Ma ma Norin kein. Im suk ia kane ka jing iapoi kha jongnga namar i ong ba nga iapoi bad u briew uba na ka ing kaba la ia don daw sniew. Ngim shym khot ia i hynrei agam tip balei i wan. Imat i wan khnang ban pynklumar bad pynpulom ia kane ka kam.” La iathuh ka Mina.

Ka Brillina ka la iehnoh ia ka Mina hangta. Kam sngew lah ngeit ba u Norin un long ha kuta ka jinglong. Haba ka la poi ha kamra pang ka la iohi shisha ia u ba u phong ia ka dur shaba i tieng ban peit. “Shano ka jah kato ka khmat ba

i ieit i ma ma” Ka la ong ha lade namar kam pat ju iohi mynno mynno ia ka khmat ba dom briew jongu. Shipor ka la shu peit bad haba ka la ithuh ba ym don mano mano ba lah ban tem ia u, ka la tur shakhmat.

“Ma ma, ma ma, Balei phi leh kumne?” Ka la kren jam ia u.

“Tang shu iohsngew ia ka sur jongka, u Norin i kumba u leh tip briew kynsan. Kumba ka la long shisien ha Mawmluh. u Norin u la lah ban pynjem iaka ka mynsiem tang shu iohsngew bad iohi iaka.

“Phi i Brillian, nga dom ia u kpa jongphi uba la pynwan katne ki kynrum kynram ha ka ing jongogi.” U la jubab.

“Em ma ma, phim shym tip ia ka jingshisha Lada phi la tip, phin sa sngew da kumwei pat shaphang jongi. Ha ka jingshisha lada im don ma i, ngim rat da ia kynduh da kumne ngin shu ia sah khlem tip ia ka jingshisha ba nga dei ka pyrsa jongphi. I Mei ruh ngi sngewthuh i dang don. Ngia ong em mama ia phi ba ngin sa lathuh ia kiei kiei baroh la shibit ynda la dep ka kam.

Nga la lap ka jingsngew dom haba nga pyrkhat ia kiei kiei, hynrei ngam shyn tip ia ki jingshisha. Lada phi ong kumta nga ngeit ia ki kyntien jongphi. “La ong u Norin da ka sur kaba jem bad da ithuh ba ka jingbitar jongu ka da um noh haba u la phong biang da ka dur ba i jai jai.



U la kwah ban kylli iaka shibun kiei kiei shaphang u Miat bad bun kiwei kiwei pat, hynrei ka por bad ka jaka kam shah ia u ban leh kumta. U la shu pynhun noh ia lade ba un sa tip ha kata ka mied ia kiei kiei kiba u donkam ban tip bad u kwah ba kata ka sngi kan kut noh kloï.

Hadien kata la jia kawei ka jingjia ha ing ia-iathoh. Ha kaba nyngkong ka jingiakren ka la long sop sop tang para ba iadei kam bad ba la ia iohi eh pyllein. Hynrei ha kaba khadduh ki shem ba ka long ka kam kaba dei ban ialum bad ia pynkhat baroh shikpoh. Kata ka long ba u sniang uba ki la pyniap na ka bynta ka jingkha-wai, u sop da ka pisa (Jynreiñ) suda.

Khlem iathuh ei ei ia ka Mina shaphang ka-ta ba ioh ka pyndiaw bad pynsgewsih ia ka ha ka por kaba ka dei ban i kmen i bha briew, baroh ki khun bad ki pyrsa kurim ka Sara kila ialum ha ing jong ka.

“Ngin ialeh kumno” La ong ka Sara “La poi sha ka jinglehrain”

“Balei la bun palat?”

“Ani shu prip hi kein, ym lah leh eiei shuh.”

“Phi iakut kumno bad u Stap.?”

“Ngi la ia wan keiñ, u ong yn leh shuh kumno haba la dep ka iasiew iatda. Lada don da uwei ruh u ong ba un shu aiei noh. Kato ka

pisa kaba ngi siew ha u ruh u ong ba u la siew ram noh ha uwei u briew tang shu mih ma ngi. Lada kan dang don u ong u kloï ban pynghai noh baroh, hynrei un leh kumno haba kam don shuh.

“Kata kein la ia bakla lang baroh hangta. Ngì ong iaki nongkem sniang ba kin leit kem ia u sniang bad ngi ia shu shaniah beit ba ki la tip ia la ka kam ba kin da peit shuwa ba kin rah bad siew pisa. Ki nongkem sniang pat ki ia shaniah ba ngi la dep peit bad iakut katba donkam ki la shu kem beit. Ki nongpyniap sniang ruh kim da salia bad peit ia kata ha ka por ba kin pyniap ha kaba ia shaniah kumta. Te la ia bakla lang baroh.”

“Yn ialeh kumno kata ?”

“Tip kein, ka pisa ba la mang ruh ka la lut khoit. Jia ryngkhat ruh ha kum kane ka por ba kyrduh.”

Ym don lad da kumwei pat khatduh ha ka jingbym banse ka Sara ka la ai jingmut.

“Yn ialeh kumno, pyrshang noh na I Kong? La kylli ka Sara.

“Phi tip hi ba ka la kthang shaphang ka Mina bad ba im-suk, I shu wan ruh da ka jingbym banse. Phi tharai in ai? Nga tieng ioh I kyrkoh pynban.”

“Kata te kaba shai” la ban ktien ka Tilda.

Kumta ha kaba khatduh da ka jingbymbanse ki la iarai ban pan kylliang na ka Tngen. Ki la iapra noh nangta bad leit iapeit ia ki kam ki jam kum bym shym jia ei-ei bad ieh iaka Sara ba kan iakren bad ka Tngen shaphang kata.

Ka Sara ka la pisa bad lynga haba katno katno ruh kam lap iaka Tngen. Kala leit peit sha ing jong ka ruh kam don. U Norin ruh um don, u kpa u Norin uba don hangta ruh um tip shano ki ialeit.

Kiba ha ing baroh ki la sdang ban lynga bad kim nang ban leh ei ei shuh. Ki la shu iapeit iwei ia iwei.

Hadien shipor ki la iohsngew ba pah sniang keh shi keh kham na jngai. Ha kaba nyngkong kim da salia eh ban sngap hynrei haba ki sngew ba ka jiangpah ka la nangjan nangjan, ki la sdang ban pyashah shkor bha.

Ha kaba khatduh ki la ang lyngngoh baroh phar haba ki iohi ia u Norin ba u wan bah artylli ki sniang kiba heh, u da teh ha u slej uwei shakmat bad uwei shadien. U la bynshet btuk hangta ba phyllaw bad baroh ar ki pah 'keh' da ka sur kaba jam.

"Shim kein ialeh ia kaba donkam." Mynta ka dei ka sngi ban iabam bad ialeh sngewbha ar shah ia kaba ngi mang.

Sa hadien shipor la waa mih ka Tngen bad ka Shaimon ki da kit mar shiruh ki syiar bad 'iar shynrang bad 'iar kynthei bad wan buh nangta.

Naduh kata, ka jingiasngewbha sngewtynnat ha ki ing jong kine ki arkpoh ka la wan phai biang.

Ha kata ka miet la iathuh bad pynshai ia kiei kiei baroh ha u Norin. Ki la ia kren ia pyrkhat ruh ia kiei kiei kiba ki dei ban leh.



### xix

Ka Brillian hadien ba ka la wanphai na shnong ka la sngew thait sngew jrem bad ym sngew lah shuh ban ialeit sha Tezpur. U kpa jongka ruh haba u la iohi ia kata u la ong iaka ba kan shong noh bad ka Sian ha ing namar ka long ka lynti ba jngai bad kawei ruh ka jaka ri dkhar ka lah ban ym iadei met bad ka.

U Dring, u bah Dro, U Norin u Battle Field bad uta u nongtrei jongki uba la trei hangta ha Mental Hospital mynshuwa ki la iamih dang step ban leit peit ia ka Khuri. Ki kyrmen ba wat lada ka Sian bad ka Brillian kim lah ban ialeit ryngkat lang, u Dring bad u Norin hi ki la biang ban pynshisha ia kiei kiei kiba iadei shaphang ki sngi ba la leit jongka.

Shuwa ban poi, namar ba ki la thngan ki la pynsangeh ia ka jeep jongki ban iarung bam ja shuwa ha kawei ka dukan.

Mar kumta u Norin u la iohi ia kawei pat ka jeep kaba dang shu sdang khñh ban iaid noh. Hadien ba baroh ki la rung hapoh dukan, u Norin u shu ieng hangta habar kum uba bun jingpyrkhat. Kam long kaba phylla ia u nongkyndong uba poi khamtam sha ki sor dkhar ba un ang ia ki ba iaid ba ieng bad kumta ki jong u bah Dro kiba sngewthuh ia kata ki la khot ia u ba un rung. Hynrei hadien ba u la shong hangta ruh u i kumba u bun jing pyrkhat. Kim da salia ban kylli ei ei ia u bad kumta hadien ba ki la iadep bam, ki la ia siew pisa bad mih noh nangta.

U Battle Field pat u la sngew phylla haba u la iohi ia kawei pat ka jeep kaba i kumba ka bud dien natdong natdong bad haba ki la pynsangeh ruh ki la sangeh lang kham pajih. U la iohi ruh ba ki don kumba sawngut ki rangbah ha kata ka jeep.

U Dormu, kum uba la tip bad ithuh bha u la ialam iaki. U leh trai bad kren pariah lut ia ki nongtrei nangta kat kiba u iakynduh. Ki ruh ki leh sngewtynnat bad kren pariah bha ia u bad ia kylli tohkit u long kumno bad u wan donkam aiu shata . - U la iathuh iaki ba u shu iawan lang bad kita ki paralok na ka bynta kawei ka kam ba ki kwah ban ia kynduh ia u doktor Rangbah.

U Dormu u la khongngoid shapoh na ka pyrda jong kawei ka kamra katba ki jong u Dring ki iaieng nadien jong u.

**"Kumno'sahep" La ong u Dormu.**

"Wa kumno ? Ale rung." La ong uta u sahep napoh.

"Ngi iawan donkam shane sha phi kein bad kine ki paralok." La ong u Dormu u da kham kdat ia ka pyrda ba u sahep un iohi ia ki.

"Ale rung, ong ia ki paralok jongphi ruh."

Ki la iarung hapoh bad u Norin u la rung khatduh. U Doktor Rangbah u la shu peit lyngngoh ia u haba u da dem ba ioh tyngkhuh ka khieh ha jingkhah bad la i kumba u la dap smam bad un ym lait rung.

"Nangta phi iawan donkam aiu ?" La kylli u Doktor Rangbah.

"Ngi iawan na ka bynta kato ka kynthei Khasi sahep. Kato kaba la don hangne palat arphew snem. Ngi ia tip mynta ba ine i dei i lok jongka." U da kdew artat sha u Dring, "Ine pat i dei i para jongka." U da kdew artat sha u Norin. Ia ka khun jongki ruh la dang shu lap shen, ka la heh la samla bad mynta ka don ha Shillong ha ing jong ine i kpa."

U Doktor Rangbah u la leh lyngngoh bad leh kyndit. U la peit shaii sha u Dring bad khamtam sha u Norin.

"Kaei ka kyrteŋg jongphi?"

"Ka kyrteŋg jongnga ka dei u Dring."

"Ka jongphi pat?"

"U Norin."

"Kumno kumta ? Bah Dormu, kumno phi ia ithuh bad kine ?"

"Hadien ba nga la leit phai, nga hap ban bylla bad ki."

"Phi trei bylla aiu ?"

"Ngi iatrei bylla surok ine i dei i kontraktor." La iathuh u Dormu u da kdew sha u bah Dro.

"Phi kyrteng kumno bah?" La kylli u Doktor.

"U Dro."

"Phi don kot ei ei hangto kiba phi ioh na office P.W.D.?"

U Bah Dro u la sei ia ka bek bad nangta u sei katto katne ki shithi ai kam bad pyni ha u.

U Doktor u la shim bad peit iaki u da i leh pyrkhath jylliew bad kyrngah khlieh.

Ki la iasdan ban sngew lyngngoh balel u Doktor u leh kumta- Balei um khot beit ia ka Khuri hangta. Balei u da thlia kumta ia ki bad da pan kot pan sla kum bym shaniah haba u Dormu uba u ithuh bha ruh u iadon lang hangta

"Kane te la dei ban pyntip sha ki pulit." La ong u Doktor "Ym lah leh ei ei." U la shim artat ia ka phone.

"Balei sahep ? Phi don daw aiu iangi ban phah kem pulit ?" La kylli u Dormu.

U Doktor u la buh shuwa ia ka phone. "Dang myntan shiphang, ki la wan ki pulit na Shillong bad ki la ialam iaka. Peit kine ki kot ki sla ki dang don hangne ha khmat jongnga. Ki wan ialam ruh arngut ki briew bad ki la iathuh ba uwei naki u dei u lok jongka bad u dei u para jongka."

U Battle Field uba la kham nang kham stad napdeng jongki u la tur shajan ban peit ia kita ki kot ki sla bad u la nang batai iaki.

"Hooiid shisha ki pulit na Shillong kila wan shim ia i. Kane ka shithi na u sahep pulit nang-tei. Kane ka shithi ka iathuh ba la lap ia ka tynrai jongka ing ka sem ka Khuri bad u da ai kyrteng iaphi baroh arngut kum kiba iawan lang bad ki. U la bthah ba yn phah noh ia ka Khuri bad ki ryngkat kita ki pulit khnang ba kin ioh leh ia kaba donkam. Hangne ki da ia soi, bad don ruh hangne kaba soi "Dring" Kaba pyni kum u lok jongka bad kawei kaba soi "Norin" kum u para jongka. La batai u Battle Field iaki.

La dum ka buit ka stad. Ki la shu ia peit uwei ia uwei khlem nang pyrkhat ei ei shuh.

"Phi nang ban soi ?" La kylli u Doktor ia u Dring.

" Hooiid"



"Ha soi hangne kumno phi soi. "U la ong bad ai ha u i lyngkhot kot sada bad u Dring ruh u la soi iala ka kyrteng hangta.

"Phi pat?" U la kylli ia u Norin.

"Em ngam nang, nga shu shon kti." La ong u Norin u da ieng naba shong da kaba pyrkhat ba u Doktor un sa phah shon kti ia u.

"Nga suba ba don ei ei kaba sniew ha kane ka kam, donbok ba phi iawan poi hi kumne mynta. Phi kwah ba ngan kylli na Shillong?"

"Nga tharai kan bha kata,." La jubab u Battle Field.

"Lada ngam bakla, nga la iohi ia i kong ha kato ka jeep hynne ha ka por ba ngi iarung ha ka to ka dukan die ja. "La ong u Norin.

"Ka jeep pulit?"

"Em, nga khlem iohi pulit eiei."

"Ka iohi iaphi? Kumno phi ithuh ia ka." La kylli u Doktor ia u Norin.

"Katba nga kynmaw, ka syriem thik kum i bad nga i kumba i peit lyngngoh ia nga bad i kumba in kren in kren hynrei hamar kata ka por ka jeep ka la iaaid lait noh."

"Kata te ngam sngewthuh sngewthaw shuh. Kaba sngew pher. Ym donkam ban ia pynslem ei ei ka dei ka kamiap kamim. Ngi dei ban iohiaka.

Kumno ngin leh phi pyrkhr̄t ? Nga tieng ba ioh don na ki rangpah pulit kiba iadon kti lang ha kaba rah tuh iaka namar kumba ka paw na kine ki kot ki sla, kine ki riewthok ki dei kiba la tip bha ia ki rukom trei kam ki pulit." La ong u Doktor.

"Lada ka long kumta, kam bha ba ngin wad ia ka jingiarap ki pulit." La ong u bah Dro.

"Ngam tharai ba baroh ki pulit kin iadon kti ha kane. Lehse lah ban don uwei ar. "La ong u Battle Field.

"Nga ruh nga sngew dei kumta. Tang ba ym lah ban thikna bad ha ka jingbym tip ngi lah ban kum pan jingiarap pynban na ki nong ia syl-la sniew. Hynrei ym don lad da kumwei." La ong u Doktor.

"Ban da don uto u Carmes mo !" La ong u Dring.

"O hooïd shisha. ngam kynmaw ia u Carmes." La ong u bah Dro. "Tharai kan bha ba ngin pan jingmut shuwa na u."

"U Carmes ! phi mut uto uba ioh kem ia uto u rangbah riewsniew bad ka kynhun jongu?" La kylli u Doktor.

"Hooïd." La jubab u Dring.

"Phi ithuh ia u ? Kumno phin ioh lakren bad u?"

“Ngim ithuh hynrei nga lah tang ban shu ia kren. Nga don hangne ka nombar phone jongu ba la shu ai da uwei u paralok kum ba u da tip ba ngin donkam ia u.” La ong u bah Dro.

“O uto u Carmes ! nga ithuh namar nga ju iakynduh ha Delhi, nga ialong paralok te shathie.” La ong u Battle Field.

Ki la phone sha u hynrei la iathuh ba um don bad ba un sa wan hadien katto katne por.

“Mano ba kren?” La kylli uta uba kren na Shillong.

“Manga u Battle Field, Nga kren nangne na Tezpur, nga donkam kyrkieh ia i bah Carmes.”

Mar kumta u Battle Field u la iohsngew ia ka sur jong u Carmes.

“Hello”

“Hello, i bah Carmes ne? Nga kren manga u Battle Field.”

Ki la iakren stet katba lah bad u Carmes u la ioh katto katne ki jingbatai shaphang ka jinglong ka kam. U la batai ruh ia ki kumno ba kin leh. Nangta u la Phone sa lai saw jaka shane shatai.

U la shong pyrkhat shipor bad hadien ba u la dep bam lai tylli ki soh apple u la khreh la khrum bad mih bak nangta.

“Ka jingim jongki ruh ka don ha ka jingma, ki bapli ki nongkyndong ba lui lui. Ngam tip shuh la ngan dang lap ne em ia ki.” U la ong ha lade katba u dang shong hapoh ka taxi ha ka lynti ban leit peit ia ka Sian bad ia ka Brillian.

U Carmes u la sngewthuh ia ka dong ba u shong u Dring bad u la phah sangeh kham ha pajih. Kawei ka long ba ioh don kiba peit siar ia u. U la iaid shaphang shata kum uba shu iaid lynti.

U la lap ia ka kynthei kaba die kwai hangta kumba ki la batai ia u bad u la ieng ban thied kwai bad thied sikret. U la pynslem da kumne da kumtai katba u nang peit siar sha ka ing u Dring. Namar ba ka la kham pajih khyndiat, u la sei da ka it khmat ba kyrpang jongu. U la iohi ba la khang tala ia ka ing bad u la sngew ngiew ioh ka jingpyrkhat jongu ka la urlong.

Ha kawei pat ka liang kham pajih khyndiat ka don ka dukan sha. Nangta lah ban iohi kyn-diang ia ka ing bad ka phyllaw u Dring. U la leit rung dihsha hangta.

U shem halade ba kane ha dei ka kam kaba jwat ia u. Um pat ju iohi ia ka Sian bad ka Brillian mynno mynno ruh, U la sho ioh tang khyndiat ka jingbatai shaphang ka dur ka dar jongki bad hapdeng jong ka sor, ban wad iaki kan long kumba wad ia u thyrnia hapdeng shi thup bah u skum kba. Ka kam ka dawa ia ka por kaba bun ha kawei ka liang katba ha kawei pat

ka liang u dei ban pyndep ia kiei kiei tang ha ka  
 por kaba lyngkot bad kawei pa kawei ka sekhn  
 ka dei ban long kaba seisoh lym kumta un ym  
 lah ban siewspah bad baroh khoit kin shu long  
 lehnohei. Ym tang katta kane ka dei ka kam  
 jongu kaba baroh ki peit kyrmen ia ki kam ba  
 phylla ba un leh. Hangne ka shong ka nam bad  
 ka burom jongu. Ka mynsiem jongu ka skuiñ  
 bad khih kyndeh hynrei u sngew kumba ia ki  
 jingtip bad jingshisha baroh shaphang jong ki la  
 set khop hapoh ka ing nar barben ka bym don  
 wat tang ka thliw shabi.



## XX

Kumta ka pateng jong ka Tngen kaba la  
 wanpaw hadien ba ka la jah palat arphew snem  
 kum u lur dih duma tang shipor u la jah biang  
 noh. Ka long kaba ch wat ia u Carmes hi ha  
 kata ka por ban ong la ka pateng jong ka Tngen  
 kan dang don ne em kum ka pateng ba im ha sla  
 jong kane ka khyndew.

U Carmes u long kum u sewbeh ha kaba  
 thwet ia ki riew sniew bad shisien ba u la sma ia  
 ka dien ka mut ba un ym pep ban lap ia ki ne ia  
 ka kynhun bad ka ktem jongki. Hynrei ha kane  
 u la shaiong ngaiñ, u shem ba um lap shuh ban  
 sma dien bad nalor kata ka don ruh ka jingsma  
 khla. U la pyrkhat hangta shipor hynrei um

sngew shem buit shem lad satia. Kumta hadien ba u la dep dihsha u la ieng ban leit noh da ka jingsngew khia mynsiem.

Hynrei hamar kata ka por u la iohi ia kawei ka kynthei kaba dang rung na phalor sha phyllaw u Dring. Kat kum ka jingbatai ba u la ioh u sngewthuh ba kam dei ka Brillian. Kawei pat ruh lada dei maka, ka la dei ban don lang bad ka Sian. Ka rukom leh bad rukom ia id rukom ieng jongka ka long kaba i suba kumno re. U la ieng hangta shipor ban peit bad bishar iaka.

Tang mar ia poi hakhmat ing u Dring u la iohi ba ka leit beit beit sha ka jain saw ba la thad hangta ha u sainar. Shuwa ban shim iaka ka da peit bha, i kumba ka khmih lynti ba un don u kynja khniang ei ei u ban snoh hangta. Mar kumta u la iohi ba ka loit nangta ia i ei re i ei iba la pyndait da u pin. Ka la thep ia kata hapoh ka pla bad ka la lum noh ia kata ka jaiñ. Nangta ka la leit ktah ia ka tala kaba khang ia ka ing u Dring kum ban peit la ki la khang bha ne em.

Nangta ka la phai noh ka da wiat puh samrkhie bad kohnguh khlieh ha lade. Nangta u la iohi iaka ba ka leit sha ka lynti sha paiñkhana.

Kloi lan u la mih nongta u da loit noh ia kata ka it khmat. U sngewthuh hala ka iingsngew ba don ba peit siar bad ba bud nadien jöngu. U la rung shapoh phyllaw bad thew beit beit sha ka dong ba shong u Dring. U la sei bad deng sa da kawei pat ka it khmat u la iohi ba uta u brieve

uba bud ia u ba u ieng bad peit ia u na phalor.  
U la leit haduh ha jingkhang bad u da leh sngew  
sih haba u la i ba ka khang tala.

U la iohi iaka ba ka la mih na paiñkhana  
bad u la leh kum u ban leit noh.

“Phi wan it iano bah?” La kylli kata ka  
kynthei.

“Nga wan it ia u bah Dring.” U la jubab.  
“Shish nga nang don kam kaba kyrkieh bha hyn-  
rei khang tala pynban.” U la pynbud.

“Kim iadon te, imat ki ialeit jingleit. Phi  
donkam aiu ?”

“Phi shong hangne?”

“Hooïd nga shong wai hangne ha khрум.”

“Shi shi ngan sa leh kumno keiñ haba kum-  
ta!” U la leh bynniaw.

“Balei ?”

“Phi i, ne to iehnoh phi ka mat iadep shato.  
Ne Phi lah pynban ban iarap ianga ha kane ka  
kam.”

Kata ka kynthei ka la kwah ban tip bad  
ka la kut jingmüt ha lade ba kan ym iehnoh ia  
u khlem da tip ei ei katto katne ia kata ka jing-  
donkam jongu ioh kumno humno kan long pyn-  
ban kaba donkam ia ka.

"Ka long kaba eh ba phin iakynduh ia i, bun na kiba wan it ia i ki shait shu pynbthah ha ngi." Ka la ong.

U la tur kham sha jan jongka bad u la kren da ka sur kaba jem kumba tieng ba ioh don man no mano ban iohsngew. "Kata sngewbha sa pynleh shitom lem maphi, namar ba lashai ngan hap ban leit jingleit shabar Shillong. La shibit myamied ruh ngan ym lait ban wan. Nga sngew wit te ban leit jingleit lada ngam ioh ban pynphai noh shuwa la ki mar jong ki briew."

Ki mar aiu ?"

"Ki ksiar phi. Phi i, tangba wat leit iathuh briew ho. Ha kane ka taiew i donkam pisa kyrkieh bad nga la ai kyliang shiphew hajar. Ha ka jingshisha nga la mut ban shu ai kyliang kumto hynrei i wan buh pynban da ki ksiar hana ba ioh jia kumno kumno."

"I ma ma Dring i ba long kumto, balei phim buh haduh ba in da pynphai ia kata ka pisa jong phi?" La ong kata ka briew namar ba kam sngew myntoi ban iakren shaphang ki ram.

Ngan buh kumno? Tang ha ka sngi kaba bud i la pynphai noh baroh ki pisa. Haba nga pynphai ia kita ki ksiar pat, i ong ba in dang leit donkam kylleng kylleng bad i salia ban rah. Nauduh kata i khlem wan mih shuh. Phi ong phi dei ma ma?"



“Ngi dang kham iajan. Ngi iashong hang-ne ruh bun ba im ju shim bai wai.”

“Nga khlem rah mynta hangne namar ngam thikna ba ngan iakynduh ia i. Lada phin ap ianga tang shipor ngan leit shim jing jang. Kan kham bha ba lada don mano ‘na-no ki ban iadon lang kum ki sakhi namar ha kum kine ki kam ka ju long ka rukom. Katba nga ngan leit shim, nangwad paralok ki ban iadon lem namar kum ban shu ong noh ngam pat ju ithuh iaphi bad la ngam don jingmut ba phin nud ban thok ban shukor hynrei tang ban shu long pyndep rukom kein kumba ialeh lem kiwei kiwei haba ia shim ia ai ia ki mar kiba shong dor da ki phew hajar.”

“Nga kham kyrkieh khyndiat hynrei to ngan ap iaphi tang ba wat leit pynslem ho.”

U Carmes u la sngewthuh ba ka tieng ba ioh u shu kren kai ne un shu jah noh. “Hooiid nga la sngewthuh, nga ruh nga kyrkieh.” U la ong ban pynshlur iaka ba um don por ban pyrkhat da kumwei pat, bad u la mih noh bak.

Haba u la poi ha phalor, u la iohi ba uta u briew u dang ieng bad iakren bad katta ka nongdie kwai. U la iaaid lait kum ba khlem peit ne iohi ia u.

Ym slem hadien u kata, Carmes u la wanphai bad u shem ba ka dang ap ia u hangta.

Kumno phi la ioh paralok ? u la kylli  
 “Hooïd ki la iadon hapoh ing, ale.”

Kumta ki la iarung shapoh ing jongka.  
 Ki la don lypa arngut ki rangbah hangta bad  
 u Carmes u la ithuh ba uwei na kita u dei  
 uta u juh u briew uba peit siar ia u.

“Nga la dei ban poi naduh kham myn-  
 hynne hynrei ha kane ka pulit dap ram te  
 kaba la ia pynduh por shisha phi.” La ong  
 u Carmes.

“Balei, u leh aiu? La kylli kata ka kynthei.  
 “Katba nga dang iaïd kumto nga sngew  
 kumba ki ialap ba iohkem katto katne ngut  
 ki briew kiba kit jubor ia arngut ki kynthei  
 shi kmie shi khun.”

U Carmes uba la tbit bad mlien bha  
 kumno ban peit thuh bad tip ia ki jingmut  
 ki briew na ki rukom kren, khlem artatien  
 ei ei ruh u la shem ba kine baroh lai ngut  
 ki iadon kti ha kata. U la kham sngew suk  
 khyndiat haba u pyrkhath ba wat la ka la  
 kham slem pynban kan ym long leh nohei.  
 U la iohi ba ki iapeit khling khlang para  
 maki iwei ia iwei pat.

“Naei ki iohkem mo?” La kylli uwei.

“Ia kata te ngam tip tang ba la sngew-  
 thuh ba don sa katto katne ngut kiba iadon  
 kti ha kata bad ba ym slem kin sa iohkem

iaki ruh." La nang pynheh u Carmes ub ithuh ia ki jingkhieh ki rymmiang shyntur bad sngewthuh na ka sur ba u don ka jingiatip lem kaba sniew.

"Kong Bris,, phi donkam aiu iangi," La kylli uta uwei pat.

"Ine kein i bah i donkam paralok uwei ar ki ban sakhi lem ba nga pynshim manga ia ki mar jong i ma ma." Ka la iathuh.

U Carmes u la iohsngew ia ka jingpah ka kali napoh surok kaba ai dak ia u. Ki-ta baroh lai ngut ki la ia pyrkhat kumno yn ialeh namar ki la ia mut da kumwei pyn-ban ka wan mih da kata ka jingsngew tieng iaki pulit, kiba thwet briew ia ka lynti ka syngkien, kumba la iathuh u Carmes. Kim tip ei ei ia ka kam kaba u Carmes u la leh.

U la leh kumba jyrhoh bad ha kata ka por u iohi ba ki ia ai dak paralok. Ka la dei ka por ban leh noh ia kiei kiei baroh.

"Ap khyndiat mo ? Kane ka kpoh jongnga imat nga don jingbakla bam ei ei phi." U la ong bad ieng artad kum ban leit shabar u da sei ia ka it khmat bad deng iaka.

Hynrei hamar ba u la phai dien iaki u la iohi lyngba kita ki it ba uwei naki u la sei uei re uei bad u la tangon ia u na ka khlieh. Wak u la phai kynsan bad katba u ta u ba bom ia u u dang

klumar kum uba bieit u la ai bad phuk bad phak ia u bad ula kyllon ha madan. Uta uwei pat haba la iohi ia kata u la sheptieng bad u la mut ban phet. Hynrei u Carmes u la khang lynti ia u bad u la kura ia u bad u la kyllon hangta ha madan.

U la peit na jingkhong bad u la ong ia kata ka briew ban iamih noh nangta namar ki pulit ki lah ban wad ia kita ki briew kiba ha ka jingtharai jongu ki long pynban kiba iadon kti ha kata ka jingkit jubor ia kita ki arngut ki kynthei.

Ka la poi ha ka jing bym banse bad kumta ka la bud ia u.

Ki pulit ki la phah sangeh iaki katba ki dang iaid hangta tang shu mih na phalor.

“Shano phin ialeit?” La ong u pulit uba kham i long heh.

“Ngin ialeit donkam?” La ong u Carmes

“Sngewbha ban thoh ia ka kyrteng, ka jait, ka jaka shong bad ka jingtrei jingtah jongphi hangne”. La ong biang uta u pulit.

U Carmes u la shim ia ka kot kaba la ai ha u da uta u pulit bad u la thoh;—

“Arngut ki don hapoh ing ha ka mala kaba hapoh, rah iaki tang shu leit manga. Phah phla da leh kham tyngeh iaki namar ki tip ia kiei kiei.

Ngan don hangto haba nga ju trei kam lada phi donkam ei ei ianga. Ia ine i kong ngan ialam shuwa manga. Tulasi ianga bad shim ia ka tape khnang ba phin sogewthuh kumno ban leh.

U la pynphai ia kata ka kot bad ki la sdang ban iaid lait. Ki la ia iaid tang kumba laiphew jam haba u pulit u la khot biang ia u Carmes. U Carmes u la leit bad uta u pulit u la leh kumba tulasi ia u bad u la shim ia kata ka tape. Ka Bris kam iohi ia kata bad hadien ba u la wan ki la ia iaid noh.

Kawei ka Taxi ka la wan. U Carmes u la ong "Katba nang kham jngai nangne kan kham bha." U la rah kti bad ka taxi ka la sangeh.

Kam shym la shimpur slem ia u Carmes ban ioh ia ki jingtip kiba u donkam baroh na ka Bris, hadien kata u la leit aiti noh iaka ha ki pulit. Shiteng na ka kam ka la dep hynrei ka shiteng kaba sah ka long kaba kham eh bad kham jwat. U la phone sha u paralok uba iatrei ia kajuh ka kam uba don sha tezpur, u R. K. Talukdar. U la batai ha u ia kiei kiei baroh bad u la bthah ia u ban nang leh ia kaba donkam kat kaba u lah. Hadien kata u la mih kyrkieh bak.



## XXI

Kum ka langbrot, ka Khuri ka la shu bud  
beit ia kita ki pulit kiba la ialam iaka. Ka sha-  
niah haba u Doktor rangbah, uba long u briew  
uba bha bad uba lah ban shaniah u la ong iaka  
ba kan leit bad ki. Kam tip balei ? Shano kin  
ialam iaka ? bad aiu kan jia ?

Tang shu palat nangta katto katne por, kita  
ki pulit ki la law noh ia ki tupia bad phong da  
kiwei pat ki jain halor kita ki riam pulit. Wat  
la katta ruh, kam suba ei ei kaba sniew pyrshah  
iaki bad kylli ei ei ruh iaki.

Dei tat haba ka la iohi ia u Norin ha kata  
ka por ba ka jeep ka la iaaid artat ba kata ka  
jingkah ba rben kaba pyniakhlad iaka mynta bad  
ka mynnor ka la kad wak ha ka jingkyrmaw jong  
ka bad ka la sdang ban sngewthuh ia ka jingma.  
Ka la kynmaw iala ka shnong, iala ki kmie ki  
kpa, iala u lok, iala ki hynmen para bad kiwei  
kiwei de bad kumjuh ruh iala ka khun kaba ka  
la ieh sha Tyrna.

Kita ki rangbah ki la iadih um soh bad kila  
ai iaka de ba kan dih. Ka la dih bad hadien ka-  
ta ka la sngew shohthait shoh tlot ian bad ki  
khmat jongka ki la sdang ban ring samthiah.  
Hadien katto katne por kam tip ei ei shuh.

Haba ka la kyndit ka la shem ialade ba ka  
thiah halor ka jingthiah ha kawei ka kamra. Ka  
ba pynsngew phylla iaka ka long ba kata ka

kamra kam don jingkhagit satia. Kam tip la ka dei mynmied ne mynsngi bad la pynshai ia kata ka kamra da u bulb elektrik nalar ka sad dewbi-lat. Ka don sa kawei pat ka kamra sha shiliang kaba long kum ka iingshetja tangba ymdon dpei satia. Ka don kawei ka duli kaba heh hangta bad haba kala plie ka la shem ba ki don ki bam ki dih ba la buh hangta.

Ka la peit shane shatai ioh don mano mano ne ioh don jingkhag ba kan mih hynrei kam iohi satia. Ka don ruh ka kynja painkhana ka ba rit hangta ha kyndong bad ka iohi na kata ka thliew painkhana ba ka um nalla ka tuid nangta. Ka la sngew thngan bad kumta ka la shim bad bam ia kita ki jingbam kiba la buh hangta.

Kam don ei ei ban leh, kam don badno badno ba kan iakren ia khana ne ban kylli pyrthew balei ba ki wan ialam bad set iaka hangta. Hynrei ka sngewthuh bad sdang ban suba ba ka don ka jingia sylla basniew ia ka jingim jongka. Ka la peit bha sawdong sawdong da kaba kyrmen ba kan iohi jaka kaba lait ba kan ioh phet noh nangta. Hynrei ym don satia.

Ka la shong pyrkhag marwei hangta kumno kan leh. Kam sngewthuh sngewthaw ia ka jing-iaid ka por. Ka la sngewthait sngewring tlot na ki jingpyrkhag bad ha ka jinglong tmang bad kynjah. Kumta ka la leit dem biang ha jingthiah bad sdang ban duwai ; "Ah trai kynrad u nong-thaw u nongbuh, nga tip skhem ba me iohi ianga

wat la nga don hapoh kane ka along kaba la wan buh ianga. Me tip ruh ia ki jingmut barieh jong ki dohnud jong kito ki briew kiba la rah bad buh ianga hangne. Lada ka long ka mon jong me, to pyllait ianga ba ngan ioh ban iashem bad ia kynduh ia la ki baieit bathoin kiba don hala ka ri. . . .” Kam shym donbor shuh wat tang ba kan pynkut ia ka jingduwai haba ka la iap iohthiah noh jar.

Haba ka la sdang ban kyndit na kata ka jingiohthiah, ka la iohsngew ngai ngai kum ka jingiakren ki briew ha kata kawei pat ka kamra. Ka la pynshah shkor bha ia ka jingiakren jongki bad ka sngewthuh ba ki iakren khasi.

“Ngam sngewthuh balei ba ki wan set pynban iangi hangne bad shano kita ki jong i pa, i ma ma Norin bad kiwei kiwei ki iadon :” Ka la iohsngew ba ka ong kawei naki.

Ka Khuri ka la rah dngang ka khlieh haba ka la iohsngew ia kata ka kyrteng Norin. Kam kwah ban pynthut ia ka jingkren jongki khlem da sngewthuh bha bad kumta ka la sngap shuwa.

“Ngi la hap ha ki kti ki riew sniew riew dakait. Kito ki jingiathuh jongki baroh ki shu long tang ki jingthok jingshukor ia ngi.” La ong kawei pat.

Ka Khuri ka la iohsngew shibun ki jingiakren jongki bad ka mynsiem jongka ka la kyn-deh stet haba ka la iohsngew ba ki ialap ruh ia ka kyrteng jongka. Hadien kata ka la iohsngew ba ki ia duwai.



Hadien shipor ka la leit sha kata ka kam-ra kaba ki iadon bad ka la lap iaki ba ki iashong sngewsih baroh arngut. Kim shym iohi satia ia ka jingwan jongka.

“Kumno phi wan poi shane kong?” La kyl-li ka khuri

Ki la kyndit katlah kat iai bad ki la phai sha ka.

“Ngi iawan na Shillong. La wan ialam iangi da ki briew kiba ong ba ki donkam iangi ba ngin leit sha Tezpur na ka bynta iwei i briew iba la sah slem hangta ha kawei ka hospital. Ngi sngew lyngngoh balei ki wan buh pynban iangi hangne.” La ong kata kaba kham samla.

Ka Khuri kam shym pynshah shkor ne ioh-sngew ia kata ka jingiathuh jongka namar ka jingmut jingpyrkhat jongka ka la leit lut sha kata ka briew kaba kham tymmen. “Kaei kane kein?” Ka la kylli ha lade. “Nga ithuh iaka bad la iakynduh iaka mynshuwa, haei kein?”

Kata ka briew ruh ka la leh lyngngoh bad peit shin ia ka.

Ki snem ki lah ban ktah tang ia ki katto katne ki bynta kiba ka lah ban pynkylla hynrei kim lah ban pynkylla ia ki bynta kiba kongsan jong ka jingim. Ka jingsngaid jingraikhoh ki lah ban wan ha ki por hynrei kim lah ban pynkylla ne pyndam ia ka dur tynrai ba la ai ba la buh u nongthaw.

"Maphi?" La kylli ka khuri.

"Maphi?" La kylli ka Sian ha kajuh ka por.

Kim shym ia jubab shuh namar ba kita ki jingkylli jongki mar kylliang ki la long hi ka jubab iwei ia iwei.

"Shano phi jah, phi poi shane naduh kito ki por?"

"Nga dang shu poi hangne. Hynrei shuwa ba ngan poi hangne ki la don shibun ki jingjia."

Ka Sian ka la peit sha ka Brillian kaba long kum ka it khmih kaba wanrah biang ia kato ka dur kaba la leit jong ka Khuri.

"Brillian, ine kein ita i mei jongphi." Ka la ong.

Ka Khuri bad ka Brillian ki la iakdup da ka jingjaw ki ummat bakmen. Ka Khuri khamtam ka sngew kumba ka bneng ka la hiar ha ka khyndew. Hynrei hadien katto katne por, kita ki ummat bakmen ki kylla long ki ummat bakthang ha ki haba ka pyrkhat ba ki iakynduh pynban ha kum kata ka por bad ka jaka ha kaba ki jingim jongki kim don ha ka jingsngew thikna. Ka sngew ba mynta ka dei ka kamram jongka ban pyllait ia ki nangta.

"Ngi dei ban lait na kane ka a long lada ngi dang don u khaw bad dang dei ban iasah hangne ha sla jong kane ka pyrthei. Kumno kein ki shna, naei ki wan buh iangi hangne?" La pyrkhat ka Khuri.

**“Ha ka por ba ngi rung, ka don ka jing-khang bad hadien ba kito ki briew kiba wan buh iangi ki la leit noh bad ki la khang biang iaka, ym ithuh shuh bad ka la long kynroh suda barch sawdong.”** La iathuh ka Sian.

**“Phi kynmaw hamar hangno ka don kata ka jingkhang?”**

**“Hamar hangtai.”** La ong ka Brillian ka da kdew artat.

Baroh laingut ki la iapeit bad bishar bha ia kata ka jaka hynrei ym i don dak ei ei ba ka dei ka jingkhang.

**“Ka dei ban don ka jingkhang bad imat la thaw iaka ha kata ka rukom ba ym lah ban ithuh ba ka dei ka jingkhang. Hynrei la kumno kumno lada ki mut ban dang pynim iangi kin hap ban wanrah jingbam. Ynda ki wan kumta ngin sa ia peit bha bad ngin sa leh kat kaba i shah ka kam ban lait nangne. “La ong ka Khuri.**

Kumta baroh lai ngut ki la ia pyrkhat tang kumno ba kin-johlait nangta bad kila iakut jingmut ban pyrshang baroh ki lad, long katba long.

**Ki la sngewthngan haduh katta katta. Hynrei la ki ap katno ruh ym don satia ki ban wanrah jingbam iaki.**

**Khatduh ka Khuri ka la leit peit biang hapoh kata ka duli bad ka la lap ba la pynbuh**

hangta lai pliang ka ja bad ka jingtah. Ka la rah iaki bad ai ia ka Sian bad ka Brillian ba kin ia-bam. Kaba phylla ka long ba kita ki ja ki jing-tah ki dang syaid kumba dang khat shen.

Hadien ba ki la dep bam ki la ia pyrkhath biang kumno kata ka lah ban long haba ym shym don mano mano ba wan rung hangta. Ki la sngew phieng ka khlieh bad ki sngew kumba kata ka dei ka ing jadu ne ing shong ksuid aiure. . Ki met, ki mynsiem bad ki jingmut jingpyrkhat jongki ki la thait bad kumta ki la ialeit thiah noh ryngkat bad ki jingduwai jur.

Kim tip slem katno ki la iohthiah haba ka Brillian kaba la kyndit nyngkong ka la kysiew iaki.

Ki la kyndit na kaba iohthiah bad ka jingtieng ka la ngat haki haba ki pyrkhath ba ka Brillian ka la iohsngew ei ei kaba pher, namar ki jingmut jingpyrkhat jongki mynta ki la thew bad khmih lynti sa tang ia kiei kiei kiba sniew ki ban jia halor jongki.

“Balei?” La kylli ka Sian katba ka Khuri ka nang pynshah shkor dngang ioh kan iohsngew ia ka jingjam ne jingiakren jong ki briew kiba wan rung hangta.

“Nga la phohsniew kawei ka jingphohsniew.” La ong ka Brillian.

“Phi phohsniew kumno?” La kylli ka Sian.

“Ia rat ba shu phohsniew ruh phi da leh kumba jia ei ei.” La ong ka khuri.

“Em, to iathuh phi phohsniew kumno ?” La kylli biang ka Sian ia ka Brillian. “Namar shisien ka la jia ba ngi la hap ha ka kut lad kum ka ne bad dei lyngba ka jingphohsniew kane ka Brillian kaba ngi ngeit ba ka ba dei ka jingjubab u kynrad ia ki jingduwai jongngi.” Ka la pynbud biang, ka da phai sha ka Khuri.

“Nga phohsniew ba ngi la lait nangne lyngba ka duli.” La iathuh ka Brillian.

Ka Khuri ka la pyrkhath shipor. “Ka long tang ka jingphohsniew ba la pyrkhath than imat.” Ka la ong.

“Ka lah ban long.” La ong ka Sian. “Kumno kato ka ja ka jyntah kan shu poi hapoh duli haba ym shym don mano mano ba wan rung.”

Kumta sa shisien pat baroh lai ngut ki la ia leit ban peit bad bishar bha ia ka jinglong kata ka duli hynrei kim lap ei ei kaba pher.

Kata ka duli ka long kaba heh kaba la shna da ka dieng. La pynshaniah iaka ha kawei ka dong jong ka kynroh. Ki jingkhong jongka ruh ki long da ka dieng.

Hadien ba la kham slem, katba ka Sian bad ka Brillian ki dang ia ioh thiah lyngngai, ka Khuri ka la leit peit biang ia kata ka duli. Ha-

dien ba kam shem ei ei kaba pher ka la khyrdep  
 noh ia ka bad shong ap hangta ha syndah jongka  
 kum ka miaw ba thap khnai.

Hadien katto katne por ka la sdang ban  
 shoh samthiah.

‘Khrak’ Ka la iohsngew kumba plie jing-  
 khang hapoh jong kata ka duli. Ka la pynshah  
 shkor bha bad ka la iohsngew kumba don kiba  
 wan buh jingbuh hangta hapoh duli. Ka la shong  
 khop khlem nang ban leh ei ei ne sngew nud wat  
 tang ban ring bad pynhiar mynsiem haba ka  
 sngew kumba u ksuid aiu re un mih nangta bad  
 un kshih iaka. Ka la sngap haduh ba kan da ioh-  
 sngew kumba la khang.

Sor ka la par sha ka jaka tpih bad lap ia ka  
 Sian bad ka Brilliant ba ki dang iohthiah. Ka la  
 peit iaki shipor. Ka dur ba i lui lui jongki ha-  
 pdeng jong kata ka jingiohthiah kala pynlong ia  
 ka ban klet ialade ha kaba pyrkhath sngewlem na  
 ka bynta jongki. Kam kwah ban pynshitom iaki  
 da kaba pynkyndit iaki. Kumta ka la pyniaw  
 triang iala ka mynsiem.

Suki jai ka la plie ia ka duli. Ka don khyn-  
 diat ka jing ang jong ka duli na ka bynta ba sha  
 kynriang, ka la pyrshang ban niat bad shem ba  
 ka lait. Ka la leit bak bak nangta, ka la kysiew  
 ia ka Sian bad ia ka Brilliant bad iathuh haki ia  
 kiei kiei baroh. Ki la ia pyrkhath shipor bad ha-  
 dien kata ki la iakut jingmut ban pyrshang ban  
 lait nangta, long katba long.

Da daba shitom ki la iamih nangta napoh kata ka kamra lyngba kata ka duli. Ka khuri ka la mih nyingkong. Ka la shem ialade ha ka kynja baranda ba long hapoh ing.

Ka dum ngaiñ ngaiñ. Ka Khuri ka la ong iaki ba kin mih, hadien kata ki la ia khyrdep biang ia kata ka jingkhaw na kynriang jong kata ka duli. Markumta ki la iohi ba la plie ia ka jingkhaw kaba don ha kawei ka liang jong ka baranda. Ki la iohi ba don ba wan rung shata bad ka jingkhaw ka la khaw hadien jongu. U la wan sha ka liang ba ki don bad ki la shu ia pynrit ialade bad pyndait sbak ha ka kynroh. Kim tip shuh kumno kin leh bad ki la ia khy-niuh na khlieh ha kjat. Katba u nang kham jan, katta ki mynsiem jongki ki la nang kyndeh.

Haba u la poi hajan jongki, ka Brillian ka la thap lynniar. Ka Sian ka la khapbrip tiaw bad duwai Blei hapoh la ka mynsiem. Ka Khuri ka la shu peit khliaw bad pyniaw triang iala ka mynsiem u tang shu iohi iaki kan tynrah beit beit da ka tari dab jong ka Sian kaba ka la bat pynskhem triang ha la ka kti.

Khlem tip bad suba ei ia kata, u la wan beit beit ban peit ia kata ka jingkhaw namar dei ha ba u la kyndit shi kynmaw na kaba iohthiah ba u sngew artatien la u narkhang uba woh ia kata ka duli u la boh bha ne em. U la ieng kumba pyrkhat shipor bad hadien kata u la woh bha ia uta u narkhang bad u phai bad leit noh. .

Ka Khuri, ka Sian bad ka Brillian ki la ioh ban ring bad pynhiar mynsiem laitluid khyndiat. Hynrei kumno kin leh bad shano kin leit nangta?

Ki la ia ieng pyrkhat hangta shipor bad sngew kum ba kin ia leit rung biang noh shapoh kata ka kamra haba ki pyrkhat ia ka jingsngew duh jingkyrmen bad jingsshah pynshitom lada lap ia ki ba ki mut ban phet kumta.

Ka jingdum, jingkynjah bad jingsngew ngiew ka la pynong ia ka Sian bad ia ka Brillian ba ba kin kham sngew kloï ban sah ha kata ka along bad ha kata ka jinglong, jia katba jia, ban ia kaba pyrshang ban phet na kata ka jaka ka bym i don jingkyrmen. Ka long kaba eh ban khroh ne pynshlur iaki. Kumta ki ia ia mynjur ba kin leit bsut biang katba ka Khuri kan pyrshang ban lait bad ban leit wad jingiarap.

Da ka jingsngew pang dohnud, ka Khuri ka la woh biang ia uta u nar khang hadien ba ki la rung. Ka Sian bad ka Brillian haba ki la ia rung shapoh kata ka kamra da ka jingsngew duh jingkyrmen kim lah khlem da jaw ummat jar jar haba ki pyrkhat ia kaei ka ban ngat ha ki bad ha ka Khuri kaba ki artatien ba kin dang ia iohi ne iakynduh. Sa shisien pat ha kata ka jinglong ki la phai ban wad ia ka jingiarap bad jingpynshait bor jong u Trai bad u Nongpynim jongki uba ki la shaniah, uba ju sngew ia ki jingduwai jongki



bad uba la ju pyllait iaki na shibun ki jingeh bad jingdum jingmut kum kine. Ki ia duwai na ka bynta ka Khuri ba kaei kaei kaba sniew kan ym ngat ha ka bad ki iasaid bakhmat u Nongthaw na ka bynta ki jingim ba kordor jongki.

Ka Khuri hadien ba ka la dep woh ia u narkhang, ka la ieng shipor ban pyrkhat. Nangta ka la iaaid kynjing ki kjat sha ka phang jong kata ka jingkhong ba u wan mih uta u briew. Lyngba i jingpei thliw barit na ka jingkhong, ka iohi ia ka jingshai ding ha kata kawei pat ka kamra. Ka la iohi ruh ia u briew uba i runar uba shong hangta hajan ka jingthiah. Ka la shu peit siar nangta bad pyrkhat artat kumno kan leh. Hadien shipor, u la ieng bad plie ia ka jingkhong bad mih shabar.

Sor ka la mih nangta bad poi ha kata ka kamra. Ka la peit sawdong bad i thuh na na ka jingdon ki tiar ki tar ki synduk bad kiwei kiwei ba ka dei ka kamra buh jingbuh. Kloi katba lah, ka la rieh khop ia lade ha iwei i kyndong iba ha lyndet jong kita ki kynrum kynram.

Tang mar kumta ka la iohsngew ba uta u briew u la wan rung biang. Kam sngewthuh katno slem ka la don hangta baba ka la iohsngew ia ka jingkynsnok jongu. Ka la mih sor nangta bad ka la plie ia ka jingkhong da kaba leh husiar bha ioh kan pyntyndit

ia u. Suki jai ka jingkhong ka la plie, bad ka khuri ka la iohi ia ka jingshai u bnai ha phyllaw. Ka la khyrdep biang suki jai bad kala mih shabar.

Kan jin da la kmen da ka jingkmn kaba khrow haba ka la lait bad ioh ban ring mynsiem ia ka lyer ba pyngngad jong kata ka jinglait im. Hynrei haba ka la pyrkhath shaphang ka Sian bad ka Brillian ka ngew kumba ka jingkit ba khia kaba kam lah shuh ban kit ka ban ia ka met jongka. "Kan myntoi aiu ba ngan lait tang ialade." Ka la pyrkhath. "Long katba long, ngan leit ban pyllait iaki ruh."

Kumta bad ka tari dab ba la bat skhem triang ha la ka kti ka la phai biang sa shisien ban leit rung shapoh bad ban pyllait ia ka Sian bad ka Briliian. "Ka jingim namar ki jingim. "Ka la ong halade. "Lada donkam ngan sieh la ka sieh. "Ka la ong biang da ka jingkut jingmut ban da leh shisha kumta.

Hamar ba kan poi artat ha jingkhong ka la iohsngew ia ka jingjyrhoh uta u briew napoh ing bad ia ka jingkhoh jong ka jingkhong. "Kaba kut kala wan." Ka la pyrkhath halade. "Imat u la iohsngew." Ym don jaka rieh bad ym don por ruh ban leh kumta, lada u plie ia ka jingkhong ka mut ba kin ia kynduh markhmut markhmat syndon. Ka la rah lypa iala ka kti ba tang shu plie kan dung la ka dung shuwa ba un ioh lad ban leh ei ei iaka.

Jai ka la pynhiar iala ka kti. Kam tip la ka dei ban kmen ne ban sngewsih haba ka la sngewthuh ba u khang ia ka jingkhong na shapoh.

Kam lah shuh mynta ban leh ei ei na ka bynta ka Sian bad ka Brillian. Kumta da ka jingbym banse ka la iaaid noh nangta da kaba pyrkhat ba kan leit wad jingiarap. Ka la dei ban iaaid na ka surok bala siang rong shuwa ba kan poi ha ka phalor nar ba la khang tala. Ka jingjongai jongka na kata ka phalor ka long kumba arspah pruh ei ei. Ka la peit shane shatai bad haba kam shym iohi iano iano ka la iaaid kham stet bad phai dien artat artat ioh don ba beh nadien jongka. Ka la kiew ia kata ka phalor nar bad ryngkoh sha surok bah.

Kam tip shano kan leit nangta namar kam pat ju poi ne iohi ia kata ka jaka. Kam sngew suk satia ban iehnoh kumta ia ki jong ka Sian bad ka Brillian kiba ka sngew kumba ka la iehnoh bein iaki. Ka la shong ha trai jong uwei u dieng jri uba don ha rud surok kham ha pajih khyndiat nangta, bad ka la ialympat jur bad la ki jingpyrkhat.

Hadien katto katne por kawei ka jeep ka la wan iaaid nangta. Ka Khuri kaba dang klet ia kiei kiei baroh kam shym la poi kynmaw ban rieh bad kumta ki la iohi iaka bad ki la pynsangeh ia kata ka jeep. Laingut ki briew kiba riam pulit kila hiar na kata ka jeep bad ki la wan sha ka.

"Phi leh aiu hangne katta mied ? "La kylli uwei naki.

Ka bor met, bor mynsiem bad bor pyrkhath jong ka Khuri ka la poi ha u pud uba kain lah shuh ban ia kyrda. Kiei kiei kiba la jia ha kita ki khyndiat por ki la long palat ia ka bor riew kynthai jongka. Ka jing kynmaw ba la wan shaw iaka na Hospital da ki briew kiba riam pulit ka la pynlong iaka ban sngewthuh ba ka la hap sa shisien pat ha ki kti jong ki riew sniew. Ka dur jong ka Sian kaba ka la ju pyrkhath shaphang jongka kum ka nongsamaria kaba bha kaba ka sngew kitram shibun eh na ka bynta ka Brillian, ka dur jong ka Brillian ka khun ba thep mynsiem jongka kaba ka dang iohlad dang ha kata hi ban iohi bad ia ithuh, kaba ka dang ioh ban doh ban dait dang ha kata hi ka por hadien bun ki snem ba kam tip shuh shaphang jongka, ki la wan paw ha ka.

Ka la sngew ialade kum ka mrad. bad kumta kum ka mrad ba la ioh khang kdong kala pynkhreh ban iakynduh ia ka jingiap lyngba ka jingialeh. Ka dur jongka ka la kylla kum ka ksuid, ka la sei ia ka tari dab bad ka la tur sha ki.

Hadien kata kam tip ei ei shuh.

Haba ka la kyndit bynrrew ka la peit lieb bad shem ialade ha kawei ka kamra. Ka la iohi hangta ia ki briew kiba riam pulit bad ka la kynmaw ia kata ka por ha surok. Ka la iohi ruh ia u Norin bad ia uwei u briew

uba ka sngew kumba ka la ju i thuh mynshuwa. "Wow wow wow" ka la ud ka da leh tieng haba ka kynmaw ba uta u briew u dei uba la iap bad ka pyrkhat ba ka la don ha ka jaka ki siud iap.

U Dring u la sngewthuh ia kata ka jingleh jongka bad kumta u la mih noh nangta.

Hadien kata ka la kyndit briew bha bad u Carmes bad u Norin ki la kylli jingkylli iaka bad ioh baroh kiba u Carmes u donkam ban tip. Ka kam kaba sah mynta ka long ban pyllait ia ka Sian bad iaka Brillian napoh kata ka along bad ban pynshitom ia ki nongkam sniew, bad ki dei ban ym pynslem ei ei shuh.

U syiar u la kynih. La pahara ia kata ka ing jong ki riew sniew pyllun da ki pulit. U Carmes, u Norin bad u Dring ki ia ap hajan phalor. U Norin um sngew lah shuh ban ap haduh ban da shai kumba la ia kut. U Carmes u la khroh ia u ba um dei ban bam jakhluit hynrei ban ap ia ka por. Haba u Norin um sngap u Carmes um banse ban mai ia u.

"Lada phim sngap bad phim lah ap ia ka por sa leh hi maphi katba phi mon bad katba phi sngewthuh. Phin kit khlieh hi maphi lada jia kumno kumno ruh."

U Norin haba u pyrkhat bha haka ba khatduh um banse ban ap bad pyndem ha ka hukum u Carmes.

Ka kynjat shai ka la wan bad u Norin u la peit shi peit sha u Carmes ba un ai dak ba kin ia tur noh. U sngew kumba u Carmes u la klet ne leh bym suidniew than ia ka kam namar ba um ai dak ei ei katno katno ruh. Haba u pyrkhat shaphang ka Sian bad ka Brillian, u skuin ka myns'em ban ioh pynhiar kput noh na ka bynta jongki.

“Ka la dei ka por.” La ong u Carmes. U Norin kum u khynnah skul uba ap ia ka jingtied jong ka period kaba khatduh, u la ieng joit naba shong bad thew ban leit noh beit beit.

“Ap shuwa.” La ong u Carmes uba dang peit bad bishar biang ia ka jinglong ka iing bad ka phyllaw. U la batai ia u Norin kumno ba un leh bad hadien kata baroh lai ngut ryngkat bad uwei u Subinspector bad laingut ki pulit ki la iarung hapoh phyllaw.

U Norin u la tied ia ka iing bad kum u khla u la ap bha ban rynsied kat ia uba plie. Hynrei la u la tied katno katno sien ruh ym don ba plie satia. U la kiew snam hain' ki khmat. U la jam katto katne jam shadien, u la pyneh triang ia la ka met bad u la lymbub ia kata ka jing-khang da la ka bor baroh.

‘Jrain rain rain la lait ka jingkhong bad u la rung pynkloi sha poh da ka jingstet kaba wat u Carmes hi ruh u da lyngngoh lyngngain. U Carmes, U Dring bad kita ki pulit ki la iarung nadien jongu. Uta u brieve uba don hapoh, uba